

VASEGA MATUTUA FAAPITOA 2021

MANATU AOAQ: IA ILOA LE ALII I TAIMI UMA

IANUARI & FEPUARI:

**A ASO Ā MA LE APU, O LE TAOFIA
FOI LENA O LE FOMA'I**

IANUARI

31 O le faatuatua mausalī i le Alii Tanielu 1: 1 – 15
(Aso Sa Tupulaga)

FEPUARI

7 Iesu, 'aia e te tu'ua i matou Luka 4: 38 – 44
14 E lavea'i le loto talitonu ma usiusitai
Galuega 27: 21 – 38
21 Fai le mea sili ma tatau Ieremia 29: 1 – 14
28 Na faia tatou mo se faamoemoe Efeso 2: 1 – 10

MATI & APERILA: "A SALA UTA, IA TONU TAI"

MATI

7 E faia e le Atua mea sili Ieremia 33: 1 – 18
14 'Aua le tu'uavanoa i le tiapolo Efeso 4: 25 – 32
21 A vale le tofa, ua malaia le nuu
1 Nofoaiga Tupu 19: 1 – 15
28 E lei taliaina e tagata uma lona Afio atu
(Aso Sa Laupama) Mataio 21: 1 – 17

APERILA

4 Sufi e le pepelo le moni o le Toetu Mataio 28: 1 – 19
(Aso Sa Toetu: Eseta)
11 Fasioti e Saulo, faitaulaga uma o Nove
1 Samuelu 22: 6 – 19
18 Faatāua meaalofa mai le Atua
1 Korinito 12: 1 – 13
25 Ia faatuputeleina pea lou onosai Roma 5: 1 – 11

ME: AVEA OE MA TAULAGA OSI I LE ATUA

3 Pulea tatau ou taimi Ioane 9:1 – 12
10 O Iaeli le tinā atamai Faamasino 4:14–24
(Aso Sa o Tinā)
16 FONOTELE I MALUA
23 Ia faapaiaina le ola 1 Peteru 1: 13 – 21
30 Faautauta i lau upu e fai atu Isaia 50: 4 – 11

IUNI: IA MATA'U TAGATA UMA I LE ATUA

6 O le Atua e finagalo i le loto maualalo Salamo 131
13 O le poto o le lalolagi o le vale i le Atua
1 Korinito 1: 1 – 25
20 O le ola ma le alofa mai le Atua Faataoto 8: 22 – 36
27 O le sapatu o le malologa lelei Luka 13: 10 – 17

IULAI: O TATOU O TAGATA O LE LAGI

- 4 Ua faamanuia le Atua i ona tagata i le lalolagi
Kenese 9: 1 – 7
- 11 Ia fanaufouina le tagata mo le lagi Ioane 3: 1 – 15
- 18 E leoleo e le Atua tagata amiotonu
1 Samuelu 26: 13 – 25
- 25 O Iesu o la tatou uo Ioane 15: 11 – 17

AOKUSO: O FEA E SAILI I AI LE LOTO MALIE?

- 1 O le olioli ona o manuia mai le Atua Isaia 35: 1 – 10
- 8 O le tamā lelei Luka 15: 17 – 24
(Aso Sa o Tamā)
- 15 E maua le loto malie i le Atua Faataoto 3: 1 – 12
- 22 O le malamalama o le Atua i le lalolagi
Ioane 9: 24 – 41
- 29 Ia faafiti oe ia te oe Mareko 8: 34 – 9: 1

SETEMA: O LE OLA I LE ATUA (Life in God)

- 5 E malosi le mea moni 2 Tupu 11: 1 – 16
(Aso Sa Tala Lelei)
- 12 O le tusi o le ola Malaki 3: 13 – 18
- 19 O le Feagaiga Fou Eperu 8: 7 – 13
- 26 Tumau i le Atua, tetee i le tiapolo 1 Peteru 5: 5 – 11

OKETOPA: O LE TALI ATU I LE ALII

- 3 Tapena le Lotu Tamaiti
- 10 **LOTU TAMAITI**
- 17 Malologa Lotu Tamaiti
- 24 Fai lau tatalo i le taeao Salamo 5: 1 - 3
- 31 Mauga o Sinai Eperu 12:18 – 24

NOVEMA: O FEAGAIGA

- 7 Ina soia, ia iloa le Atua Salamo 46: 1 - 11
- 14 O le feagaiga o le saolotoga ma le pologa
Kalatia 4: 21 – 27
- 21 O le feagaiga a le Atua ma Aperaamo
Kenese 15: 8 – 18
- 28 Matua ma Fanau Efeso 6: 1 - 4

TESEMA: O LE KERISIMASI

- 5 O le gafa o le Kerisimasi Mataio 1: 1 – 17
- 12 Meaalofa o le Kirisimasi Mataio 2: 9 - 12

**MANATU TAIALA: IANUARI & FEPUARI:
A ASO Ā MA LE APU, O LE TAOFIA
FOI LENA O LE FOMA'I (An apple a
day keeps the Doctor away)**

O le alagaupu faapapalagi (Proverb) o lona uiga; A tausami lava le apu i aso uma o le faatumauiina foi lenā o lou soifua maloloina lelei. Ao la tatou faatatauina faa-le-faatuatua; e mafai ona tatou faapea: A iā te i tatou lava le Atua i aso uma, o lo tatou mamao ese foi lenā mai le leaga ma le agasala, tatou te malaia ai. Ma o le mo'omo'oga lena o faananau i ai le loto, i le amataga o la tatou malaga o lenei tausaga fou 2021, "Ia iā te i tatou le Atua i aso uma lava."

ASO SA: 31 IANUARI 2021 (*Aso Sa Tupulaga*)

MATAUPU: **O LE FAATUATUA MAUSALĪ I LE ATUA.**

MATAUPU: A'oa'o tamaiti ina ia latou iloa le mausali ma le faamaoni o le faatuatua o Tanielu i lona Atua.

TUSI FAITAU: Tanielu 1: 1 – 15

FESOASOANI MO FAIAOGA:

O Tanielu o le Perofeta, sa faatafea faatasi ma le toatele o le nuu o sa Iuta i Papelonia, i le tausaga e 605 (BC), a'o lumanai le Mesia. E ui lava o latou o tagata tafea, a'e sa filifilia ma isi talavou sa Iuta e auauna i le maota o le tupu. E le'i so'ona filifilia foi i latou, ona e le gata o talavou malolosi, e atamamai, a'e sili la i le itu lilo lea, o le talitonu faamaoni ma le faatuatua i lo latou Atua. O lo latou i ai i le maota o ni auauna, sa matuā taumafai malosi ai auauna a le tupu, e a'oa'o tama Iuta i tu ma aganuu, ae maise le gagana a lo latou malo, (Gagana Kaletaia)

ina ia liliuina ai Tanielu ma ana uo. E oo a i o latou igoa, na suia uma i igoa Kaletaia.

O le mea moni foi, o le i ai o se tagata i le maota tusa lava po o se auauna, o le avanoa lava lea e 'ai ai i taumafa matagofie, ma inu i vai taugata e pei o le tupu. Ma o le vaisua tonu lea, o lo o vavala mai ai le uiga moni o la tatou mataupu o lenei Aso Sa. Auā o le felanua'i ma le matagofie o taumafa, e tosina gofie i ai le vaai ma le mana'o. Peitai ua fiu le auauna sili a le tupu, e sufi Tanielu ma ana uo, e le'i mafai ona aai ma inu i mea sa saunia i le maota. Sa talosaga Tanielu i le auauna sili a Nepukanesa, e faataga latou e aai ma inu na o meaai ma vai ua latou talitonu e lelei mo latou, e i ai fua o laau aina, ma le vaiauli. Sa talosaga foi i ai Tanielu, e fai na o ni aso se sefulu, auā e tolu tausaga o tuu mai e fai ai lea faamoemoe. E ui i le faigata, auā sa popole foi le auauna sili ia i lona tofi, ae maise o lona aafiaga pe a i ai se mea faaletonu, ae na ia talia lava. O le maea o uluai po e sefulu, na iloa ai, e sili mamao le lalelei o mata o Tanielu ma ana uō, ma o latou tino, nai lo auauna uma sa aai i taumafa ma inu i le uaina a le tupu.

O le eseese tele i foliga vaaia o auauna, sa mafai ona avea ma feau taua i le auauna sili a le tupu, ma auauna uma lava o le maota. Auā o le itu taua lea e pei ona tuliloa i le mataupu. O nei suiga ma eseese uma ua alia'e mai, e pogai uma mai i le loto mau, ma le faatuatua mausali o Tanielu i lona Atua.

Tupulaga o teine ma tama talavou, o se fa'aa'oa'o lelei tele lea mo tatou uma, mai lea foi talavou Iutaia o Tanielu, ma ana uō. Auā o le saisaitia o Tanielu i le tafeaga, e le'i avea lea ma ala e vaivai, pe fefe ai e tautino lona faamaoni i lona Atua. Faapei foi o Iesu, e le'i avea puapuaga matuitui ma le oti faamalumu ifo, e fai ma ala e suia ai lona tutumau ma lona usiusitai i lona Tamā.

Uiga o Upu ma Fuaitau:

- i) Eunuka (f 3) - O auauna i le maota o le tupu, ae faapitoa i auauna e leoleoina tofaga o le tupu.

- ii) o tama e le pona lava (f 4) – o tama e le gata ina lalelei, tino lelei, atamamai, ae le'i tauleagaina foi, pe na tauvaea i se mea.
- iii) Kaletaia (chaldeans (f4) – o le isi igoa e ta'u ai Papelonia
- iv) alataia (f 10) - pogai/avea ma mafuaaga

GALUEGA FAATINO: Taliga Fesili

1. O ai tagata sa Iuta o ta'ua i le tala, na aumai e Asepenasa e tausia faatasi ma auauna a le tupu?
Tali: Tanielu, Hanania, Mesaclu, Asaraia.
2. O le a le upu sa'o e faatumu ai le fuaiupu – “Ua maumau taumafa matagofie ma le uaina lelei, talu ai le _____ o Tanielu.” (fiapoto/fialelei, faamaualuga/faatuatua/fiasili)
Tali: Faatuatua.
3. O ai e 'au i ai le Soifua Maloloina, pe a fua i taumafa o ta'ua? O Tanielu po o Nepukanesa? Ta'u mai le mafuaaga o lau tali.
Tali: E 'au ia Tanielu
Ona e fautuaina e le Matagaluega o le Soifua Maloloina, le taumafa i fualaaui aina, ma inu i le vai. Ae soia le uaina ma taumafa esese e ma'i ai.
4. O ai e maualuga lona tulaga, o Asepenasa po o Melesara?
Tali: O Asepenasa
5. O le a le mea na iloa e le tupu, ina ua faatusatusa tama sa Iuta, ma ona tagata atamamai?
Tali: E faa-sefuluina ona atamamai atu Tanielu ma ana uo sa Iuta, na i lo tagata uma ma taulaitu o Papelonia.

PESE: (Pese ma Viiga 359) Ia pei o Tanielu

A'OA'OGA:

1. Taumafa meaai paleni.
2. Faatuatua i le Atua e pei o Tanielu
3. Tumau i le Atua e ola ai.

.....

ASO SA: 7 FEPUARI 2021

MATAUPU: IESU, 'AUA E TE TU'UA I MATOU

SINI: A'oa'o tamaiti, ia latou iloa le uiga o le vavao e 'aua le alu, ma le t'ua sili, na le mafai ai ona vaoia Iesu.”

TUSI FAITAU: Luka 4: 38 – 44

FESOASOANI MO FAIAOGA:

E afio atu Iesu, e le'o maua se to'a o le loomatua, le tinā lea o le toalua o Peteru, ona o le malosi o lona fiva. Sa faatoga tagata ia Iesu mo se fesoasoani mo ia, o lea na tulai ai le Alii ma vavao le ma'i vevela. Ua mapu ma malolō le fafine, ona tulai lea ma le loto faafetai, ua ia auauna atu i isi tagata i lona malosi ua maua. Ua iloa e le toatele, ma ua matuā ofo i le mana o le Alii, o lea sa faanatinati atu loa le toatele o i latou, o iai tagata mama'i o i latou aiga, ma aumai loa ia Iesu. Na ona papa'i atu lava o Aao o Iesu, i ma'i uma taitoatasi, ona malolō lea. E oo lava i temoni sa ulu i tagata, sa tulia uma i fafo e Iesu, e ala i le mana o lana upu fetalai atu, ona malolō ai lea o i latou. Sa alalaga temoni ma tautino – “O Iesu o le Keriso.” Peitai na vaoia e Iesu, ona latou usiusitai ai lea! O vavega mamana nei a Iesu, e ala i ona a'ao pai atu, ma lana upu fetalai atu, sa

faamaloloina ai tagata; a'e ua avea ma ala o lo latou matuā talitonu, e moni lava o Iesu lea le Mesia sa valoia mai, lea ua latou vaai tino nei i ai. Sa faamausaliina i o latou mafaufau le pule a Iesu, ona e le gata o ana faamalologa, a'o lona tutuliina foi o temoni i fafo mai tagata sa ulutino ai, ma lona vaoia, e sa se temoni ona toe tautala ia Ia.

O le māea o nei lavasiga uma, fa'aalia ai lona alofa i lea vaega o le atunuu, sa ia saili malosi muamua i lona Tamā e ala i le tatalo, ma sauni loa e tuumuli ese. Peitai, ina ua iloa e le nuu le tulaga lea, o le ala lea na latou o mai ai e vavao Iesu, e 'aia le alu, e pei o la tatou mataupu o le taeao nei. E tatau ona alu Iesu e tusa o lana tali ane, ona o Lana galuega alofa ma le galuega faamalolo, e mo tagata uma lava, e lē faapito na o se vaega. O le manao o nei tagata, e mafua ina ua latou tepa i ula ma tago i ula; auā ua i o latou lima manuia ona o Iesu. Ia o ai se a loto e toe faamamulu atu? Tatou te lagonaina uma lava, ae sili ona o manuia mai le Alii, ae le mai tagata. A o le isi itu taua e moni ai le Alii, pei e le gata o le faamalologa ma le alofa e faaoo i tagata uma, ae o le taua foi o lona alu ese; e fa'aaoga ai le malosi o e ua faamaloloina, e auauna ai foi ma fai le mea lelei mo isi, e pei ona faia e Iesu mo latou, i le ma lenei, e faamausaliina ai lo latou faatuatua, e ala i le loto talitonu ae le o vaai atu i le Alii.

Tupulaga o teine ma tama talavou, tumau lo tatou faatuatua i le Alii. Auā o le puna lena o lo tatou malosi, tatou te lagonaina ai foi le tatau ona fa'aaoga tatau lo tatou malosi ma le ola mai ia te Ia, e auauna ai isi foi tagata. O Keriso lava ua malōlō ai le lalolagi agasala, e ala i le Taulaga Faaola na ia saunia.

Uiga o Upu ma Fuaitau:

- i) sunako (f.38) - o le fale tapuai
- ii) ma'i vevela ua tele (f 38) – o le fiva ua maualuga
- iii) temoni (f 41) - agaga leaga

GALUEGA FAATINO: Taliga Fesili – Fa'aaoga lau Tusi Paia)

1. O le a sau upu e fai ia Iesu, le ua Ia faamaloloina lou tagata ma'i, e pei foi o le tinā o le avā a Peteru?

Tali: Faaleo le lagona o le faafetai mai le loto talitonu moni, ae sili ai ona leo tele, pe a fa'aaoga le ola e fesoasoani ai i le isi tagata.

2. Aisea sa faatali ai sei goto le la, aumai tagata mama'i?

Tali: Ona o le sapatu faa-Iutaia, faatoa maea i le goto o le la i le Aso Toonai. O le aso e sā ona feoai ai.

3. Aisea na vavao ai e Iesu temoni, e 'aia nei toe tautala se isi e ta'u lona suafa. Tau mai se mafuaaga e te iloa na mafua ai?

Tali: (i) Faailoa ai le pule a Iesu ia i latou, auā na usiusitai ma gugu loa.

(ii) Ia talitonu e o vaai ma faalogologo, o Ia o le Mesia (Faaola), aua o lana upu na malolo ai, ae le o upu a temoni.

(iii) Fa'aalia ai lona tagata tonu i le taimi, tonu e pei ona fuafuaina e le Atua, a'e le o le unaia e Satani (temoni) ma ana fuafuaga leaga.

4. Aisea na alu vave ai Iesu i le taeao, i le mea tuufua?

Tali: Na alu e tatalo i lona Tamā, e maua mai ai lona malosi, mo le fa'aaouaina o le galuega.

5. Aisea na lē mafai ai ona nofo Iesu, ina ua taofi e tagata e 'aia le alu?

Tali: Ona o le Tala Lelei ma le faamalologa a Iesu, e tatau ona oo i tagata uma.

PESE: (Pese ma Viiga 147) - Ia e afio mai

A'OA'OGA:

1. Faatuatua i le Atua e ola ai.
2. Fa'aaoga le malosi mai le Atua e auauna ai.
3. Fiafia e mafuta ma Iesu.

.....

ASO SA: 14 FEPUARI 2021

MATAUPU: E LAVEA'I LE LOTO TALITONU MA LE USIUSITAI

SINI: A'oa'o tamaiti ina ia latou iloa, le taua o le talitonu i le Atua e mafua ai ona usitai, ma manuia ai.

TUSI FAITAU: Galuega 27: 21 – 38

FESOASOANI MO FAIAOGA:

O le mataupu lenei, Galuega 27: 1 – 44, o le faamatalaina atoa o le malaga sa ave ai pagota i Roma, o lo o aofia ai ma Paulo i e o saisaitia. E i ai lava taimi o le malaga, sa vavala mai ai le tulaga ese o Paulo mai isi pagota. A o ataata lafoia lava ia, o le i ai o le Atua i lana auauna, tainane o puapugatia. I le f.3, o lo o fa'aalia ai le agalelei o le taitai o le toaselau ia Paulo, o Iulio lona igoa. I le f.9, o lo o taua ai, sa apoapoi ma fautua Paulo i le malaga, o aofia ai le taitai-au ma tagata uma. O mea e seāseā ona mafai, pe tatau i se pagota.

O le a le taea la le malaga umi, ma le mafatiaga sa feagai ma latou, ona o le tele o aso sa faatauga ai e matagi malolosi i le vasa. Ao faigata matuitui ia, sa matauina ai le toamalie o Paulo; sa ia mātāu taiga o le malaga ma mea o fai, ua le gata ina le manatu tagata i le aogā o le ai, mo se malosi faale-tino; Ae ua māmāu foi le tele o le uta ona lafoa'i i le sami, ona ua leai se

faamoemoe, ua na o le faatalitali i le iuga le mea ua fai. O taimi tonu ia o le luluti o faigata ma le lē mautonu na fa'aali atu ai loa le Atua e ala iā Paulo, i le au malaga atoa. Sa tautino atu e Paulo i le taitai au ma le au malaga, na faailoa atu e lona Atua ia te ia e ala i lana agelu i le po, le mea tonu e tatau ona fai e faaolaina ai i latou uma.

Muamua: Ua faailoa mai e lona Atua e ala i lana agelu ia te ia, e tatau lava ona tu i luma o Kaisara i Roma. O lona uiga, e taunuu saogalemu lava le malaga; auā o lea ua mautinoa, e oo lava Paulo i le Kaisara.

Lua: Aua nei oso ese se isi mai le va'a o latou malaga ai. Tainane le felafoaiina i le souā o le sami ma le malosi o le matagi, e leai se isi e maumau se ola; vagana la le tagata e le usitai ma oso i le sami, o ia la lenā e le ola.

Tolu: O ane e aai, ua sefulu fa aso e lei aai. Ua galo le tāua o le meaai e maua ai le malosi o le tino, talu ai le lē mautonu ma le palaa'ai. Na fai atu lava Paulo, ma tago ifo i le areto, ua ia faafetai atu i le Atua i luma o tagata uma lava o le malaga, ona latou aai ai lea.

Ma o le iuga lena o le tala, e leai se isi na māmāu se ola o i latou uma e 276 na i le vaa, sa taunuu saogalemu foi, ona o lo latou talitonu iā Paulo, ma lo latou usiusitai ia te ia ma ana apoapoaiga auā o faatonuga mai lona Atua. Tupulaga talavou, o lo tatou manuia moni lava, e pogai mai i le talitonu, faamaoni ma usisuitai i le finagalo o le Atua. O Iesu foi, na faaecaina i lona toe soifua mai manumalo i le oti ma le tuugamau, ona o lona usitai ma le faaalagolago i lona Tamā.

Uiga o Upu ma Fuaitau:

- i) tulula (f 30) - O le vaa faaola/vaa laiti e tauave i luga o le vaa tele, e mapu ma tua i ai le pasese, pe a tupu se faalavelave i le vaa i le vasa.
- ii) afua (f 35) - amata ai/mafua ai

GALUEGA FAATINO:

Vaelua le vasega i vaega e lua, o tama le isi vaega, a’o teine le isi. Saunia ni fesili tai lima a le vaega e fai, ae tali e le isi vaega. E faamasino e lau susuga a le faiaoga fesili ma tali, o le a le afaina le malo po o le faiaina, a o le malamalama i le mataupu le mea taua.

PESE: (Pese ma Viiga 225) A sousou le vasa o le ola nei...”
(Pese Aoga Aso Sa) A tumau ia Iesu, tatou te filemu..”

A’OA’OGA:

1. E le popole vale le tagata moni o le Atua.
2. E aogā meaai mo le malosi o le tino.
3. Faatuatua i le Atua e ola ai.

.....

ASO SA: 21 FEPUARI 2021

MATAUPU: FAI LE MEA SILI MA TATAU

SINI: A’oa’o tamaiti ia latou iloa, so o se aveai mai le Atua mo le tagata, o le mea sili lenā ma tatau.

TUSI FAITAU: Ieremia 29: 1 – 14

FESOASOANI MO FAIAOGA:

“Ta te nofo atu fua o taita o ‘Ae.” O le upu faa-muā-gagana a le atunuu, o tautino ai e le tagata lona faatauvaā ma lona leauga i luma o isi tagata. O le fa’aaliga o le loto maulalo ma le

faatauvaā, fua i le va nonofo ma isi o latou faafeagai. Atonu e faapena se lagona sa iā sā Iutā i lo latou i ai i luma o Nepukanesa, ma le malo o Papelonia, o latou o tagata lamatia ma lē saogalemu. O lagona faapea, e o faatasi ma le nofoa’i ma le faapalapala, i luga o le talitonuga, e leai se mea latou te mafai, ona o latou o tagata faatafeaina.

O le tusi la sa faitau nei, o le tusi a le Perofeta o Ieremia na ave i le tafeaga a sa Iuta o i Papelonia. O le tusi o le faamalosiā mo ē o tafea, ma fautua foi, ia i ai lo latou mautinoa ma le talitonu i le Atua. O lo latou mautinoa lena o le Atua, e latou te usitaia ai le faatonuga o avatu i le tusi, aua o le poloaiga mo latou mai le Atua e ala atu i le Perofeta. O le tusi foi na momoli e Eliasa ma Kemaria i lalo o le pule a Setekaia, ia Nepukanesa le tupu o Papelonia. O lo o tautino lava i le tusi, o le ave’a’i e aumai mai le Atua, Le na pule i lo latou faatafeaina. E le afaina po o le a se lagona o Nepukanesa i le faatonuga ua avatu, ae mo sa Iuta lava ia o iai i le tafeaga, o le mea taua o lo latou mautinoa o i le Atua, e faamalosiā mo latou, e afua ai foi lo latou usiusitai. Ae mo Nepukanesa foi, e leai se mea leaga o poloai atu ai le tusi, o le manuia mo ia ma lona malo; i le isi itu, o saili ai foi le tupu o Papelonia ia, pe usitai ma tuuaulafo i le mea mai le Atua o Isaraelu.

O le faatonuga la o aumai i le tusi mo sa Iutā o i le tafeaga; o ane e fau fale mautū ma malolosi e nonofo ai, matuā punonou e gagau le vao, ma fai so o se atina’e e lelei ma tatau. Fai aiga ai, ma ia fanafanau ina ia tupu ma faatoateleina le nuu; auā o le manuia i le nuu o latou nofo pologa ai, o lo latou manuia foi lea. Ae fai ma fu’a tauluga o le taumafai, “Le tatalo i le Atua,” ina ia manuia le nuu o nonofo ai, e ala i lo latou tausili ma le filigā, i le mea e sili ma tatau, ua poloai mai ai le Atua ia i latou.

O le itu tāua ia iloa e Isaraelu faatafeaina, ma tagata uma lava; O le ola, e le tatau ona mate i le feagai ma faigatā, e tatau lava ona finau ma la’a i luma, ma le talitonu i le Atua na te mafai mea uma. I le ma lenei, ‘aua nei saga faavāivāia lo latou ola taotaomia, i upu a perofeta pepelo, ma miti sēsē a taulaitu o tou mau faatasi. Faaeteete auā o ā latou tala e ta’u ai le suafa

mamalu o le Atua, a’e le’i auina mai i latou e le Alii. Faatuatua tasi ma usiusitai i le Atua, e pei ona tusi atu, auā o le taimi lava e finagalo ai le Atua tou te toe foi mai i lo outou nuu moni, e leai lava se malosi na te taofia lea mea “O le mea aupito sili lea ma tatau ona latou fai.” Auā o le faailoga lea o lo latou loto atoa i le Atua, e ala i le faatuatua; auā o le Atua lava ia, e finagalo i le manuia ae lē o le malaia.

Tupulaga, o le soifuaga o tatou i ai nei, e tigaina ma lailoa ai, e le faigofie. Ae ‘aia nei faavaivaia tatou e ia faigata, tauivi ma agai i luma ma o outou loto talitonu i le Atua. E faaeaina e le Atua i latou uma o e usiusitai ia te ia, auā o le tasi lena uiga o le salamō, o le fai o le finagalo o le Atua i le loto atoa. O Iesu Keriso foi, na Ia afio mai lava e lavea’i ma faaea i tatou i le taulotoaiga o lo tatou vaivai ona o le agasala, lea ua tatou saoloto ai, e ala i le salamō ma le faatuatua.

GALUEGA FAATINO:

Taliga Fesili – Tali mai i le Sa’o po o le Sese ma tau mai le mafuaaga o lau tali. Fa’aaoga lau Tusi Paia

1. Ana le auina e Setekaia i laua na o ma le tusi, semanū e le talia e Nepukanesa.
Tali: Sa’o (Ona e feagai le tupu ma le tupu, ae le o le Perofeta)
2. E misi loa le tatalo, e fiu e galulue ma fai mea uma , e le manuia lava.
Tali: Sa’o (Na e taua i le f.7)
3. E ala ona le manuia valoaga a Perofeta, ma miti a taulaitu ona o tagata Papelonia latou te le iloa le Atua.
Tali: Sese (E le’o ni tagata Papelonia, o tagata sa Iuta lava, auā na ala foi ona tafea, ona o le lē tonu i luma o le Atua)

4. E leai a se isi mea sili o manatu i ai le Atua mo tagata faatafeaina o lona nuu, nai lo le manuia.

Tali: Sa’o (O lo’o taua i le f.11)

5. E mautinoa lava le toe faafoisia e le Atua o le tafeaga a sa Iuta, pe a toaaga e fau fale ma galueaina le laueleele.

Tali: Sese (O le faafoisia o le tafeaga, o le usitaia lea o mea o faatonu mai e fai, ae ia fai i le loto atoa (faatuatua ma talitonu f.13)

PESE: (Pese ma Viiga 234) Pe a ita tele mai o le lalolagi nei”

A’OA’OGA:

1. E taua le ola tautiga ma finau pea
2. Usitai i le Atua e manuia ai
3. Faaeteete i le au tala pepelo.

.....

ASO SA: 28 FEPUARI 2021

MATAUPU: NA FAIA TATOU MO SE FAAMOEMOE

SINI: A’oa’o tamaiti ina ia latou iloa le taua na faia ai e le Atua tatou i lona Alofa Tunoa.

TUSI FAITAU: Efeso 2: 1 – 10

FESOASOANI MO FAIAOGA:

O le tusi sa tatou faitauina nei, o lona f (10) o lo o taoto ai le fuaitau o auau i ai la tatou mataupu o lenei Aso Sa e faapea; - “Aua o lana lava galuega i tatou, na faia i tatou ia Keriso Iesu, ina

ia faia galuega lelei....” O le faamoemoe lena na faia ai tatou o tagata o le Atua, ia Keriso Iesu; “O le faia o galuega lelei.”

O le galuega lelei sa muai tapenaina e le Atua mo tatou, e ala iā Keriso Iesu. O le uiga lena o le faaupuga, “na faia i tatou ia Keriso Iesu.” Ina ia tatou mafai foi ona fai o galuega lelei mo tupulaga o mulimuli mai ia i tatou (tupulaga atalī). A tatou fai se fesili – “O le a lea galuega lelei sa muai fai e le Atua mo tatou?”

O le tali, “O le Alofa Tunoa.” O le Alofa Tunoa o le Atua e ala ia Iesu Keriso, ua na toe faaolaina ai i tatou faatasi ma Iesu Toetu. O lona toe faatūtūina mai lava lea, ma toe faanonofoina faatasi mai lea o tatou tagata oti i le agasala, ma Iesu Toetu manumalo, ina ia fa’aalia i tupulaga atalī, le faula’i o le Alofa Tunoa o le Atua. Ao le faaolaina foi o tagata faatuatua i lea Alofa o le Atua, e le ona o ni galuega lelei ua faia e tagata le mafuaaga, ae ona o le Alofa Tunoa foai fua mai lava o le Atua ia. O le galuega lelei, o le Alofa Tunoa lea o le Atua ua toe faaolaina ai i tatou faatasi ma Iesu Toetu, ona o tatou sa avea ma tagata oti i le agasala e tusa o le tu masani a le lalolagi, ma sa avea ai i tatou ma tagata faalogogata i le Atua. O le ala lena sa mua’i tapena ai e le Atua le galuega lelei lea e ala ia Iesu, ina ia tatou savavali ai. A tapena se taaloga, e kolēni lelei le au ta’aalo ma sauniuni tagata uma taitoatasi. O ni mea faigaluega aoga, e faamoemoe i ai le manuia o le taaloga. O tatou o mea faigaluega, tagata ua kolēni lelei ma tapena e le Atua e ala ia Iesu, mo galuega lelei ina ia taunuu manuia. Iesu lea na fetalai (Mt 28: 19-20) “O lenēi, ia outou ō atu e fai nuu uma lava ma so’o, ma papatiso atu..... ou te ia te outou i aso uma lava, e oo lava i le gataaga o lenēi lalolagi.” O lo tatou ola e tāua, ona o iai se faamoemoe e aoga i ai i le Tala Lelei.

Tupulaga talavou, o le a lava le mea o e faia ua valaauina iai oe, galue ai ma lou loto atoa, seia e maua le tauī mai le Alii. (Kolose 3: 23 – 24). “O mea uma lava tou te faia, ia faia ma le loto, peiseai ua faia i le Alii, ae le o tagata. Aua ua outou iloa Alii o Keriso.” Auā o le faamoemoe lea na faia ai i tatou uma lava e le Atua, ia faia galuega lelei o ia Iesu, “Le auauna lelei e ma le faamaoni, ina ulufale maia i le fīafia o lou Alii.” Iesu na ia

faia le galuega lelei, ua ola ai tagata uma, o e sa oti i le agasala, a ua toe faatutuina mai faatasi ma Ia i le faatuatua.

GALUEGA FAATINO:

Fa’aaoga lau Tusi Paia, e te tali mai ai i faatonuga ma fesili o tuuina atu.

1. O le upu “outou” o i ai i le f(1) & f(2), o ai o faasino tonu iai?
Tali: (i) O lo o faasino i tagata Efeso o ave i ai le tusi
(ii) O faasino foi i tagata uma lava o le lalolagi, ma ē o faitau i lenēi tusi.
2. O tagata oti o lo o taua i le f (1), o tagata faalogogata lava na o taua i le f (2), pe leai?
Tali: O tagata lava na e tasi.
3. O le a le alofa tele o le Atua o taua i le f(4), na ia alofa mai ai ia i tatou?
Tali: O le Taulaga o le Faaolataga na faia e le Atua, e ala i lona Alo pele o Iesu, ina ia magalo ma faaolaina ai le lalolagi uma, o e salamō ma faatuatua.
4. O le amataga o le f(10)... “Aua o lana lava galuega i tatou, na faia i tatou ia Keriso Iesu.”
(i) O ai e faasino i ai le upu “lana”?
Tali: O le Atua
(ii) Faamatala mai ia malamalama lelei, po o le a tonu le uiga o le fuaitau o vaseina atu i luga.
Tali: O le Atua lava na faia le Taulaga o le faaolataga e ala i lona Alo pele o Iesu Keriso, ma le faamoemoe ia faaolaina ai i tatou, ina ua tatou gauai ma talia, e ala i le faamalosi mai o lona Agaga Paia.

5. O le Alofa Tunoa pe a e faitau i le f(9), e le mai iā te outou lea, ... e le ona o galuega ina nei mitamita se tasi. O le a le uiga o lea fuaitau?

Tali: O le Alofa Tunoa, o le mea foai fua mai e le Atua i lona lava finagalo; Ae le o se tau'i o ni galuega a tagata sa fai. O lona uiga, e le mai ia te outou lea. Auā ana o se tau'i o ni galuega na fai e tagata semanū o tumu tagata i le femitai.

PESE: (Pese ma Viiga 26) “Na fai tagata ua lelei”

A’OA’OGA:

1. E i ai le faamoemoe o le Atua mo ta’ua.
2. E le faatauina le Alofa Tunoa.
3. Toaga e fai galuega lelei.

.....

**MANATU TAIALA MATI & APERILA:
“A SALA UTA, IA TONU TAI”**

O le upu faamuagagana a le atunuu, o faamalosiā mai ai le loto onosai ma le lagona to’afilemu, i taimi e aliaie ai ni faaletonu. Manatua, so o se faiva lava e si’i i tai i le sami, e tapena mea uma o le faiva i uta. A sii la se faiva, a’e iloa ane mulimuli se mea ua misī, ma ua le lelei tapenaina, O le sala la lena po o le mea sese a uta. O le itu taua la, O le tautai ia onosai ma fa’ato’a filemu lona loto, e vaioa ai lona ita, ina nei tutupu ni masei, ae leiloa le taga e fai i le vasa. O le uiga la lena, “ia tonu pea tai”. O lo tatou ola tautua ma le soifua galulue mo le Tala Lelei a le Alii, e lapelapea lava, ona o le tele o o tatou sese ma faaletonu, ao tatou folau i le soifua o fai nei. A o le Atua lo tatou tautai sili, e faapalepale pea lona alofa ma ia onosaia o tatou faaletonu i la tatou malaga.

ASO SA: **7 MATI 2021**

MATAUPU: **E FAIA E LE ATUA MEA SILI**

SINI: A’oa’o tamaiti ia latou iloa ma malamalama lelei, i mea lelei e faia e le Atua mo ona tagata, pe a talitonu faamaoni ia te Ia.

TUSI FAITAU: Ieremia 33: 1 – 18

FESOASOANI MO FAIAOGA:

O le Mataupu lena e 33 o le tusi a le Perofeta o Ieremia, o lo o faaulutalaina mai e faapea; “O le a’e mai o le tafeaga ma le “Afio mai o le Mesia.” O iuleo faatupu faamoemoe ia, ae o mea sili lava foi e faia e le Atua mo lona nuu ma ona tagata, “PE AFAI,” e salamō ma liliu faamaoni mai loto i le faatuatua i lo latou Atua, tusa lava po o i ai i nuu ese. O le a’e o le tafeaga, o le faasaolotoina lava lea o Isaraelu mai lona ola pologa i pulega sauā, e pei ona i ai i Papelonia; ae maise lava le taotaomia o lona ola faa-le-agaga i lona Atua. O le afio mai foi o le Mesia. O le oo mai lava lea o le lavea’iina ma le faolataga a le Atua, mo lona nuu ma ona tagata. Ae o nei mea sili e pei ona valoia mai, o le a taunuu i se taimi o i luma, ae faalagolago i le salamō, ma le faatuatua faamaoni i le Atua.

O nei mea sili ua folafola mai, o lo o muai faamautu mai lava i le amataga. Na o le Atua lava ma Ieremia. E ui o lo o falepuipui le perofeta, o lea ua faailoa faalua mai le Atua iā ia. Na o oe Ieremia e valaau i le Atua, ona tali mai lea o le Atua ia te oe. O le tafeaga na mafua lava, ina ua le faamaoni Isaraelu i le Atua i la latou feagaiga sa osia ma Ia. Ona foliga mai ai lea, o le nuu o Iuta, ma ala i Ierusalemā le aai paia, ua gaogao ua leai ni tagata ma ni manu o ola ai. Ua matagā ma faatafunaina, ua le pei o se nuu na filifilia faapitoa e le Atua mo Ia, ina ua faatafeaina. Peitai, o se vaaiga uiga ese lea i le taimi e toe a’e ai le tafeaga, e le gata

o le a toe faatagataina le aai, ae o le a lagona ai foi le iuleo fiafia e pei o le faatoa nofotane ma le faatoa faiava. Ae maise lava le suiga tele, i lo latou iuleo vivii ma alalaga e tautino lo latou Atua moni, i le faapea ane; “Ia outou vivii atu i le Alii o au, aua e lelei le Alii, e faavavau lava lona Alofa.” O loto ua tautino le moni o lo latou Atua, o loto lava ia ua tapena mo le afio mai o le Mesia lo latou tupu. O le toe fa’aatoatoaina foi o Ierusalem, e le ona o la latou tagi ma le alalaga atu i le Alii, ae o le fuafuaga lava a le Atua. Pe manatu foi Papelonia i lona malosi, e le suia ai le fuafuaga a le Atua mo ona tagata, pe a fa’aatoatoaina ona aso. O le amiotonu a le Atua, e feliu’iina pea e lona Alofa. O le mea sili lea e faia e le Atua mo ona tagata e pei ona tau atu e le Perofeta. O le ola i le filemu o le Atua, ma le Alofa o Iesu Keriso, e pei ona ia faia ai le faaolataga mo tagata uma. E ta’ua foi le Alii e lona nuu, “O LE ALII LA TATOU AMIOTONU.” Tupulaga talavou, o le ute lenā o le olaga. Fai mea lelei, ma ola i le faamaoni i le Atua, faapei foi o Iesu, sa usiusitai ma faamaoni i lona Tamā, ua tatou ola ai.

GALUEGA FAATINO:

Faitau lelei ma fa’aaoga lau Tusi Paia, i le Taliga Fesili

1. A e faitau lelei le f.5; o ai o faasino i ai le “latou” mulimuli lava?
Tali: Faasino i le nuu o Iuta.
2. O le taua lea e tāua i le f.4 faasolo ifo i lalo, o ai o loo ‘au ma le Atua o Isaraelu?
Tali: O loo ‘au le Atua o Isaraelu ma Kaletaia.
3. O le taua lea na fai, ina ua uma, pe le i alu le tafeaga?
Tali: E le i alu. O le taua ā lea na toilalo ai Iuta, ma ave faatagata o taua ai loa (tafeaga)

4. Aisea e fefefe ai tagata, pe a faalogo i mea lelei e faia e le Atua ia Iuta, f.9?
Tali: E fefefe ona o le ofo i le matautia o le mea e faia e le Atua. Aua sa pologa nei ma matitiva ma tuulafoa’iina, a o lea o le a sii e le Atua i luga ma faamanuia i ai, i mea sili e le mafai e se isi malosi ona fai faapena.
5. (a) O le a le upu manaia a le au fai-taulaga, i latou o vivii ma faaneenee i le Alii?
(e) O le fuaiupu e fia o i ai ia upu?
Tali: “Ia outou vivii atu i le Alii, aua e lelei le Alii, e faavavau lava lona alofa.”
O le f.11

PESE: (Pese maViiga 35) Le toto paia o lo tatou Alii....

A’OA’OGA:

1. E taua le salamō faamaoni
2. O le Taulaga Faaola, o le mea sili na faia e Iesu mo tagata uma.
3. O puapuagā, e luitauina ai le faatuatua.

.....

ASO SA: **14 MATI 2021**

MATAUPU: **‘AUA LE TU’UAVANOA I LE TIAPOLO**

SINI: A’oa’o tamaiti ia latou iloa, o le mea leaga ma sēsē e manatu le tagata e fai, o le faailoga lena o lona tuuavanoa i le tiapolo.

TUSI FAITAU: Efeso 4: 25 – 32

FESOASOANI MO FAIAOGA:

O le vaega o le tusi sa tatou faitauina (f.25-32) o faatatau i ai la tatou mataupu; “’Aua le tuuavanoa i le tiapolo,” o faavae mai i le lapataiga a Paulo o iai i le f.27 – “’Aua foi nei tu’uina atu e outou se mea e mautū ai le tiapolo.”

O satani, po o le tiapolo, o le malosi lea lua te fetaiiai, pe lua te tau lava i aso uma. O le malosi na te mafai ona feliiua’i ia lava, ma toe fau ia i le mea e loto iai. O lo o ta’u mai le Tusi Paia, e mafai e satani po o le tiapolo ona liliu ia lava, e avea ma agelu o le malamalama (II Korinito 11: 14) O lona lava naunautaiga, o le taumafai e gaoui, fasioti, ma faaleaga, (Ioane 10: 10). Na te lepeti le filemu o lou mafaufau! Na te faaleaga lou taunuuga manuia! Na te faaleaga ou faiā ma le nofo lelei ma isi!. Ma le anoanoa’i o isi amio a le tiapolo. O le tusi atu a Paulo i le Ekalesia i Efeso, ma i latou uma foi e oo i ai lenei timaiga; o le fafagu ia nofo sauni ma mataalia i taimi uma i le matautia o le tiapolo.

O le pepelo po o le fai o le tala sesē e le sa’o, o le faailoga o lo o ia te oe le tiapolo. Tuu ‘aua le faia, ae fai tala moni ma faamaoni i le talitonuga, o outou uma lava o le tino e tasi, e tatau ona lelei ma maopopo faatasi. E le o fai mai i le Tusi faitau, e le tatau ona e ita, ae o le uiga o le fautuaga; ‘Aua nei avea le ita ma ala e sesē ma agasala ai. Taumafai ia uma le aso ua tea lo outou ita; auā a tumau ma outou ita pea Efeso, o lo outou tatalaina pea lena o outou loto e faamautū ai le tiapolo. O le gaoui foi, o le leaga, o le tiapolo lava lea. E le tatau ona fai, ae onosai ma faamalosi e galue, ona selesese mai lea o fua o au lava galuega; e le gata e fialia ai, ae tufa atu foi i e matitiva, o se itu sili lea ona lelei. O le aotelega lava la o le manatu o le Aposetolo, ‘aua le tu’uavanoa i le tiapolo, ona o le pogai lena o lo tatou leaga, ma ala ai foi ona avea i tatou o ni tagata e faatigā i le Agaga Paia

Taumafai e faatoilalo le tiapolo; ‘aua e te fefe pe palaai ai. Fai mai le fai Salamo (121: 7) – “E faasao ma lavea’i oe e le Alii mai leaga uma lava, e leoleo mai o Ia i lou agaga.”

‘Aua e te tuua i le tiapolo se avanoa, po o se nofoaga mo ia. O a’oa’oga a le Tusi Paia, aemaise le Feagaiga Fou, e leai se avanoa

o satani po o le tiapolo i lou ola, vagana ua e tatala iai le faitotoa ma tu’u avanoa i ai. O le nofo tupu o Iesu Keriso i lou loto, o le iai lava lea ia te oe o le Agaga o le Atua.

Taumafai malosi lava, ia nofomau le Agaga o le Atua i lou tagata. Afai e le mafai, o Iesu na fetalai – A alu ese le agaga leaga i le tagata, ona alu lea i le toafa e saili se malologa mo ia, ae le maua. Ona faapea ifo lea o ia; Ou te toe foi atu i lē sa ou sau ai. E sau le agaga leaga ua tuufua, mamā ma lelei lona nofoaga sa iai muamua. Ona saili ai lea e le tiapolo isi agaga leaga e to’a fitu, e sili atu lo latou leaga i lo ia, ona latou ulu uma lea i lea tagata ma nonofo ai. Ona sili atu lea ona leaga o lea tagata, nai lo le mea sa iai muamua (Mt 12: 34 – 45).

O le ala sili lava, e vaioa ai mea leaga ua amioa’i ai, ma fai ma masani; O le suia lea i mea lelei. O le ala sili e faatoilalo ai satani, o le avea lea o Iesu ma Alii i lou ola. Tupulaga o teine ma tama talavou. O la tatou motto lena faa-talavou, “O le Ola ia Keriso,” Le na Ia faaola tatou pe a faatuatua.

GALUEGA FAATINO: Fautuaga Tususia

O Simi, o loo tali ana malo, ua fia tausasami malo i se faalifu fa’i, ae leai ni fai o Simi, e leai foi se tupe e faatau ai. O lo o pula mai le togafai o lona tuaoi. O lo o tau sema se avanoa o Simi i le togafai o lona tuaoi, ae e alu atu loa. Ua e iloa nei le faafitauli o Simi. Tusi lelei mai i lalo lau fautauga lea ua fai ia Simi; o le fautuaga e lavea’iina ai Simi mai le oo atu i nisi tulaga faigata, ma lavea’iina ai foi o ia mai le osofaia e le tiapolo.

PESE: (Pese ma Viiga 368) Fai mea tonu...

A’OA’OGA:

1. Ia tau lava o Iesu e afio tumau i lou loto.
2. Fai mea e fialia mai ai le Alii.
3. ‘Aua e te faatiga i le Agaga Paia.

ASO SA: *21 MATI 2021*

MATAUPU: *A VALE LE TOFA, UA MALAIA LE NUU*

SINI: A’oa’o tamaiti ia latou iloa, e le faa-le-Atua loa se faaiuga e fai, ona sesē loa lea, ma toe aafia ai lava i latou.

TUSI FAITAU: I Nofoaiga Tupu 19: 1 – 15

FESOASOANI MO FAIAOGA:

E le faatonua lau susuga, ae ou te manatu e faigofie la ta galuega, pe a faamalamalama ma faafaigofie muamua le ulu-mataupu. Ta’u i tamaiti, o le upu “vale”, o lona uiga o le sēsē, po o le le sa’o; ma le upu ‘tofa’ o lona uiga o se faaiuga fai po o se mea ua finagalo i ai. O le uiga faigofie la lena o la tatou mataupu o faapea mai, “A sese le faaiuga e fai, ua malaia foi tagata.” A manino loa tamaiti i le ulu-mataupu, la’a loa i le tala.

Sa toafilemu lava ma lelei le va nonofo ai o Tavita ma lona malo o Isaraelu, ma Na’asa foi ia ma lona nuu o Amoni. O le maliu o Na’asa, na seei ane ai lona atalii o Anuni i le nofoa e sui lona tamā. Sa manatu Tavita, e fa’auau pea lea fealofaniga ma Amoni, ona o Na’asa. O le ala lena na auina ai e Tavita le savali ia Anuni, e faamatala loto ma faalototele, ma ia faatumau pea le mafutaga lelei, ona o si ona tuua ua mavae. Peitai, e lei tali mai Anuni i se lelei i le savali na alu atu, ae ua ia lotelote le au o le fatu o Tavita. Auā o le tuualalo sesē a alii o lona nuu, faatasi ma lona foi manatu mimita ma faualuga, o lea na ia fai ai le mea leaga i le savali na alu atu. O le sele mamā faamalosi o ‘ava a tagata o Tavita na o atu, o se faalumaina i le tu faa-Isaraelu, ona o la latou lea masani, o le faaola o a latou soesā. I le ma le isi faiga matagā, o le sesele ese lea o ofu i totonu, ae telenonoa ai mai tapuvae, e oo ae i o latou nofoaga. Na maua e Tavita le tala i le

mea ua fai e Anuni i ona tagata, ona ia poloai lea e nonofo i Ieriko, seia toe tutupu a latou soesā, ona o atu lea.

Ua logo tala Anuni ua lē fiafia Tavita, i a latou, ona ia fa’aalu lea le oloa tele i isi malo, e le gata e faatau mai ai mea-tau o le taua, ae tofogi ai foi isi vaegaau, ina ia fesoasoani iā ia. Ua tatou iloa le iuga o le tala sa faitauina. Sa faifai tetele le fasi a Tavita ma Isaraelu i vaega-au a Amoni ma Suria sa fesoasoani ia te ia. Mulimuli ane, o lo o fa’auau le tala lena i le Mataupu 20, o lo o taua ai, na matuā toilalo popo ai Amoni ia Tavita, ma avea ai lava Amoni ma pologa tumau a Isaraelu. Ma o le taunuuga lea o le tala e tusa o la tatou Mataupu; O le vale po o le sesē o le faaiuga po o le tofa a le tupu o Anuni, lea ua toe malaia ai lava ia faatasi ma ona tagata. Sa tatau ia Anuni, a iloa ua sesē lana mea ua fai i le savali na alu atu, ma ua iloa ua ita Tavita; sau e saili se faamagaloga mo ia mai ia Tavita, ma fai se leleiga. Ae lē o le mimita ma faualuga, ae aliali ai lona valea. Aua ana potu, na te le manatu faapena, o se faamoemoega leaga o alu atu ai le savali. O le tāua foi lena o le sailiili lelei pea o mea uma.

Tupulaga o tama ma teine, o se a’oa’oga taua tele lea mo tatou. ‘Aua le ave sesēina i ō tatou lava manatu ni mea lelei o manatu i ai isi tagata. O Iesu foi, e ui a ina oōna le ipu ma inu gatā, na te lei manatu lava e sēsē le mea o finagalo ai lona Tamā. Auā o le Faaolataga lea ma le leleiga mo tagata uma.

FAAMATALAGA FAAOPOPO:

(Fesoasoani atili mo le silafia o le Faiaoga)

AMONI: O le nuu o Amoni, e tuaoi i Sasae ma Isaraelu. O le amataga po o le tupuga mai o lena nuu, e palapala, pe ou te faapea atu foi, e matagā. E tupuga mai Amoni i le tagata e igoa ia PENAME (BEN-AMMI). O le atalii o Lota mai i lona lava afafine laititi (Kenese 19: 30 – 35) O le fili tumau o Isaraelu, ma o le vaitaimi o faamasino, e faapea o le taimi lena o le tau tumutumu o le malosi o Amoni. O Tavita la le uluai taitai o

Israelu, sa ia olopalaina Amoni, ma le toe mafai ai lava ona latou toe faatupu se vevesi mo tausaga e tele.

Uiga o Upu ma Fuaitau:

- i) faamatalaloto (f 2) - faalototele ma faamafanafana
- ii) agaaga (f 3) - tofotofo/suesue
- iii) aau ese (f4) - tutuli ese/toe faafoi i le mea na omai ai
- iv) taleni (f 7) - o tupe
- v) faaoloatauaina (f7) - fa'aauppegaina ai mo le taua

GALUEGA FAATINO: Taliga Fesili

- 1. O le fuaitau faa-Samoa; “A sala uta, ia tonu tai, o ai o faatatau i ai uta, ao ai foi o faatatau i ai tai, pe a fua i le tala.
Tali: O uta e faatatau i alii o le nuu, ao tai e faatatau ia Anuni le tupu.
- 2. O le pogai o le maumau o tupe, le malosi, ma le tele o ola, ona o ai?
Tali: Ona o Anuni le tupu.
- 3. O ai igoa o le au uso sa faamoemoe i ai Tavita i le taua?
Tali: O Apisai ma Ioapo
- 4. O le a le pogai tonu lava o le taua?
Tali: O le pogai autu lava, ua avesēsēina e Anuni ma alii o le nuu, le savali na alu atu ia Tavita,
- 5. O a uiga na aliali mai i le tupu o Anuni, na iloa ai lona faamaualuga ma le le magafagafa?
Tali: O le faamaualuga: E iloa i le mea leaga na ia fai i le savali ua auina atu e Tavita.

PESE: (Pese ma Viiga 137) “Le faaola e ua ou sau nei..”

A’OA’OGA:

- 1. O le faamaualuga, e le o se mea faa-le-Atua.
- 2. ‘Aua le aveseseina manatu o isi tagata.
- 3. O le faamaualuga, e tua i le filemu ma le lavea’iina.

.....

ASO SA: **28 MATI 2020 (ASO SA LAUPAMA)**

MATAUPU: **E LEI TALIAINA E TAGATA UMA LONA AFIO ATU**

SINI: A’oa’o tamaiti ia latou iloa, uiga ma lagona o tagata, sa aliali ai lo latou teena o Iesu ma lona afio atu i Ierusalema.

TUSI FAITAU: Mataio 21: 1 – 17

FESOASOANI MO FAIAOGA:

O le Aso Sa o le Laupama le asō, o faamanatu ai e le lalolagi Kerisiano le malaga faatupu a Iesu i Ierusalema. Ua tatou iloa le taunuuga o le vaiaso paia lenei, na tualuga i le maluu ma le toe soifua manumalo mai o Iesu mai le oti ma le tuugamau. O le Taulaga faaola mo le lalolagi uma, a o le tino lena o le Alofa Tunoa o le Atua.

O la tatou mataupu o le asō, na ona tatou vaai i ala eseese, sa fa’aalia ai le teena e tagata o Iesu, a o afio atu i Ierusalema. A tatou iloa, o iina tonu e a’oa’o ma faatonutonu mai ai la tatou folauga o fai nei; pe se a e tatau ona tatou fai? Se a foi e tatau, ma mafai ona tatou faia mo isi? O le taua sili lava lea mo tatou! O le talituaalimaina o le afio atu o Iesu e tagata o na aso, e a’oa’o mai mo tatou ma tupulaga o le lumanai, le mea e tatau ona fai, ina ia saga tupu pea ma ola le Tala Lelei ia Iesu.

Na amata i le alalaga, “Osana, ia manuia le afio mai i le suafa o le Alii...” O le iuleo o fa’aalia ai lagona o le amanaia, ma tautino ai le mamalu o Iesu; Faatasi ma le tino matagofie o la latou alaga, e ala i la laau ma o latou ofu sa fola ai le ala sa afio atu ai le Alii. Afai o latou lava nei sa toe fesili (f 10) – “Po o ai ea lenei?” O lona uiga, e le o mautū lo latou talitonu ma le faatuatua i le Alii. O le itu la e matuā tatau lava ma moomia, o le faatuatua moni.

O le afio atu o Iesu i Ierusalem, o le autu lava e tasi e pei ona gasolo atu ma tumutumumu tagata i le aai, mo le faamanatuina o le Paseka. O le sauniga e paia, o faamanatu ai le alofa lavea’i o le Atua i lona nuu ma ona tagata. O le agaga o le fegalegalea’i ma le alofa feofofoai o tagata uma; ae lē o se avanoa e aliali ai lē le alofa, ma sue ai le mea- faasili a le isi i le ola o le isi uso, aemaise nai tagata o nuu ese omai mamao i le faamoemoe. Le ala lena o le inainā o Iesu ma ia tutuli tagata, ma faapea atu - “Ua tusia - E ta’ua lo’u fale, o le fale tatalo, a ua fai e outou ma ana o e fao mea.” So o se faatinoga e aafia ai le ola tapuai o tagata i le Atua, e tatau ona tuu ma ‘aua le faia.

O le faamaloloina e Iesu o ē mama’i, tauaso ma pipili, lea na mafua ai ona latou alalaga, i le iuleo faaeaea i le mamalu o le Alii, “Osana i le alo o Tavita.” Ae na tupu ai foi le ita o tusiupu ma le au ositaulaga. Sa latou fesili tofotofo ia Iesu – “Ua e lagona ea a latou upu?” O le fesili e le gata latou te le talia Iesu o se tupu, ae taulamalama foi, faatasi ma le ita, ona ua manumaloina e Iesu loto o le to’atele. O le tali atu a Iesu, o tau atu ai i ia tagata – E oo a i tamaiti faatoa fananau mai o la e fesuisi, ua leva ona latou iloa ma ta’uta’u le paia o le Alii. A o outou ua leva ona outou ola, tou te le iloa lava, ona e leaga o outou loto, ma le au faatuatua i le Atua.

Tupulaga, ina nei tatou alalaga foi e tautino o tatou o tagata Kerisiano, ae o tatou teena foi le Alii i o tatou loto. Ae o le aoga lea o le aliali o le tetee o ia tagata i le taimi o Iesu, e faatonutonu folau mai i lo tatou foi ola e fai nei. Ia mausali lo tatou faatuatua, ma ia faamaoni la tatou alalaga e tautau lona mamalu silisili ese. Fai so o se mea lelei ma tatau, e lē vaoia, pe faalavelaveina ai le

ola tapuai o tagata i le Atua. Tatou talia ma le loto talitonu faamaoni. O Iesu o le Tupu, o Ia o le Alofa Tunoa o le Atua mo le lalolagi uma, e ala i le Faaolataga sa Ia faia.

GALUEGA FAATINO: Taliga Fesili

(O fesili e lautele, e mafai ona e fa’aaoga le Tusi Paia e tali mai ai, lou malamalamaaga i le mataupu sa faamatala; atoa foi ma lou iloa i le soifuaga lautele faa-le-faatuatua)

1. So o se solaaga a pagota mai le falepuipu, o le faailoga o le latou teena o Iesu. Faamatala lelei mai le fesootaiga o le solaaga ma lo latou teena o le Alii, pe a fua i le faasalaga na mafua ai ona falepuipui.

Tali: O le faa-falepuipuiina, o le iuga aloaia lea a le faamasinoga, ua talia aloaia, e fai ma ala e aoa’iina ai, ma toe foi mai i le lelei o le Alii, ina ua maea le faasalaga ma ua salamō. Peitai o le sola ese, o le faailoga o le leai o se salamo, ma na te le o talia foi le Alii o faatali atu.

2. O ai tonu tagata ia na alalaga, “Osana” E moni la latou valaau ma latou talia le Alii?

Tali: O e mama’i, tauaso ma pipili sa faamalolo e Iesu (f 14&15)

3. O le ala lea na malaga atu ai Iesu, na ui atu i Perefake, ma le nuu e lē o iloa le igoa sa nonoa ai le asini, ona oo ai lea i Ierusalem. O fea tonu la o tu ai le mauga o Olive o taua i le tala?

Tali: E tu le mauga o Olive i Perefake.

4. A e faitau lelei i le f 2-4 o le tusi faitau, na fai ane e se isi se upu i so’o na o atu e aumai le asini pe leai?

Tau mai se faaupuga po o se upu o i le tusi faitau, e faamaonia ai lau tali!

Tali: (i) E mautinoa na fai ane!

(ii) E mautinoa na fai ane, ona o loo taua mai i le f 4 –
“Ua oo nei mea uma.”

5. O le a se feau po o se faailoga o ta’u mai e le asini na tietie mai ai Iesu, pe a fua i le tele o isi auala taua ma mamalu sa tatau ona fa’aaoga e le Alii e malaga mai ai?
Tali: E ta’u mai e le asini o le manu filemu ae malosi, O Iesu o le tupu sili, ae afio mai i le ala maualalo ma le toafilemu.

PESE: (Pese ma Viiga 235) “Le Alii e, le Atua”

A’OA’OGA:

1. E a’oa’o mai mea sa tutupu i la tatou savaliga o fai nei.
2. Ia salamō faamaoni mai ou sesē.
3. E le vaoia le Alii e se malosi.

.....

ASO SA: **4 APERILA 2021**
(ASO SA O LE TOETU)

MATAUPU: **SUFI E LE PEPELO LE MONI O LE TOETU**

SINI: A’oa’o tamaiti, ia latou iloa, so o se mea lelei ā ma moni, e taumafai a le tiapolo (pepelo) e faaleaga ma faasesē.

TUSI FAITAU: Mataio 28: 1 – 15

FESOASOANI MO FAIAOGA:

O le foafoaga paia na faia e le Atua, ma le taaviliga o mea o le soifuaga o tatou i ai nei; o lo o iloa ai, e tuu-faafeagai lava mea uma. Faataitaiga; Mauoloa ma le mativa; loloto ma le papa’u;

malosi ma le vāivāi; sou ma le malū; ma le tele lava. O le telē ia o le tāua o lenei faiga e le Atua o mea; auā o le faafeagai lea, o i ai le lapataiga faatasi ma le luitauina. O le mataupu foi la i le “Toetu” o Iesu, o le mea moni lava na faia e le Atua i lona lava mana, mā na o Ia lava; ae ua taumafai foi le tiapolo, e faasese ma ta’ulēmoniina.

Ona o le Toetu manumalo mai o Iesu mai i le oti, o mea e patino i le mana o le Atua, ma lona lava finagalo alofa i le lalolagi, e le mafai la ona agaia e se isi lava malosi, pe taumafai le tagata i lona poto e fai se suiga, leai o le Toetu a ia, o le Toetu! O le Toetu foi mai le oti, o le mana o le Atua lava i lana pule ma lona mana, e mafai ona ia faia. O faamaumauga a le Au-fai-Evagelia, atoa ma tinā ma isi sa i ai i le faasatauroina o Iesu, o molimau ola ia i lona Toetu Mamalu, pe afai ua leo i ai o Ia i le tuugamau. E tele a molimau e pei ona tatou faitau i le Tusi Paia, ma mafaufau i le mana o le Atua e ala ia Iesu, a’o soifua e lei oo i lona maliu. O le isi molimau ola lava, ona e le o se mea na tupu faafuasei lona maliu ma lona Toetu mai manumalo; sa muai ta’u atu e Iesu i ona soo ma le toatele, E tuuina atu o Ia i lima o tagata agasala, latou te fasioti foi ia te Ia, ae toetu mai i le aso tolu. Lea la ua oo i ai, ma ua taunuu lava, ao lea foi ua toe vevesi. O tagata i le Lotu Iutaia, i latou e iloga ma taitai; Ua leva lava ona latou teena le Alii ao gasolo lana galuega. Sa latou tu’uaia solo Iesu, i le tele o mea ua aliali ai lona tulaga Atua, e ala i vavega ma mea mamana sa Ia fai. Lo latou ita lea, na iu lava i lo latou fasiotia ai o le Alii. O lea la ua Toetu mai Iesu, a’o lea foi ua toe fafau lea auala leaga e faasesē ai le mea moni. O tupe foi ma le tala sese ua latou fatu fua, e le o i ai se faamaoniga, ae o le uiga lava lea o le tiapolo, po o le pepelo, na te tauanau lava ma sufi tagata, ina ia aveseina le mea moni, e uiga i le Toetu o Iesu. O le Toetu foi o Iesu, o le ogatotonugalemu lea o lo tatou faatuatuga faa-Kerisiano. Ae o le Atua lava Ia, e le mafai e le pepelo ona manumalo ai. Tupualga. ‘aia le fiafia tatou i lea mea, ae maise lava mataupu e uiga i le Alofa faamaoni o le Atua.

GALUEGA FAATINO: Taliga Fesili

1. O ai tagata na muamua lava fetau ma fafine o taua i le tala?

Tali: O le Agelu.

2. O le f 6, i le fuaitau; “auā ua toe tu mai o ia, pei ona fetalai atu ai o ia.” O fea e faasino i ai lea fuaitau?

Tali: E faasino i le tautinoga a Iesu na fai i ona so’o, “E tuuina atu o ia ma fasiotia, ae toetu mai le aso tolu.” (Mt 16: 21

3. O le a sou silafia i tagata o taua i le f.4; O ai ia tagata, a’o le a la latou mea sa fai?

Tali: O leoleo o le falepuipui, o nisi o latou ia na o ta’u Iesu ua le o i ai i le tuugamau i osituaalaga sili.

4. O le mafuie o ta’ua i le tala, o le faailoga lea na mulimuli mai se galulolo (Tsunami) i le mea na tanu ai Iesu pe leai?

Tali: Leai! O le mafuie lava ia, o faailoilo o le afio ifo o le Agelu; ae mafai foi ona faapea, o faailoilo o le Toetu mai o Iesu. Ae le gata i lea, e mafai foi ona faapea, na galulu ma gatete le lauelele, ina ua fuliese e le Agelu le maa mai le gutu o le tuugamau.

5. Faamatala mai le uiga moni o lagona e tinā ia na o i le tuugamau o ta’ua i le f.8?

Tali: Fefefe lava ona o le mea ua tupu, e o atu ua leai se Iesu, atoa ma vaaiga ua fetai ai ma la’ua; e pei o le fuliese ole maa, ma le tagata o nofonofu ai. Ae o le fiafia foi, ina ua tau mai e le tagata o nofonofu i luga o le maa, ua Toetu Iesu!

PESE: Pese 51 “Sauni ia le pese fou, ua toetu mai Iesu”

A’OA’OGA:

1. O le Toetu o le fatu lea o le Tala Lelei.

2. O le Toetu manumalo, o le Alofa Tunoa lava lea o le Atua.

3. E leaga le pepelo.

.....

ASO SA: **11 APERILA 2021**

MATAUPU: **FASIOTI E SAULO, FAITAUAGA UMA O NOVE**

SINI: A’oa’o tamaiti ia latou iloa, e lafoa’i loa e le tagata le Atua ma ua le toe ‘au ma Ia, ona le manuia lea so’o se mea na te faia.

TUSI FAITAU: 1 Samuelu 22: 6 – 19

FESOASOANI MO FAIAOGA:

O Saulo, o le uluai tupu lava lea o Isaraelu, na filifilia ona o le mana’o o tagata o le nuu, ae le o le finagalo o le Atua. E lei leva ona avea ma tupu, ae toe saeesea loa le malo, ma tuuina atu loa ia Tavita. (Faitau 1 Samuelu 15 & 16 mo suiga o taua i luga). O Tavita ina ua uma ona faauuina e Samuelu e fai ma tupu, e le o fa’aalia lava sona lagona, po o sona uiga o ia o se tupu, ona e ava ma fa’aaloalo ia Saulo, ona sa tofia aloaia foi o ia e avea ma tupu o Isaraelu. Peitai, o le uiga āva lea o Tavita ia Saulo, ua le gata ina ia manumaloina ai loto o tagata, ae ua alofagia ai foi o ia. E tele lava mea na tutupu, sa atagia ai le moni o le upu a Samuelu ia Saulo; “Ua e lafoa’i le Afioga a le Atua, o lea ua lafoa’i ai o ia ia te oe ia le fai ma tupu.” (1 Sam 15: 23ff). O Saulo foi ua iloa gofie i le tele o mea na te faia, ua le o ia te ia le Agaga o le Atua, ma ua maua i le uiga o le masalosalovale, atoa ma le itaitagofie.

O uiga fa'aalia ia o Saulo ia Tavita, ua oso ai le alofa o Ionatana lona atalii ia Tavita; Ua le gata ina osiosi la laua faigauo mamae, a'e ua fesoasoani foi Ionatana ia Tavita i le tele o mea, ina ia faasaoina le ola o lana uo, mai le sauā o lona tamā. A'ō fetulinai pea la e Saulo Tavita, na alu ai Tavita i le tasi aso i le nuu o Nove le igoa, ma pepelo i le ositaulaga e igoa ia Aimeleka mo se fesoasoani mo ia, ae pasese o le feau a le tupu. Ona avea lea i ai e le faitaulaga areto mo meaai, ma le pelu (pelu a Koliata) e fai ma ana auupega. E fai le feutagaina lea a Tavita ma Aimeleka, o i ai le auauna a Saulo e igoa ia Toeka. (1 Samuelu 21: 1ff)

O Toeka lea na alu ma le tala ia Saulo, e uiga i le feiloaiga lea a Aimeleka le faitaulaga sili ma Tavita. Na matuā ita tele Saulo ma aami Aimeleka, ma le aiga uma o lona tamā, aua o faitaulaga uma i latou. Ua latou omai, ona sutesue lea e Saulo Aimeleka. Na faafiti le faitaulaga la te le'o 'au ma Tavita, ae na ia ave i ai mea o taua (areto & pelu) ona sa ta'u atu e Tavita, o le poloaiga a le tupu, o Saulo lea. E sa'ō lava le faitaulaga, ona na te lei iloa, o le pepelo a Tavita; Peitai, ua avea le ita faamoemoe o Saulo ia Tavita, ua ia faatonu ai Toeka lana auauna pule, e faisotia Aimeleka ma faitaulaga uma o Nove e toa valusefulu ma le lima, fasiotia uma ma tagata ma manu! O fea faufautua a le tupu? O fea alii ma toelaiina o le nuu? E leai sa latou upu fautua i lenei mea matautia ua fai? Atonu o le faataunuina o lenei mea matautia, e fai ma auala e ta'u atu ia Isaraelu uma; "E le finagalo le Atua i ala faa-tiapolo e saga faaolaola pea i totonu o le nu'u." E le o tautino maia e puipui e le Atua tagata lelei mai le tiapolo; ae o tautino mai, e faatamaia le tiapolo ma leaga uma i le lalolagi. O lenei faaiuga leaga ma le lē manuia sa fai e le tupu, ona ua le 'au lona loto ma le Atua o manuia ma mafauauga lelei.

GALUEGA FAATINO: Taliga Fesili

1. O lau faitau i le f.7-8, o ai tagata ia e ita iai Saulo?
Tali: O Tavita ma Ionatana.

2. E sa'ō na sauni Ionatana ma Tavita e o e tau ma Saulo pe leai, sei faamatala mai sou iloa?

Tali: E leai, e lei sauni e fai se taua. Ae o la laua faigauo ua mafanafana, sa na ona talanoa i ni ala e faasao ai Tavita.

3. O le f. 7-8, o lo o iloa ai o auauna a Saulo o sa Peniaminā, o le nuu foi lea o Saulo. Ao Tavita e sau mai Iuta le ituaiga tuaoi. O le a le uiga moni lava o le manao o Saulo, pe a fua i fuaiupu ia e 2?

Tali: E moomia e Saulo le lagolago a tagata o lona nuu (ituaiga) ina ia tumau pea o ia i le nofoalii!

4. Aiseā ua fai ai e Saulo lea faaiuga matuia, a'ō tagata lava ma ana faitaulaga lea ua ia toe fasiotia?

Tali: A fua i le molimau a Toeka; ai ua manatu Saulo; o Aimeleka (faitaulaga) Tavita ma lona atalii, o tutu faatasi e foua ia i se taimi.

5. O ai le pogai autū lava o lenei faalavelave ua tupu? Tau mai le fuaiupu o le Tusi faitau, e te iloa ai?

Tali: (i) O le pogai o le faalavelave o Tavita.
(ii) O le fuaiupu e 9

PESE: 221 “Talofa lava ia i latou,....”

A'OA'OGA:

1. Faamuamua le alofa e lavea'iina ai le ola.
2. O le fasioti tagata o le agasala.
3. E leaga le faitala.

.....

ASO SA: 18 APERILA 2021

MATAUPU: FAATĀUA MEAALOFA MAI LE ATUA

SINI: A’oa’o tamaiti ia latou iloa lelei, le tāua ma le tatau ona fa’aaogaina lelei, o meaalofa faa-le-agaga ua foaiina e le Atua mo tatou.

TUSI FAITAU: 1 Korinito 12: 1 – 13

FESOASOANI MO FAIAOGA:

O la tatou mataupu o lenei Aso Sa, o faatatau i mea alofa faa-le-Agaga ua tuuina mai mo tatou, po o taleni lava ia ma agavaa ua maua, a ia fa’aaogaina e auaua ai i lalo o le faasinoga a le Agaga o le Atua. Ua tatou iloa i le soifuaga o tatou i ai nei, e tele mea alofa, ma e eseese foi mea alofa a tagata taitoatasi ua foa’iina mai le Atua. O isi foi tagata e sili atu nai lo le tasi le mea alofa o iai. O le manatu o le Aposetolo e tusa o le lisi o meaalofa faale-Agaga o i ai i le Mataupu e 12, e le sili atu le tāua o le isi mea alofa nai lo le isi. O mea alofa uma lava e mai le Agaga Paia, o lo latou mafuaaga faapitoa lava, o le fausiaina lea o le tino o Keriso, o le Ekalesia lea, ina ia mausali ma ola. O le taunuuga manuia o le fa’aaogaina lelei ma le tatau, o le mea alofa o ia te oe ma a’u foi, i le manatu o le Aposetolo; Ina ia viia ai le Atua, ae le o le sailia ai o le ta tulaga mamalu ma le tamaoaiga. O lona uiga pe a toe faamatalaina faalautele, o le punou e galue ma le faamaoni, e fa’aaoga le potu po o le malosia ua foa’iina ia te oe, seia oo lava ina faaiuina, mo le manuia o le Ekalesia lautele. O la Iesu, (Ioane 17: 4) – “Ua ou tu’u atu le mamalu ia te oe i le lalolagi; ua ou faaumaina le galuega na e tuuina mai ia te au, ou te faia.” O la le Aposetolo foi o Paulo i ona toe taimi; (II Timoteo 4: 7) “Ua ou tau le taua lelei, ua iu ia te au le tausinioga, ua ou taofi i le faatuatua.”

O le Tusi lava ia o le apoapoaiga a le Aposetolo i le Ekalesia i Korinito, ona o nai faaletonu ua aliali mai, talu tagata ua latou faavasega ma fefaatusatusaa’i o latou agavaa ma aoga, ma ua avea ma ala e vevesi ai le Ekalesia. O le gagana foi e fa’aaoga e uiga i mea alofa, o le a le afaina lea, ona e faigata ona tatou auiliiliina, poo a tonu ia tiute taitasi. Peitai, ua na o le taua o fia aumai mo i tatou, e faatonutonu folau foi i lo tatou ola galulue i le Ekalesia, o fa’aaogaina ai lo tatou foi malosia ma le potu mai le Alii. Mo fanau la po o la tatou vasega, so o se mea lava e aoga ai le malosia ma le iloa, po o le aiga, aoga Aso Sa, aoga o aoga ai, po o fea lava; O itu tino lava na e pei o le Ekalesia, e fa’aaoga i ai lo outou iloa e auaua ai; seia matutua ma maua galuega tumau ona tino atili lea o le mafaufau o lenei Aso Sa. O Iesu foi, o mea alofa uma sa ia te Ia, sa sasa’a uma mai ina ia malōlō ma ola tagata, ma mausali ai le aiga faatuatua o le Atua i le lalolagi, e ala i le Taulaga o le Faaolataga na ia saunia. O lana toe fetalaiaga, “Ua taunuu.”

Uiga o Upu ma Fuaitau:

i) tauanatemaina(f.3) - taufaatauvaaina/upu vale/tauleagaina

GALUEGA FAATINO: Taliga Fesili

(Fa’aaoga lau Tusi Paia, o lou malamalamaaga i le mataupu, ma lou lava iloa lautele)

1. O le f.3; aisea e le mafai ai ona tauanatemaina e se tagata Iesu, pe afai o sea tagata o tautala i le Agaga o le Atua?

Tali: Ona so o se tagata e tautala i le Agaga moni lava o le Atua, e le mafai le mafai lava, ona ia faia se upu e tauleagaina ai le Alii o Iesu.

2. O le uiga o le vaega mulimuli o le f.3 – E le moni lou faapea mai, “O Iesu Keriso o le Alii,” pe afai e le o ia te oe le Agaga o le Atua. Sa’o pe Sese?

Tali: Sa’o

3. E iai se fesootaiga o le papatisoga o tamaiti lea e fai i le falesa ma le papatisoga lea e tau mai le f.13? Faamatala mai.

Tali: Ioe, e fesootai. O le pine lena po o le faamaufaailoga o le avea o le tamaitiiti ma totino o le aiga o le Atua. Ua na o se faatinoga lea i le tino nei, ae o lona itu faale-Agaga; o tagata uma lava, mai le pepe e oo i le toeaina, e tasi a le Agaga e faapaiaina uma ai i le olaga lenei, na o le Agaga o le Atua.

4. Ona o tatou o lea e aooga, o le a se auala e taunuu ai i se taunuuga manuia lau tausinioga o fai nei?

Tali: Faamaoni e suesue, tu’u atoa i ai le malosi ma le loto. Tatalo ma valaau i le Atua e fesoasoani mai. Taulai tasi le loto i le aoga, ‘aua le felefele solo i mea faatosina o le lalolagi, ua lofia ai fanau i nei aso.

5. O le a le fesootaiga o meaalofoa faa-le-Agaga i le Ekalesia ma itu tino taitasi i le tino?

Tali: O mea alofa poo taleni uma lava ma agavaa, e osofia e le Agaga o le Atua, e tupu ai le galulue faatasi ma le manuia o le tino o Keriso, o le Ekalesia lea. E faapena le tino, e tele ona itu tino eseese, a’o ia itutino eseese uma, e taufai tofu aoga mo le faatumauina o le malosi ma le lelei o le tino atoa.

PESE: 177 “Galue ia seia uma ai...”

A’OA’OGA:

1. Faamaoni i lou valaauina.

2. Galue mo se lelei o lou aiga.

3. ‘Aua le māumāuina meaalofoa.

.....

ASO SA: 25 **APERILA 2021**

MATAUPU: **IA FAATUPUTELEINA PEA LOU ONOSAI**

SINI: A’oa’o tamaiti ia latou iloa, o faigata o le olaga nei, e luitauina ai lo tatou onosai ina ia tuputupu pea.

TUSI FAITAU: Roma 5: 1 – 11

FESOASOANI MO FAIAOGA:

O le onosai, o se iuleo o se tuualalo po o se faaoololoma’au, ina ia tumau le siosiomaga i le filemu. O lona uiga faigofie ua tatou iloa, “O le lavatia,” po “O le mafai” lea ona talia so o se mea, ae maise faigata ma puapuga i le tino nei, po o lagona foi o le loto. A tatou fai nei se fesili; “E faapefea ona tatou faatumau, pe faatuputeleina lo tatou onosai?” O le tali faigofie, “E faatuputeleina e ala i mea faigata.” Fai ma faataitaiga; Fa’auau pea lo tatou faamaoni, tainane, e leai se isi na te amanaia mai tatou! Tumau pea ona tatou agalelei atu, tusa lava pe le faafetai mai se isi. Ma isi e tele, e oo lava i lo tatou alolofa atu, ae ita mai ia tatou. E ui ina faigata ona e ogotia ai o tatou tino ma lagona; a’o faigata o fai ma ala e aliali manino ai le matagofie o lo tatou onosai.

O le vaega tonu o le tusi a le Aposetolo i Roma, sa tatou faitauina nei – O lautele ai lava le lagona o le fiafia ma le filemu, mai le Alofa Tunoa o le Atua e ala iā Iesu Keriso. A o totonu o le Alofa Tunoa lea o le Atua mo tatou, e iloa lo tatou talisapaia, i le faatuatua, faamoemoe ma le onosai. Le onosai lea ua aumai e fai

ma a tatou mataupu autu o lenei Aso Sa. O le onosai, e mamau mai i le Alii o Iesu Keriso, e pei ona sa ia onosaia ai tigā ma puapuaga uma sa fetai ai ma Ia i le galuega. Lea e fai mai le Aposetolo i le f.3 – “E le gata foi i lea, a ua tatou mitamita foi i puapuaga, ina ua tatou iloa o le puapuaga e tupu ai le onosai.”

E tele mea taua ma lelei o le olaga e tupuga mai le onosai, e pei ona fai mai Paulo. O le onosai e tupu ai le mautinoa. O le mautinoa e tupu ai le faamoemoe. Ae fanau mai e le faamoemoe lo tatou loto tetele i le Alii, ina ua papatisoina tatou e le Agaga, e ala i lona Alofa Tunoa.

Ua tatou iloa, e le iai fua le onosai e aunoa ma ni faigata. O le soifuaga o tatou i ai nei, e le sologa lelei pea taimi uma. Ae o le taua lea o faigata e luitauina ai lo tatou onosai, ma tofotofoina ai lo tatou faatuatua. O se luitau aoga tele mo tatou uma le onosai, auā na te tausi le filemu e lagonaina ai pea le fiafia ma le olioli, ma saga tonu ai le loto i le Alii.

O Iesu foi, sa ia onosai le mamafatu ma le matuitui o agasala a le lalolagi, ona o lona Alofa ina ia ola tagata iā Ia, e ala i lona Toetu mai manumalo. Malo le onosai ia te outou uma, i aoga ma tiute o feagai ai.

GALUEGA FAATINO: Fa’aaliga o mafaufauga

Vaai vave ma faitau le Kenese 15: 5 – 9, ona e faamatala lea ma ta’u mai, po o ai le tagata aupito sili ona onosai o taua i le tala. Tau mai ma nisi uiga lelei o iloa mai i lea tagata, talu lona onosai, ma se taunuuga na oo i ai, pe lelei pe leai.

PESE: 225 (A sousou le vasa)

A’OA’OGA:

1. E taua tele le onosai.
2. O Iesu le onosai sili.
3. O puapuaga e tupu ai le onosai.

MANATU TAIALA ME:

AVEA OE MA TAULAGA OSI I LE ATUA

Ua tatou iloa, o taulaga osi i le Atua e le tasi sona faatonuga, ona e tele ma eseese ituaiga taulaga. Peitai, o le faamoemoe e tasi o so o se taulaga osia, o le faatino lea i mea sili, e faailoa ai le agaga faafetai moni i le Atua, ona o lona alofa i le tagata. O le uiga la o le avea o oe, ma a’u foi ma taulaga osi i le Atua, o lo ta taumafai lea e fai le mea sili tatou te mafai i le loto faamaoni, e faatino ai a tatou auunaga ua valaauina i ai i tatou e le Atua, auā o le mea lena e fia silasila i ai o Ia.

ASO SA: 3 ME 2021

MATAUPU: PULEA TATAU OU TAIMI

SINI: A’oa’o tamaiti ia latou malamalama, o le taua o le pulea lelei o taimi mai le Alii, o le fa’aogaina tatau foi lena.

TUSI FAITAU: Ioane 9: 1 – 12

FESOASOANI MO FAIAOGA:

O le vaega tonu lava o le tusi sa tatou faitauina, o le tala “I le faapupulaina o le tausao.” Le tama na tau atu i ai Iesu ma ona so’o, ma fesiligia ai e ona so’o le Alii. Po o le tama, po o ona matua na agasala, ua faapea ai o ia?

Sa tali sa’o Iesu e leai, e le o se isi o i latou, matua po o le tama; Ae o le toe fa’aauuina o le tali, Sa matua suia atoa i le lagona, ma le itu ua faasaga i ai le mataupu, “Ae peitai, ina ia fa’aalia ai o galuega a le Atua ia te ia.” (f.4 – 5) Auā e tatau ona ou faia galuega a lē na auina mai a’u, manū o ao, e oo i i le po, e le mafai e se tasi ona galue ai. Manū o o’u i ai i le lalolagi, o a’u o le malamalama o le lalolagi.”

Na uma loa ona tali atu Iesu i le fesili, liliu ane loa, faatino le galuega laveai mo le tama tauaso. Feanu i le palapala, ma avane nini ai ona mata, ma faatonu loa e alu e mulumulu i le taelega i Selo. Ua malamalama i le tala atoa sa faitau, auā na alu le tama toe foi mai ua pupula. Sa tuufesili nisi, ae na tautino e le tama, o le tagata e igoa ia Iesu na Ia faapupulaina ona mata. O le tino mai lea o galuega mamana a le Atua, e pei ona fa'aalia i le tama ua toe pupula. Ae pei ona fai atu muamua, o le tali a Iesu o lo o matuā faatāua mai ai le taimi, auā e tatau ona faia galuega a le Atua, “manu o ao,” auā e leai se mea e toe mafai pe a po.” “Manū o o’u i ai i le lalolagi, o a’u o le malamalama o le lalolagi.” O le upu “manū,” o fa'aalia ai le lagona naunau e faataunuu loa, e fua i le avanoa ua maua, ma ua tatau loa ona fai. Le uiga lena o la tatou mataupu o lenei Aso Sa “Pulea tatau ou taimi”

Manatua o le toe malaga lea o agai i Ierusalem le nofoaga e faatino ai le Taulaga faaola e Iesu e pei ona sa maliu ai. E le toe vaaia ai i le tino nei o Ia, ma e le toe maua foi se avanoa faapea. Le ala lenā o le le tuua e Iesu le tauaso i se isi taimi, ona o loo ia silafia, e le toe foi mai. O le taimi nei lava manū o i ai o Ia. O le taimi tatau i lana pule, e tusa o le galuega laveai na sau e fai. O Iesu o le tagata lelei i le fuafuaina o ona taimi, ma le fa'aogaina tatau i lana galuega talai. E mafua, ona e malamalama lelei Iesu i lana galuega. Le ala lena, o le ā le naunau o le au-malaga e fia oo i Ierusalem i le Paseka, ua toe o ni itula faataunuu, e lei misi i le faalogo a Iesu le iuleo o le tauaso, ona o le galuega tonu lea na sau ai, o le faamalolo ma laveai tagata; le afaina nisi o manatu, ua maumau le taimi. O le isi itu, o loo silafia e Iesu le mea e masani ona galo i tagata. O le taimi alu tatau, le taimi e fa'aalu ina ia maua se lelei mo le tagata mafatia. O le itu lea e oo lava i e sili ona latalata ia Ia, e galo pea le taua o le taimi fa'aalu mo tagata faapea. I le ma lea, o lo o taulai le silasila a Iesu i le lumanai o le galuega. Tele o taimi alu o le Alii, o le koloniina o le toa sefulu (12). Sa fetalai foi... Ou te atia'e foi la'u Ekalesia (Mt 16: 18) Sa faafefea ona fuafua e Iesu lea atiaega o le Ekalesia? E ala i isi tagata. O le Ekalesia, o tagata agalelei e pei o Iesu, latou te

laveai ma fesoasoani i isi, e pei o le tauaso. Taimi pulea lelei ma alu tatau, taimi e alu i le fesoasoani atu e laveai le vāivāi.

Tupulaga, 'aua le māumāuina le taimi i mea le aoga ae maise nei aso o le luitauina o lo outou ola i le tele o faaosoosoga. Afai o le aoga, punou e suesue ma taumafai, o lou alofa moni lena i le pologa ma le lailoa o nai ou matua. E faapena i so o se vaega o le soifuaga lenei. 'aua le māumāuina le taimi i mea le tatau, a ia aoga lou malosi ma ou taimi mo le Alii. Iesu e tusa o le tala na faitau nei – E leai se taimi na māumāu o lona soifuaga atoa, seia oo lava ina faaiuina lana galuega alofa, e pei ona ia osia ai le taulaga faaola mo taua, ma le lalolagi uma.

Uiga o Upu ma Fuaitau:

- i) Rapi e (f2) - O le Rapi e, o le faiaoga, o loo faasino i le tala ia Iesu.
- ii) manū (f.4&5)- Faasino i le taimi tonu lea ua maua ai le avanoa.
(eg) Sau loa e faaola le moli, manū lea ua e sau, aua e te toe alu loa, e leai se isi e iloa fai.
Sa tatau ona totogi ai i le taimi lena le aitalafu, manū o maua tupe
- iii) Taelega i Selo (f&)- O Selo o le igoa o le vai i tuapā o Ierusalem, o le vai lea na tuli iai e Iesu le tauaso e fufulu ai ona mata, ma pupula ai loa.

GALUEGA FAATINO:

1. Tautinoga: Tautino mai e oe lava ia, se mea sa tupu; Sa fa'aalu ai lou taimi, pe lei fa'aaluina ai foi sou taimi, ma se taunuuga na oo i ai, e te malamalama atili ai i le mataupu.
2. Sauni e lau susuga i le faiaoga ni nai fesili e tuliloa ai la tatou mataupu, e fua i le taimi.

PESE: 184 “Ia galulue pea, galulue o ao....”

A’OA’OGA:

1. ‘Aua le māumāuina le taimi i mea le aogā.
2. E le faatali le taimi i le tagata.
3. Alofa i le o mafatia, manū o maua lou avanoa.

.....

ASO SA: **10 ME 2021 (ASO SA O TINĀ)**

MATAUPU: **O IAELI LE TINĀ ATAMAI**

SINI: A’oa’o tamaiti ia latou iloa le tāua ma le lelei, o se faaiuga poto ma atamai, e pei ona sa faia e le tinā o Iaeli.

TUSI FAITAU: Faamasino 4: 14 -24

FESOASOANI MO FAIAOGA:

O le faamatalaga amata lenei, e le o aofia i la tatou tusi sa faitauina; Peitai, ou te manatu e i ai le aogā, e lautele ai le silafia, ma faigofie ai ona faamatala ma tuliloa la tatou mataupu o lenei Aso Sa. Ina ua maliu Iosua, le sa ia faaulufale le nuu i Kanana, o le tele ia o tausaga, mulimuli ane, sa pologa ai Isaraelu i isi malo, talu ai le faata’eta’e aluga o lo latou faatuatua i le Atua. E oo mai foi i le taimi o faamasino, e le iloga lava ona mausali. Ina ua maliu Euta le faamasino sa ia taitai le nuu, ona toe palasi foi lea o Isaraelu i le vaivaiga masani lea o le ifo i tupua. Ona tuuina atu lea o latou e pologa i le luasefulu tausaga i lalo o le tupu o Kanana, e igoa ia Iapino. O Sesera o le igoa lea o le taitai-au a Iapino. O le aiga foi o Iapino, e lelei le mafutaga ma le aiga o le isi tagata e igoa ia Kaveru; ona o Kaveru, ua leva ona soso’o faatasi ma auau faatasi lona nuu o Keni ma Isaraelu, a’o lea ua

toe faamaoni i le taitaiga a Iapino ma lagolago i ai. Peitai, o le toalua o Kaveru, le fafine e igoa ia Iaeli lea e fai ma autu o le mataupu, e le o toe liliu lona loto mai le nuu o le Atua, e ui ua toe auauna lona toalua i lalo o le taitaiga a Iapino.

O le pologa tele o Isaraelu ia Iapino i ia tausaga e tele, sa alalaga ai le nuu i le Atua, na faafogaina e le Atua, ma toe tofia ai le fafine e igoa ia Tepora, e fai ma faamasino na te taitaia le nuu. Ona aami lea o Tepora Parako e alu e fai ma tai-‘au, ma o i le mauga o Tabora ma le sefulu afe o tagata tau mai Sepulona ma Nafatali. Ae musu Parako e alu na o ia, seiloga e o ma le faamasino o Tepora, ona faatoa alu lea! Na faapenā lava ona fai, ae na o ma le upu tautino a Tepora ia Parako “e le viia oe,” ia pe faapea foi, “e le ta’uta’ua oe;” i lenei mea, ao le fafine. Ua oo mai le taimi, ona fai atu lea o Tepora ia Palako, tulai ia, auā o le aso nei e tuuina atu ai Sesera le taitai au a Iapino i ou lima. Na gapā le taua, ma sa matuā faata’ape’apeina e le Atua kariota e tele a Sesera, i luma o Parako. O le mamafa o le fasi a Isaraelu, na fasiotia ai lava ma Iapino le tupu i le taua lea. Ao Sesera, na iu ina alu ese mai lana kariota, ma momoe ausulusulu i ona vae, a’o tuliloa o ia e Parako. Na sulu Sesera i le fale ie o Iaeli le toalua o Kaveru le sā Kenī, ona tanumia ai lea o ia i ie. Na augani ane i le fia inu, ona ave lea i ai e le fafine le suāsusu e tali ai lona manao. Ona toe faapea ane lea a ia i le fafine, alu e tu i le faitotoa, a sau se isi ma fesili mai i se tagata iinei, ona fai lea i ai e leai! O le avanoa lea na alu ai loa Iaeli, aumai le fao o le fale-ie ma le samala, ma tutui ai le manifinifi o Sesera a’o moe gase lava. Ua ati ifo le fao i le palapala ma oti ai Sesera. Na oo atu Parako, ona faaulufale lea e le fafine ma faasino i ai le tagata o ia sailia, o Sesera lea, lea ua taatia ua oti. O le iuga lea o le tala, o le manumalo o Isaraelu e mai le Atua; a’o le taunuuga foi lea o le valoaga po o le upu a Tepora sa fai ia Parako, E le viia pe ta’uta’ua o ia i lenei mea, a o le fafine. Le fafine lea o Iaeli, sa ia faia le auala atamai, ma na fasiotia ai Sesera le taitai-au a Iapino, o le fili o lona nuu. E taua foi mo tinā lenei tala, e le gata o Tepora o le tinā na filifilia e le Atua e fai ma faamasino na te taitai lona nuu, a’o Iaeli foi ma lona ‘au i le mea o i ai le Atua. E

le o le taua o le fasioti-tagata, a'e fa'aaogaina lava e le Atua tinā, so o se mea o finagalo ai, e iloa ai lo latou atamamai ma le filiga faatasi ma lona finagalo.

Uiga o Upu ma Fuaitau

- i) sa Keni (f 17) - o se tasi ituaiga o le nuu o Mitiana (O Mitiana le nuu o Ietero le tamā o le toalua o Mose)

GALUEGA FAATINO: (Taliga Fesili) – Fa'aaoga lau Tusi Paia

1. Mafaufau lelei a! Aiseā na alu ese ai Sesera mai le kariota e tele vave, ae tamoe i lalo i ona vae?
Tali: E iloagofie ia i le kariota ona e telē, ae faigofie ona sola pe a momoe, auā ua nunu ma fenunia'i faatasi tagata o le taua.
2. O le a le mafuaaga na sola ai Sesera i le fale ie o Iaeli?
Tali: O le talitonuga o Sesera e sao ai iina, auā o Iaeli o le ava a Kaveru, lea e lelei la latou mafutaga ma le aiga o Iapino; ao Sesera o le taitai au a Iapino.
3. O le a sou silafia; O le a le mafuaaga e tulituliloa ai lava le taitai-au o se itu taua ina ia fasiotia?
Tali: Auā e oti loa le taitai-au salalau loa le vaega-au auā ua leai se taitai e aumaia le faatonuga o le mea e tatau ona fai.
4. A e faitauina le f.8-9 o le mataupu lava lenei, e ui e lē o a'afia i la tatou tusi faitau, a'e o le tala lava e tasi. Na taunuu le upu a le Faamasino lona na fai iina?
Tali: Ioe! Auā e lei fasiotia e Parako Sesera le taitai'au ae na fasiotia e le fafine o Iaeli.

5. O le a le fao lea sa fa'aaoga e Iaeli e fasioti ai Sesera?
Tali: O le fao o le faleie.

PESE: 170 “Po ua au ma Iesu o i tatou nei”

A'OA'OGA:

1. E lelei le au ma le Atua.
2. E tāua tinā i le Alii.
3. E popoto tinā.

.....

ASO SA: 23 ME 2021

MATAUPU: IA FAAPAIAINA LE OLA

SINI: A'oa'o tamaiti ia latou iloa, le taua ma le tatau ona ola faapaiaina.

TUSI FAITAU: 1 Peteru 1: 13 – 21

FESOASOANI MO FAIAOGA:

O le upu moni, so o se mea lava e finagalo ai le Atua mo tatou, o lo o taoto lua ai le matuā faigata ona mulimulitaia, ma le manuia moni. E faapenā foi le manaoga o aumai e fai ma a tatou mataupu o lenei Aso Sa, “Ia faapaiaina le ola.” O le mea moni lava, e leai a se tagata e paia, na o le Atua lava; ae o le manaoga o le mataupu nei, o lo o taoto ai le finagalo alofa moni o le Atua mo lana tagata na fai, aua a paia lona ola, o lona manuia moni foi lenā. O le manaoga o le mataupu, ona e vave ona toe afio mai Iesu, ae tatau ona tatou sauniuni e ala i lo tatou ola o fai nei, ia faapaiaina mo so tatou avanoa i le malo. O le paia, o le ofoina atoa lea o oe mo le Atua; O le tuueseina faapitoa mai le lalolagi mo ana feau; O le alu ese mai agasala ma

ona aafiaga. O le ola faapaiaina e iloa i lo tatou ola ua faatotogaina i anofale faa-le-Atua. O mea e ave i ai le faamuamua, ma tulaia i ai le faamoemoe. O le alofa tunoa lea o le Atua, ia faatuatua i ai, ona avea lea o tatou ma fanau gaua'i ia te Ia. Tatou te lē mafai lava ona paia na o tatou. O le Atua na aumai lona Agaga Paia, e fesoasoani ina ia tatou usiustai, ma na aumai lo tatou malosi, e tete'e atu ai ma le toe agasala. O le uiga atoa lea o le manatu o le Aposetolo. Ona o le Atua o Isaraelu, o le Atua lava lea o le faatuatuga Kerisiano, e paia. O Ia lava foi le ala ma le fua o lo tatou ola. “Ia paia outou, aua o a'u nei e paia lava a'u” (f.16)

O le olaga o tatou i ai nei, ua tatou iloa lava i lo tatou siosiomaga, ma a'oa'oga faa-le-mataupu silisili, mea e tatau, e atagia ai lo tatou ola faapaiaina, e pei foi ona mana'o mai le Aposetolo. E le gata ia aloalo ese mai le faia o le agasala, ae ia tatou tulaia faamaoni ma gauai le lotu i le Atua. O la le fai-Salamo: “Le Atua e, e faapei ona naunau o le aila i vaitafe, o lo o faapena ona naunau o lou agaga ia te oe.” Tupulaga o tama ma teine, ia paia lo outou ola mo le Alii, auā o le mea tatau lava lea; o la outou taulaga osi foi lona, o le avea o outou ma fa'aa'oa'o mo isi, ma fai o tatou tupulaga ma faamanuiaga mo le Ekalesia, aiga, nuu ma le malo. O Iesu foi ma lona talavou, sa atoatoa ona paia. O Ia lava le tamai mamoe e leai sona ila, na auina mai e osi le Taulaga o le Faaolataga mo le lalolagi, ina ia paia tatou uma ma faatuatua i le Atua.

GALUEGA FAATINO:

Su'esu'ega faa-le-mafaufau e uiga i la tatou mataupu.

- i) Lisi pe tusi mai ni mea se lima, e iloa ai se tagata paia!
Tali: galue faamaoni/aua le tau'i ma sui/toaga e tatalo/alofa i so o se tagata/fa'aaloalo/etc
- ii) O oe o le tagata faatuatua i le Atua, e te alofa foi i ou matua. Ua ta mai le lotu, ae lei taoina le umu. O le a le

gaoioi aupito lelei ma sa'o e tatau ona e faia, e iloa ai, e sa'o o oe o le tagata o le Atua?

“A tope na tao le umu ae lei aasa ona o le lotu, e ono fue mai e mata. Ua e alofa tele i le Atua, ae ua e lē alofa i ou matua. A e nofo foi e fai le umu ae tuu le lotu, ua sili ae ia oe ou matua nai lo le Atua

Saili faatasi e lau susuga i le faiaoga ma tamaiti le mea aupito tatau, o le tali lona!

PESE: Majesty

A'OA'OGA:

- 1. Ia paia lo tatou ola mo le Alii.
- 2. Aloese mai le agasala.
- 3. Fa'aa'oa'o i le Atua.

.....

ASO SA: 30 ME 2021

MATAUPU: FAAUTAUTA I LAU UPU E FAI ATU

SINI: A'oa'o tamaiti ina ia latou malamalama lelei, i le tāua o le matuā faaeteete, i so o se upu e tautala atu ai i isi tagata.

TUSI FAITAU: Isaia 50: 4 – 11

FESOASOANI MO FAIAOGA:

Tatou te lei faitauina le faaiuga o le Mataupu e 49: 22(ff) e oo i le Mataupu e 50: 3, ae taua pe a faitau ai lau susuga i le faiaoga, e tele ai le malamalamaaga i le tala ma faigofie ai ona tuliloa le sini o la tatou mataupu o lenei Aso Sa. O le vaega atoa lea ua taua i

luga, Isaia 49: 22 – 50: 3; O lo o fai ma faamaoniga i le lalolagi, le silisiliese o le Atua o Isaraelu, e ala i lona faia o mea e le mafaia; Ma avea ma ala e faasaoloto ai e lē ua malosi le tafeaga ae sa manatu e vaivai, e oo i le vete poo le oloa sa avea faamalosi e le malosi, o le a toe faafoi uma. Sa faia e le Atua le mea lea i taimi o le Esoto, ma o le a toe fai foi, pe a oo ina toe faafoi le tafeaga a Isaraelu. ‘Aua lava nei i ai so latou masalosalo; o le a faataunuu lava e le Atua ana folafolaga; O le a ia faia lava mea e le mafaia, ina ia taunuu ai mea sa ia folafolaina. O le amataga la o le Mataupu e 50: 1- 3; O lo o tautino ai ma folafola mai e le Atua ia Isaraelu, o Ia e tau mo latou, ae o Isaraelu lava ia sa ia faatau atu ia i isi atunuu e ala i le fai o le agasala; ma o ia lava ua mafua ai faigata o la fetaii. Ae le pupu’u aao faaola o le Atua; E lei te’ena foi latou e le Atua, a’o i latou lava.

O le f 4 – 13 o lo o faasino tonu i ai la tatou mataupu, o faataua ai upu e puaina mai gutu poo fofoga o le nuu, e fa’aaogaina ai o latou laulaufaiva. O le lapataiga i laulaufaiva, o le lapataiga lava lea i upu uma e tautala i ai le gutu; Auā a leai ni upu ua le mafai foi ona tatou fesootai atu i isi tagata, pe a leai ni o tatou laulaufaiva, tulou! Faapea mai la i le f.4 “Ua foai mai ia te au e le Alii le Atua, le laulaufaiva o ē ua a’oa’oina, ina ia ou iloa ona faamafanafana i se upu, lē ua tigaina; Na te fagua a’u i lea taeao ma lea taeao; na te fagua ou taliga, ina ia ou faalogologo e pei o e ua a’oa’oina.”

Ona o le laulaufaiva o se mea faigaluega aogā tele, e tele ai lava lona taua i le va nonofo ai o le Atua ma ona tagata. Peitai ona o lona matautia, auā e mafai e le laulaufaiva ona tape, faavaivaia, faaleaga ma lepeti, le tele o isi mea, e ala i upu e tautala atu ai; O le ala foi lea o le lapataia; Ina ia matuā faautauta ma faaeteete i upu e tautala atu ai. Le uiga la lena o le vaega sa tatou faitauina mo la tatou mataupu. Ua foa’iina e le Atua ia Isaraelu laulaufaiva, o laulaufaiva o tagata ua a’oa’oina; po o tagata ua au faatasi ma tumau faamaoni i le Atua; ua popoto, na o mea lelei o le a tautatala i ai. O le a tautala atu i upu e faamafanafana, ma faatupu faamoemoe i e vaivai ma puapuagatia.

O le f 5-9, o fa’aalia ai le gauai o Isaraelu i lo latou Atua, o le a faalogo ma le manino i lona fetalai mai, o le a uai atu foi ona taliga, e le toe i ai se finauvale. O aso taitasi uma foi, e tataua ona tatalo ma aioi mo le puipuiga, ona fetalai mai lea o le Atua e tau mai le mea o Ia finagalo ai. Ma, o le a aumai foi e le Atua ia Isaraelu upu o le poto, e na te iloa ai ona alofa, faamafanafana, ma laveai lē o vaivai. O le a tatala foi e le Atua le iloa o Isaraelu i lona finagalo – ona fetalai mai lea o le Atua ma ia lagonaina (f4-5). O fuaiupu mulimuli na ona toe tau mai o le leai o se lavea’iina o le tagata pe a tautala i upu le aoga, ma faalagolago i lona lava mafai. Fanau, ‘aua le lafoa upu faamaualuga e vevesi ai, ae ia faamaulalo, e iloa ai ona fa’aaloalo, ma tautala i upu tataua, e le gata e alofagia ai, ae viia ai le Atua. Faapei foi o Iesu, na oo lava i le satauro na o le iuleo o le loto faamagalo sa lagona mai ai, ma le ava i lona Tamā. Lea ua tatou ola uma ai, i le Taulaga faaola na ia tautino mai, “Ua Taunuu.”

GALUEGA FAATINO: (Tusitusiga)

1. Tusi sau faatoesega i lou faiaoga, ma le pule o la outou aoga, ona ua tuli oe talu lou ulaula. Tusi foi ma sau tautinoga i le pule aoga, ma lou faiaoga, pe afai e uma vaiaso o e nofo va’ava’aia ai, ma o le a e toe foi i le aoga.
2. Sauni e lau susuga ni nai fesili poo sina talanoaga faatasi ma tamaiti, e faalatele ai le mataupu.

PESE: 185 “Talai le tala moni....”

A’OA’OGA:

1. Tautala ma le ava i le Atua.
2. Fa’aaoga tataua le laulaufaiva
3. Tautala o oe o le tagata a’oa’oina.

.....

MANATU TAIALA O IUNI:

IA MATA'U TAGATA UMA I LE ATUA

O le itu sili lea ona taua ma lelei, ia ola matata'u tagata uma i le Atua. Auā o le mata'u i le Atua, o le inoino i le leaga, a ia fiafia e fai le amio lelei i aso uma o le olaga, ina ia maua ai le ola faamalieina i mea lelei uma.

ASO SA: 6 IUNI 2021

MATAUPU: O LE ATUA E FINAGALO I LE LOTO MAULALO

SINI: Ia malamalama le vasega, o le loto maulalo, e nofo fealofani ma maua ai e tagata uma le filemu.

TUSI FAITAU: Salamo 131

FESOASOANI MO FAIAOGA:

Afai e pulea e le loto maulalo tagata uma, ona nofo fealofani lea ma filemu. O le faailoga lea o tagata ua matata'u i le Atua, auā o lona finagalo moni lea.

O le Salamo 131, o le tatou tusi faitau lea mo le tatou mataupu i lenei Aso Sa, o lo o faamatala mai ai lagona o Tavita, na fiafia mai ai le Atua ia te ia. Na faaecaina ai foi lana nofoaiga ma faasaoina ai o ia mai i ona fili uma.

O lenei Salamo, o le Pese e faailoa ai le agaga faafetai o Tavita i le Atua ona o lana meaaofa mo ia o le loto maulalo. E lē loto faamaualuga, e lē loto fefete, e lē fia sili, e lē pule saua, ma faalialia vale. E le masani ma ia tu ma ia aga. O le tautinoga o le mautinoa, o silafia e le Atua loto ma agaga o tagata uma, ma e le o pogisa i le Atua, lana auuana le tupu o Tavita. Sa taofi mau pea i lona faatauvaa, ma faalagolago i lona Atua.

Fai mai le fai Salamo, sa ou pulea lelei lo'u loto ma ou ffilemu. Na ou matua faatalitali, ma faalagolago lo'u agaga i le Atua, i mea uma na te faia, e faaecaina ai la'u nofoaiga ma manuia ai la'u taitaiga o le nuu.

Na uma ona faauuina e le Perofeta o Samuelu Tavita e fai ma tupu, ona osofia lea lea o ia e le Agaga o le Alii. Ona toe foi lava lea o Tavita e leoleo i mamoe a lona tamā. E leai ni lagona o Tavita, na te faoa faamalosi mai ai le tulaga tupu o Isaraelu. Sa faalagolago lava i le taitaiina a le Agaga o le Alii. E sefulu tausaga o fesolasolatai Tavita, a o saili le tupu o Saulo e fasioti ia te ia. Na tele avanoa na maua e Tavita e fasiotia ai le tupu o Saulo, ae fai mai Tavita, "Aua le fasioti ia te ia, aua po'o ai ea na te faaoo lona lima i le ua faauuina e le Alii, ae le nofo sala ai o ia? O lo o soifua le Alii, e fasia lava o ia e le Alii, pe a oo i ona aso e oti ai, pe alu ifo i se taua e fano ai (2 Samuelu 16: 9 & 10) O le faailoga lena o le tagata, e mata'u i le Atua.

E faalagolago ma faalologo i le Agaga o le Atua o lo o ia te ia, e faatonu mai ia te ia i mea lelei e tataua ona fai. O le taunuuga o Saulo, na fasiotia e Filisitua i le taua i le mauga o Kilepoa. Na tuu filemu atu ai lea ia Tavita o le tulaga tupu o Isaraelu ma na ia taitaiina ai le nuu i le fasefulu tausaga.

O le uiga lea o le tagata loto maulalo. E le mana'o vave i tulaga mauualuga, a'e faatalitali ma le onosai, i taimi o finagalo ai le Atua mo ia. Ua fai mai Tavita i le Salamo lenei i le fuaiupu 2 e faapea, Ua ou pulea lo'u loto, sa ou ffilemu e pei o le tamaitiiti ua te'a ma le susu o lona tinā, ae na ona faatalitali lava, o le a lava le meaai e aumai e lona tinā, e talia ma le faafetai. E faapena lona ola faalagolago i le Atua,. O le a lava le faasinoga a le Agaga o le Atua mo ia, e talia ma le fiafia ma le loto maulalo. O le mea foi lea na fetalai ai Iesu i lona au so'o, "A le liua outou e pei o tamaiti tou te le sao atu lava i le malo o le lagi." O le loto maulalo o Iesu Keriso na fa'aalia i lana galuega o le faaolataga. Ua Ia le manatu o Ia o le Atua, a ua fai ma tagata ua puapuagaina, ina ia faaolaina le lalolagi o tagata pologa i le agasala, ina ia maua le fiafia ma le olioli faavavau.

GALUEGA FAATINO:

Fuaiupu e lua: E moni, na ou fililemu ma ou faalologo, faapei o le tama ua te'a ma le susu o lona tinā, ua tusa ma le tama ua tea ma le susu.

Faamatala mai i ni au lava upu le uiga o lenei fuaiupu e tusa ma le fa'aaogaina mai e le Salamo.

Tali: Ua faatusa e Tavita lona ola faalagolago i le Atua, i lana taitaiga, i mea e tusa ona ia faia. E tulimatai le Agaga o le Atua, i lana faasinoga mo ia i mea e tatau ona ia faia, e faalologo i ai ma usitai i ai. Ua o gatasi ma le ola faalagolago o le tama ua te'a ma le susu a lona tinā, ma faalagolago i meaai e ola ai.

PESE: Pese ma Viiga 371

A'OA'OGA:

1. Ia faalagolago ma faatalitali i le Atua.
2. O le usitai i matua, o le faailoga o le loto maulalo.
3. O le loto maulalo, na te faatupu le filemu.
4. E fealofani tagata, pe a loto maulalo

.....

ASO SA: 13 IUNI 2021

MATAUPU: ***O LE POTO O LE LALOLAGI O LE VALE I LE ATUA***

SINI: Ia malamalama le vasega, o le mata'u i le Atua o le amataga lea o le potu. O le potu foi o le mea alofa mai le Atua i ē saili i ai.

TUSI FAITAU: 1 Korinito 1: 1 – 25

FESOASOANI MO FAIAOGA:

O le tatou mataupu i lenei Aso Sa, O le potu o le lalolagi o le vale i le Atua. A o lei oo atu la tatou mataupu i le tusi faitau ua filifilia mo le tatou mataupu, sei tatou mafaufau muamua, po'o fea na mapuna mai ai le potu ma le atamai i le amataga o le foafoaga. Fai mai le tala a Kenese 1: 1 – 3, :Na faia e le Atua le lagi ma le lalolagi i le amataga. Sa soona nunumi le lalolagi ma ua gaogao, sa ufitia foi le moana i le pouliuli, na fegaoioia'i foi le Agaga o le Atua i le fogatai. Ua fetalai mai le Atua, Ia malamalama ona malamalama ai lea.

Le malamalama lea o le alofa tunoa o le Atua, o lo o i ai lona potu ma lona atamai, o lona fai vavega ma lona mamalu silisili ese na Ia faia ai le foafoaga aoao, ma tulai mai ai lona matagofie ma le ofoofogia.

Le malamalama lena o le Atua Tolu Tasi Paia na Ia faia ai le tagata ma ua matua lelei atoatoa ai le foafoaga. Peitai ua teena e le tagata le malamalama o le alofa tunoa o le Atua, ina ua fai lava lona loto, ma ua le mafai ai ona ia maua le potu e iloa ai mea lilo o le potu o le Atua. Ua lē iloa foi e le tagata o le potu ma le mamalu e mai le Atua lea. O le potu o le Atua e iloa ai e le tagata le faatinoga o mea lelei uma, ona ia matua inoino ai loa i le faia o le leaga.

O le tatou tusi faitau o lenei Aso Sa, o lo o matuā tautala malosi ai le Aposetolo o Paulo e uiga o le potu o le Atua. Auā ua matua tauvaleyaina le Tala Lelei ia Iesu Keriso e tagata Iutaia ma le potu o tagata Eleni.

Ua fai mai Iutaia o se tala'iina valea tele le Tala Lelei le folafolaina o Iesu Keriso o le Alo o le Atua ma le Mesia na valoia. Auā ua faaumatia le soifua o Iesu i le faatautauina i le satauro, e faapefea ona taua o Ia o le Alo o le Atua ma o Ia o le Mesia na valoia. I le talitonuga o Iutaia, o le satauro o le faailoga o le toilalo ma le ola faiaina. E manaomia e Iutaia ni faailoga ofoofogia, latou te talitonuina ai o Iesu Keriso o le Mesia na Afio mai le Atua. Peitai, o lo o faamauina lava i le tusi a le

Perofeta o Isaia 53: 1 – 12 le valoaga i le Mesia puapuagaina. O le Mesia loto maualalo. E le o se Mesia loto faamaualuga. Ae fai mai le talitonuga o le au popoto o Eleni, o le Atua e leai ni ona lagona ma ni faalogona. Afai ua mafai ona i ai faalogona olioli, fiafia, faanoanoa, ma toatamai, o lona uiga ua i ai le tagata ua ia faatosinaina le finagalo o le Atua i ia mea, ma o lea tagata ua sili atu i le Atua. O le pototo o le au Eleni, o le Atua ua puapuagaina, e feteena'i ma lo latou malamalama, ma o se mea valea. Latou te le taliaina Iesu Keriso o le Alo o le Atua, i lona faatautauina i le satauro mataga, o se taunuuga toilalo tele.

A o le uiga lea o le tula'i malosi atu o Paulo ma folafola atu le Tala Lelei ia Iesu Keriso. O le pototo o le Atua ua liutino tagata, ua afio mai e faatoilalo le pototo o le lalolagi, o le tiapolo lea, ina ia mafai ona faaolaina tagata uma mai le pologa o le agasala ona o le pototo o le lalolagi. O fuafuaga o le finagalo o le Atua mo le faaolaina o lana fanau i le lalolagi, e le fuaina i manao ma ni lagona o tagata. O le manatu o Iutaia ma Eleni, e tataua ona fa'aalia mai le silisili ese ma lona mamalu, ma lana pule aoao i le faatinoga o le faaolataga o le lalolagi. O lona uiga e toatele tagata e faaumatia o latou ola, i auala o lo o manatu i ai le lalolagi, ae le o le faamoemoe lea o le finagalo o le Atua. E pei ona fai mai le Ioane 3: 16 'Aua ua faapea lava ona alofa mai o le Atua i le lalolagi, ua Ia aumai ai lona Atalii e toatasi, ina ia le fano se tasi e faatuatua ia te Ia a ia maua e ia le ola faavavau.

Ua fai mai foi le upu a le pototo, Faataoto 8: 35 Auā o le ua maua a'u [o le pototo lea] ua maua e ia le ola, e maua foi e ia le alofa mai le Atua.

O le Tala Lelei ia Iesu Keriso na puapuagaina i le satauro mataga, o se mea toilalo i le Iutaia ma le Eleni ma le pototo o le lalolagi, a o le pototo lea o le Atua ua taliaina ma faatuatua i ai tagata Kerisiano uma, auā ua latou maua ai se ola fou, ina ua ulufale le malamalama o le alofa tunoa o le Atua i o latou loto, ma ua latou maua ai le filemu ma le olioli moni mai le Atua.

O le mitamitaga tele lea o le aposetolo o Paulo i lona malosi atoa e folafola ai le maliu mataga o Iesu Keriso i le satauro, ua fa'aalia ai le pototo silisili ese o le Atua. Auā ua fa'aaoga e le Atua mea

sili ona vaivai ma le maualalo, e titina ai le malosi ma le pototo o le lalolagi o i le tiapolo, ma ua faamagaloina ai agasala a tagata uma, ma ua faaolaina ai foi atoa ma tagata popoto o le lalolagi, pe a iloa ona loto maualalo, ma salamo mai lo latou lava pototo. O fea nei o i ai le pototo o le lalolagi i taimi o le faama'i oti o le coronavirus, po o le covid 19? Ua fiu le pototo o le lalolagi e saili se togafiti e fofo ai le faama'i.

O fea o i ai le faalagolago i le pototo e fausia ai mea tau malolosi? O fea o i ai le malosi o le tamaoaiga? Ua na o le fifilemu le mea ua tatou vaaia. Ua tasi lava le mea ua tatou molimauina, ua tulivae tagata uma i le Atua. Auā ua na o le Atua Tolu Tasi Paia, Le Tamā, ma le Alo ma le Agaga Paia le pototo i le lagi i luga ma le pototo i le lalolagi i lalo nei, e faaolaina ai tagata uma mai leni lalolagi ua faamalaiaina.

O le Tala Lelei i le Iesu Keriso Toetu, ia talia ma faaulufale i loto ma agaga, aua o le pototo o le Atua, ua liutino tagata, ina ia tatou popoto ai tatou te ola ai, ma tatou maua le alofa mai le Atua. Ioe, e fa'aaoga e le Atua mea vaivai ma le faatauvaa e faatoilalo ai le pototo ma le malosi o le lalolagi. O le pototo o le lalolagi, o le vale i le Atua.

GALUEGA FAATINO:

1. Faamatala mai i au upu lou iloa o le pototo o le lalolagi.
Tali: O le pototo o le lalolagi e iloa i le tele o le tamaoaiga, tuga taualoa le amanaia le mativa ma le vaivai.
2. Faamatala mai foi lou iloa i le pototo o le Atua.
Tali: Pototo o le Atua e iloa i le tagata amiotonu, alofa i so o se tagata, toaga e tatalo, amio pulea, ma faatuatua i le Atua.

PESE: Pese ma Viiga 235

A'OA'OGA:

1. Ia mata'u i le Atua.

2. E manuia i le poto o le Atua.
3. Amio lelei mai le Atua.

.....

ASO SA: **20 IUNI 2021**

MATAUPU: **O LE OLA MA LE ALOFA E MAI LE ATUA**

SINI: Ia malamalama le fanau, afai latou te maua le poto, ua latou maua le ola, ua latou maua foi le alofa mai le Atua.

TUSI FAITAU: Faataoto 8: 22 – 36

FESOASOANI MO FAIAOGA:

Fai mai le tusi a Kenese 1: 3 & 4. Ua fetalai mai le Atua, “Ia malamalama, ona malamalama ai lea. Ua silasila atu le Atua i le malamalama ua lelei, ona tu’u eseese ai lea e le Atua o le malamalama ma le pouliuli.

O le malamalama o le poto o le Atua, o lo o i ai le ola ma lona alofa. O lona uiga o le malamalama o lo o i ai le poto. O le poto o le Atua, ua ia faia ai mea uma, o mea uma foi ua faia o mea ia e i ai le ola, o lo o i ai ma le alofa o le Atua.

O le vaega o le tusi a le poto, Faataoto 8: 22 – 36 ua fai ma tatou mataupu i lenei Aso Sa. O lo o tautala mai ai le poto e pei se tagata ua gagana mai. Ua faapea mai le poto, o le Atua e ona lava ia. I le ulua’i aso lava o le foafoaga i le amataga. Na fetalai ai le Atua, Ina malamalama ia, ona malamalama ai lea. O le upu na puaina mai i fofoga o le Atua, o lo o alu atu faatasi ma le poto ma le ola.

O le poto ma le ola, o lo o afifi e le alofa tunoa o le Atua. Fai mai le poto, o le Atua e ona lava a’u, o le amataga o lona ala, e muamua i ana galuega uma. O lona uiga o le malamalama, o le

poto ma le mataisau o lo o i ai le ola ma lona alofa tunoa na faataoto ma tuumataga ai mea uma i le matuā lelei, ma ua tino mai ai le foafoaga i lona matagofie.

E matuā le finagalo lava le Atua ia i ai i totonu o lana foafoaga le leaga. O le malamalama o lona alofa tunoa ua fusia ai mea uma lava ua faia. O lana Upu na alu atu ma le poto ua tino mai ai mea uma. O Afioga a le Atua, o le sulu i o tatou vae ma le malamalama i o tatou ala. O Upu ma Afioga a le Atua, a maua’ a i o tatou loto e maua ai le poto, ona tatou maua lea o le ola, ae tatou te maua ai foi le alofa mai le Atua.

O le malamalama o le alofa tunoa, o le poto lava lea o le Atua, ua liutino tagata e ala ia Iesu Keriso. Pei ona molimau Ioane 1: 9. O le malamalama moni lea na te faamalamalamaina tagata uma lava o lo o ua maliu mai i le lalolagi. O i latou uma na talia o Ia, ma faatuatua i lona suafa, na ia avatu i ai o lea manuia ia avea i latou ma fanau a le Atua.

O le malamalama lea o le Atua o lona poto lava lea, afai e maua ma talia e tagata uma, ona maua lea o le ola, e maua foi e i latou le alofa o le Atua. Ioe, le fanau i lenei taeao, o le a’oa’oga lea a le Tala Lelei a Iesu Keriso. Ia tatou saili le poto o le Atua, auā a tatou maua, ona tatou ola ai lea ma aumai e le Atua lona alofa tunoa ia i tatou, e maua ai manuia uma.

GALUEGA FAATINO:

Malamalama ma le Poto

Faamatala mai ni au lava upu, e faailoa mai ai e tutusa le malamalama ma le poto.

A malamalama le mafaufau, ua iloa foi e le loto le mea e tatau ona fai. Ua tusa o se moli ua susulu atu i le pogisa, ma iloa lelei ai le ala e savali ai. O le poto o le mafaufau ma le loto, e faailoa le amio lelei e faia ma nofo lelei aima isi tagata.

PESE: Ia susulu atu mo Iesu (Pese ma Viiga 363)

A’OA’OGA:

1. Ia ol ma le alofa i ou tuaoi ma le Atua.
2. Ia faatino le alofa i lou olaga atoa.
3. Ia fiafia e mafuta i le Atua, ona e maua lea o le potu.

.....

ASO SA: 27 IUNI 2021

MATAUPU: O LE SAPATI O LE MALOLOGA LELEI

SINI: Ia malamalama le fanau, o le Aso Sa o le malologa lelei mo tgata uma. E mafai foi ona faia ai ni galuega fesoasoani mo ē ua puapuagatia.

TUSI FAITAU: Luka 13: 10 – 17

FESOASOANI MO FAIAOGA:

O le tusi faitau o Luka 13: 10 – 17 ua fai ma tatou mataupu i lenei Aso Sa, o le faamaloloina e Iesu o le fafine ua sefulu valu tausaga o faano’uno’u e le mafai ona tu sa’o i luga.

I taimi o le galuega faaola a Iesu i le lalolagi, na matua faamamafa ai e ta’ita’i o le Lotu Iutaia le faasaina o faamalologa o ma’i uma i le Aso Sa. Ua le faia lenei tulafono e ta’ita’i o le Lotu Iutaia i lagona o le alofa, a ua faia i se agaga loto leaga ma le tete’e atu i galuega alofa o le faaolataga ua afio mai ai le Atua e ala ia Iesu Keriso i le lalolagi.

Sa i ai Iesu i le sunako i le sapati, sa a’oa’o atu o Ia. Faauta foi, sa iai le fafine ua ia te ia le agaga e vaivai ai i ona tausaga e sefulu ma le valu. Ua silafia o ia e Iesu, ona valaau atu lea o Ia ia te ia, Funa e, ua tatalaina lou vaivai. Ua faaee atu e Ia ona aao ia te ia, ma faasaolotoina lea o ia, ua vivii atu o ia i le Atua. O se

fiafiaga tele i le loto o lenei fafine, ina ua maua lona malologa lelei mai lenei puapuaga tele na ia tauaveina i le sefulu valu tausaga. Ua vivii ma avatu le faafetai mai totonu o lona loto i le Atua Soifua. Fai mai le faaseā a le pule o le sunako, ua ita ina ua faamalolo e Iesu lenei fafine, i le motu o tagata. E ono ia aso e tatau ona galulue ai, o aso ia tou te o mai ai ia faamaloloina, ae aua lava i le sapati.

Ua tali atu Iesu i le pule o le sunako, o outou na o tagata faafiaamitonu, ua le taitasi ea outou i le sapati ma tatala i lana povi po o lana asini i le falepovi ma taitai e faainu? A o le fafine nei o le afafine o Aperaamo, ua noanoatia e Satani i nei tausaga e sefulu valu, e le tatau ea ona tatalaina lenei noanoaga ia te ia i le Aso Sapati? O le finagalo o Iesu o le Sapati e maua ai e tagata le malologa lelei mai puapuaga ma mafatiaga o le lalolagi nei. Ia saoloto tagata uma mai tiga o le tino ma le mafaufau, aemaise le agaga ma le loto ia maua le filemu o le Atua.

O le finagalo o Iesu, e taua ma faasilisili le faatinoga o le alofa mo le faaolaina o tagata nai lo le tausi o tulafono o le sapati. Afai e mafai ona tatalaina povi ma asini e faainu i le Sapati, e le sili ea ona tatau ona faatino le galuega alofa ia lavea’iina le ola o le tagata ua mafatia ma puapuagaina. O le tagata na faia i le faatusa paia o le Atua ma manavaina atu i ai le manava ola.

O le finagalo o Iesu e taua aso uma, o so o se aso e faamaloloina ai i tatou mai ma’i faigata, ma lavea’iina mai i tatou mai faalavelave faafuasei, o lena aso e ta’ua o le sapati aua o le aso ua maua ai lou malologa lelei. E taua aso uma, auā o aso uma e tatou te faatinoina ai galuega o le alofa mo isi tagata, ina ia maua e na tagata malologa lelei mai i galuega alofa ua tatou faia mo i latou.

O le uiga lena o le tatou mataupu, e pei o Iesu Keriso na Ia faia le galuega sili o le alofa, ua ia foa’i mai lona soifua ina ia tatou faaolaina ai, ma tatou maua ai le malologa lelei mai le pologa o le ola agasala. Ia manuia outou le fanau.

GALUEGA FAATINO:

- 1. Ta’u mai ni galuega se lima e tatau ona faia i le Aso Sapati.
- i) Alu i le falema’i pe a ma’i.
- ii) Asiasi i e mama’i.
- iii) Ave meaai ma tagta pagota.
- iv) Alu i le Aoga Aso Sa
- v) Ave lou tamā ua ma’i i le falema’i.

PESE: Pese ma Viiga 207

A’OA’OGA:

- 1. Alu i le lotu i aso uma.
- 2. Ia e faia galuega alofa i so o se tagata.

.....

MANATU TAIALA O IULAI:

O TATOU O TAGATA O LE LAGI

Ia tatou iloa o tatou o tagata o le lagi. O lo tatou faasinomaga lea. Ia tatou iloa na faia i tatou e le Atua i lona faatusa. Ua ia manava mai lona manava ola, ma ua tatou ola ma tutupu a’e ai. E le gata ua tatou tutupu a’e, a ia tatou iloa le tautiga o le Atua, ina ia mafai ona i ai faatasi ma Ia i le lagi, ma tatou olioli faatasi i ona manuia faavavau.

ASO SA:

4 IULAI 2021

MATAUPU:

UA FAAMANUIA LE ATUA I ONA TAGATA I LE LALOLAGI

SINI:

Ia malamalama le fanau o le finagalo o le Atua ia ola ma manuia lana fanau i le lalolagi. Ia iloa foi e le fanau afai e amio lelei tagata e maua faamanuiaga mai le Atua.

TUSI FAITAU:

Kenese 9: 1 – 7

FESOASOANI MO FAIAOGA:

O le vaega o le tusi a Kenese 9: 1 – 7, ua faamanuia atu le Atua i mea uma, na faasaoina mai le lolo. E aofia ai Noa ma lona toalua ma lana fanau, o manu vaefa uma, o manu fetolofi o manu felelei uma, ma isi mea uma.

O le faamanuiaga lenei a le Atua, ua taua o le faamanuiaga o le feagaiga ma lana foafoaga ua faafouina. Ia manatua foi ina ua mau le vai ma manu ae tumutumu o mauga, ona tatala ai lea e Noa o le faamalama o le vaa na ia faia. Ua ia tu’u atu ai le oreva, ua lele atu ia fetoitoia’i. Ona manatu ai lea o Noa, o fafo atu o le vaa, ua lē toe i ai se ola, ua na o mea mamate ma tagata oti. Ona tatalo ai lea o Noa i le Atua ma ia fesiligia; Pe mata e toe i ai se ola, pe na o le oti o le a i ai i le lalolagi?

Peitai, ina ua toe tuuina atu faalua le lupe mai le vaa, ma toe foi mai ia Noa i le afiafi ma le lau olive mata, o le faailoga mai le Atua ia Noa, o lo o i ai pea le ola i le lalolagi, auā o lo o siomia pea le foafoaga aoao i le malamalama o lona Alofa Tunoa (Kenese 8: 6- 8)

O faamanuiaga la o loo taua i le tatou mataupu i lenei Aso Sa ua fai ma Feagaiga i le va o le Atua ma Noa ma mea uma o le foafoaga ua faafouina e le Atua. E tumau pea faamanuiaga e pei ona muai folafola ia Atamu i le amataga e pei ona taua i le

Kenese 1: 28. Ia outou fanafanau, ma ia uluola, ma ia tumu le lalolagi. Ua tuuina atu foi le pule i mea uma lava o laau, o manu vaefa ma manu felelei, e fai foi ma a latou meaai. Pau lava le mea e le tatau ona latou faia, o le aai i tino o manu o lo o i ai le toto. E tatau ona faavelaina lelei tino o manu ona faatoa fa'aaoga lea mo meaai. Aua o aano o manu o i ai le ola, o lona toto foi lea, ia aua tou te aai ai.

I le uluai faamanuiaga ia Atamu, na fetalai atu ai le Atua, Kenese 2: 16. O laau uma o le faatoaga e te ai ai. A o le Feagaiga o le faafouina o le foafoaga, ua faaopoopo atu ai ma aano o manu e fai ma meaai a tagata. O faamanuiaga a le Atua, ona o le faatinoga o mea lelei e tagata. Ia 'aua nei galo i tagata, le aoga ma le taua o manu i le faatinoga o galuega mamafa o feagai ma tagata. O lenei faatagaga o le avea o tino o manu e fai ma meaai, ia fai ma le faatauta lelei i le fa'aaogaina, ae 'aua le faatautala. Ia 'aua le faataugaina lo latou ola ma faatamaia i auala le alofa. Ia manatua e le tagata o ia o le tausii mea, ma le leoleo ina ia tumau le saogalemu o mea uma o le foafoaga ma le ola manuia i aso uma.

I lenei faamanuia a le Atua ia Noa ma lana fanau, na matua faasaina ai le aina o manu fasi e lei faavelaina. O le finagalo o le Atua, ia faaeteete tagata i le soona faamaligiina o toto o manu, ina nei fai ma masani a tagata, ona avea lea ma mea e faigofie ai foi e le tagata le faamaligiina o le toto o le isi uso a tagata.

Ua poloa'iina foi Noa ma lana fanau, "O se na te faamaligiina le toto o le tagata, e faamaligiina lona lava toto e le tagata, auā o le faatusa o le Alii na fai e Ia le tagata. Ua na o le Atua foi e i ai le pule i le ola o le tagata. O le faamanuia a le Atua mo le lelei ma le manuia o tagata. A oo ina fai faatautala e tagata nei manuia lelei, ona mapuna mai ai lea o mea e tiga ai, ma oo mai ai ma puapuaga.

O le faamai o le covid 19, na mafua mai i aano o manu, e le tatau ona fasia ma fai ma meaai. Peitai, ua fa'aaogaina e tagata fai pisinisi e saili ai le tamaoiga, e ui lava ua uma ona fetalai mai le Atua, i ituaiga manu e fai ma meaai, a ua lē mafai lava le tuinanau leaga o le tagata. Ua a nei? Ua oo mai lenei faama'i

oti, ua leai se poto po o se malosi o le tagata na te mafai ona fofoina lenei puapuaga.

Le fanau i lenei taeao, ia tatou ola ma malamalama i lo tatou Atua, ua faamanuia mai ia i tatou i mea lelei uma, ina ia tatou ola fiafia ai i aso uma. O Iesu Keriso lo tatou Faaola, o le faamanuiaga a le Atua mo tagata i le lalolagi, ina ia maua pea mea lelei o le ola i aso uma, e ala i lona maliu tiga i le satauro ma lona toe tu mamalu mai le oti ma le tuugamau.

GALUEGA FAATINO:

1. Ia ta'u mai ni mea se tolu na faamanuia mai ai le Atua ia Noa ma lana fanau.

Tali: Ia fanafanau, ia uluola, ia aai i aano o manu.

2. Ia ta'u mai ni mea se lua ua poloai mai ai le Atua ia Noa ma lana fanau ia 'aua nei o latou faia.

Tali: Ia 'aua nei aia aano manu fasi ma le toto. Aua le fasioti tagata.

PESE: Pese ma Viiga 197

A'OA'OGA:

1. Ia 'aua le faataugaina le ola o manu ma mea o le foafoaga.

2. Ia faavela lelei tino o manu fasi ona ai lea.

3. Ia 'aua le faamaligi toto.

.....

ASO SA: *11 IULAI 2021*

MATAUPU: *IA FANAUFUINA LE TAGATA MO LE LAGI*

SINI: Ia malamalama le vasega, e finagalo le Atua ia toe fsafouina o tatou olaga agasala, ina ia avea i tatou ma tagata faaolaina i lona malo.

TUSI FAITAU: Ioane 3: 1 – 15

FESOASOANI MO FAIAOGA:

O le tatou mataupu i lenei Aso Sa, ia a’oa’oina le fanau i le ola i se siosiomaga o mea lelei, ma mea e maua ai le ola manuia, e aunoa ma mea leaga ina ia taunuu i le lelei. E tatau i tagata uma ona fanaufouina, auā na fananau mai i tatou ma le agasala. Auā na agasala Atamu ma Eva o uluai tagata, o tamā ma tinā o tagata ola uma, o le mea lea ua tatou fananau mai ai ma le agasala. Ua tatou ola ma tutupu a’e i le fiafia i le agasala. O le agasala ua na aumaia mea leaga uma i o tatou olaga, ma ua tatou lē iloa ai le Atua, na Ia faia i tatou e foliga ia te Ia.

Faafetai ia Iesu Keriso le Alo pele e toatasi o le Atua, ua afio mai o le Faaola mo tagata uma. Ua Ia fanaufouina i tatou uma i lona maliu, ina ia tatou ola i lona Alofa Tunoa, ma ia ola ai i le ola faavavau. O Nikotemo o le Faresaio, e lavea foi i le lio, o le to’a fitusefulu, e taua o le Au Sanetarini, o taitai o le lotu Iutaia. Na alu faalilolilo ia Iesu i le po, ona o le fefe i taitai o le lotu Iutaia. Ua ia molimauina i a’oa’oga a Iesu ma vavega ua faia, le tulaga ‘ese lava o le faailoa mai o le Atua i le soifua o Iesu. Ua ia amata ai lana faafeiloai ia Iesu, i lona faapea atu, “Rapi e, ua matou iloa o oe o le aoao ua maliu mai, mai le Atua, aua e lē mafai e se tasi ona fai o ia faailoga e te faia.

O le tali la a Iesu ia Nikotemo e faailoa atu, o lo o malamalama lelei lava Iesu, i le pogai o le pogisa o tagata o le lalolagi, i le

Atua ma lona malo o i le lagi. Ua fetalai atu ai Iesu, “E moni, e moni, ou te fai atu ia te oe, a le toe fanau le tagata, e lē mafai ona iloa e ia o le malo o le Atua.”

Ua faigata ona malamalama Nikotemo i le fetalaiga lenei a Iesu, aua foi o tagata ua pulea e manaoga o le lalolagi, ma tuinanauga o le tino. Ua matua pogisa atoa le lalolagi o le tagata i le Atua, ua leai se malamalama o le alofa tunoa, e iloa ai o le lotu ma le agaga o le tagata e foliga i le Atua. Ua fai mai Nikotemo, pe faapefea ona toe fanau mai le tagata, ua toeaina? Ua fetalai atu Iesu, “E moni, e moni, ou te fai atu ia te oe, afai e le fanau se tasi i le vai ma le Agaga, e le mafai ona sao o ia i le malo o le Atua. O le ua fanau mai i la le tino, o le tino lea, o le ua fanau mai foi i la le Agaga o le agaga lea.”

O le fetalaiga lenei a Iesu, ua faatepa ai Nikotemo ma taitai o le lotu Iutaia, i le faamoemoe o le Atua mo le tagata na Ia fetalai ai i isi auaiga o lona aiga fofoa; “Ina tatou faia ia le tagata i lo tatou faatusa, ia foliga ia i tatou. O le tino ua faia i le faatusa o le Atua a o le lotu ma le agaga o le tagata ia foliga i le Atua. Aua o le manava ola na puaina mai i fofoga o le Atua, o lo o ola ai, ma ia tusa lona ola ma le soifua o le Atua. Ia foliga i le Atua le amio i le olaga atoa. O le uiga sili lea ona faigofie, ia malamalama i ai tagata uma i le fetalaiga a Iesu, “E moni, e moni, ou te fai atu ia te oe, a le toe fanau le tagata, e le mafai ona iloa e ia le malo o le Atua.

Ia ‘ave ‘ese e tagata uma mea leaga o i totonu o le lotu, a ia fa’aavanoa mo le Agaga o le Atua. Ia tulai mai tagata uma, e pei o le uluai taimi na faia ai e le Atua i le amataga o le foafoaga.

O le a’oa’oga lenei o le tatou mataupu i lenei Aso Sa; Ua manaomia e Iesu le toe fanau o i tatou, meamanū o outou laiti, ina ia ola ma tutupu ae o ni fanau, ua outou iloa le malo o le Atua, ma avea outou o fanau, latou te tufi taufao manuia o le Atua.

Ua maea tapena e Iesu Keriso le faaolataga mo le lalolagi, ua afio ae i le lagi ua Ia auina mai lona Agaga Paia o le meaalofa sili, e lavea’iina i tatou mai le leaga, a ia mafai ona tatou aulia atu le malo o le Atua, o lo o i ai lona olioli ma lona filemu faavavau.

Ia manuia le Aso Sa.

GALUEGA FAATINO:

Ta'u mai ni fua o le Agaga, o lo o ola ai le tagata ua toe fanaufouina mai.

1. Alofa
2. Amiotonu
3. Salamo mai le leaga
4. Usitai
5. Loto maulalo

PESE: Pese & Viiga 115

A'OA'OGA

1. Ia ola i le alofa i aso uma.
2. Ia mata'u i le Atua.
3. Toaga e tatalo.

.....

ASO SA: 18 IULAI 2021

MATAUPU: E LEOLEO E LE ATUA TAGATA AMIOTONU

SINI: Ia malamalama le vasega e leoleo e le Atua tagata amiotonu ina ia faatuatua ma tumau i le faalagolago ia te Ia, e mafai ai ona faatino le ola mata'u i le Atua.

TUSI FAITAU: 1 Samuelu 26: 13 – 25

FESOASOANI MO FAIAOGA:

O le tatou tusi faitau, ua fai ma mataupu o lenei Aso Sa, o lo o faamatalaina mai ai le naunautaiga pea o le tupu o Saulo e faaumatia le ola o Tavita, ina ia 'aua lava le avea Tavita ma tupu o Isaraelu.

O le tu ma aganuu a Isaraelu, o i latou e au i le nofoaiga tupu, o le tamā o lo o avea ma tupu ma ona atalii, ma fanau e tupuga mai ia te ia. Peitai, e le faapea le finagalo o le Atua, mo lona nuu o Isaraelu. O tofiga uma e aofia ai le filifilia o se tupu o Isaraelu, e mai le pule a le Atua, e na te tofofi ai tagata e matata'u ma amiotonu, mo le lelei pulea mo le manuia o tagata uma.

O le faalua ai lea, ona saili e le tupu o Saulo, ma ona tagata o Tavita e faaumatia lon ola. Peitai, o le sailiga a le tupu o Saulo e faaumatia le ola o Tavita, ua avea ma avanoa paganoa ua tuuina atu e le Atua ia Tavita, e na te fasiotia ai le tupu o Saulo. Aua foi, e leoleo e le Atua ona tagata amiotonu. O tagata ua leai se mea sese ua faia, ua na o mea lelei o lo o faatino i aso uma, e le tatau ai ona oo i ai se leaga.

Ua malolo le tupu o Saulo ma ona tagata i le po, mo se faasiliga malosi, e mafai ai ona faataunuu lo latou faamoemoe. O le latou malologa lea, ua avatu ai e le Atua, le moegase ia i latou uma, e pei ona faamoegaseina o Atamu, ae toina le tasi ona ivi asoaso ma fai ai Eva. Ua latou le lagonaina lava se mea e tasi. Ua lē avea lea avanoa ua maua e Tavita e fasiotia ai Saulo e faaosoosoina ai lona loto fuaifua ifo lelei, o lo o i ai le loto maulalo ma le amiotonu a le Atua.

Ua manatu Tavita ua avea le tofiga a le Atua ia te ia e fai ma tupu o Isaraelu, ua fai ai o ia ma fili o le tupu o Saulo. O le gaioiga ua faia e Saulo, o lona fouvale lava i le Atua ma Lona finagalo.

Ua lagona ai e Tavita e le tatau ai ia te ia, ona faaoo se leaga ia Saulo, auā o lē na faauuina e le Atua e fai ma tupu. O le Atua foi i lana faamasinoga amiotonu, e na te faia ai lana faaiuga ia Saulo ma lana fouvale i lona finagalo. A o ia o Tavita, e tumau pea lona loto maulalo, ma faalagolago ma faatuatua pea i le Atua, e leoleo ma faaolaina o ia mai fouvalega a le tupu o Saulo. E pei

ona tautala ai Tavita ia Apisai, 1 Samuelu 26: 9 & 10 ‘Aua e te fasioti ia te ia, auā po o ai ea na te faaoo lona lima i le ua faauuina e le Alii, a e le nofo sala ai o ia? O lo o soifua le Alii, e fasia lava o ia e le Alii, pe oo i ona aso e oti ai, pe alu ifo i se taua e fano ai. Ia faamamao e le Alii ia te au, ina nei faaoo lo’u lima i le ua faauuina e le Alii. Ona tago ai lea o Apisai i le fagu vai ma le tao a le tupu o Saulo ma ua o ma Tavita, a ua le fasiotia o ia.

Ua alu atu Tavita ma tu mai i le tumutumu o le mauga, e tele se mea ua va a’i ai ma Saulo ma lana vaega, ua valaau leo tele mai lea ia Isaraelu ma Apineru le taitai au a le tupu o Saulo. Ua faapea mai ia Apineru, E le se toa ea oe? O ai se lua te tusa ma oe ia Isaraelu? O le ā le mea e te le leoleo ai lou alii le tupu? Auā na alu atu le tasi tagata e fasioti lou alii le tupu. E lē lelei lenei mea ua e faia, o lo o soifua le Alii, o tagata e tatau ona oti outou, auā na outou le leoleo i lo outou alii le ua faauuina e le Alii, o lenei foi ina iloilo po o fea le tao a le tupu ma le fagu vai sa i tafatafa o lona ao? Ua iloa e Saulo ua faasaoina e Tavita lona ola. A o le faailoga lea ua faailoa atu ai e Tavita ia Saulo, le lei o sona fouvale lava e tasi i lana nofoaiga tupu.

Afai o lenei mea ua tupu mai, e afua mai le Atua, ia e faamaulalo ma fai se taulaga o le loto salamō i le Atua. Ae afai e mafua mai ona o upu faaososo o tagata, ia malaia i latou mai luma o le Alii, auā ua latou tuli ese ia te au mai le tofi o le Alii, ina ia ou alu ou te auauna i atua ese. Faauta, pei ona faapelepeleina lou ola e au i lenei po, ia faapea foi ona faapelepeleina lou ola e le Alii, ma ia lavea’i ia te au ai puapuaga uma.

Ua tali mai le tupu o Saulo ia Tavita i lana faamanuia. Ia manuia oe lou atalii e Tavita, e te faia e oe mea sili ma e malo pea lava.

Le fanau e, i lenei taeao o le Aso Sa, o le aogā lea o lo tatou iloa ma malamalama i afioga a le Atua. E tatou te iloa ai le finagalo o le Atua mo i tatou, ma usiusitai i ai e tatou te manuia ai. E leoleo e le Atua ona tagata uma, e alolofa ia te Ia, ma latou faia le amio lelei i aso uma.

E tau e le Atua tagata uma, latou te sailiili i mea e leaga ai isi tagata. O le finagalo o le Atua mo tagata uma, ia latou fetalai’i i

mea lelei, mo le lelei o tagata uma, e na te matuā leoleoina, ina nei ‘aua nei oo i ai se leaga.

O Iesu Keriso, o le leoleo mamoe sili, e na te leoleo i o tatou agaga, ina ia tatou faia pea mea lelei i aso uma lava.

GALUEGA FAATINO: Faatinoga

Ia faatino le tala.

1. Le valaau a Taviota ia Apineru
2. Le tali atu a Saulo ia Tavita.
3. Le toe tali atu a Tavita ia Saulo.

PESE: Pese ma Viiga 66

A’OA’OGA:

1. Ia fai oe ma leoleo i lou aiga.
2. E leoleo oe e le Atua mai mea leaga uma.
3. O Iesu o le leoleo sili.

.....

ASO SA: 25 IULAI 2021

MATAUPU: O IESU O LA TATOU UO

SINI: Ia malamalama le vasega, o Iesu o la tatou uo, pe afai tatou te faia mea uma lava e fetalai mai ai o Ia tatou te faia.

TUSI FAITAU: Ioane 15: 11 – 17

FESOASOANI MO FAIAOGA:

O upu ogatotonu o lenei vaega o le tatou tusi faitau, ua fai ma tatou mataupu o lenei Aso Sa, o le fetalaiga a Iesu i ona so'o, "Ua le filifilia au e outou, a ua filifilia outou e ai..." E lē o tatou ua filifilia le Atua, a o le Atua i lona alofa tunoa, ua ia faalatalata mai i lona valaauina o i tatou, ma ofo mai lenei avanoa o lona malamalama o le alofa fua mai. Mai lenei vaega o le tusi faitau ua fai ma tatou mataupu, e tele ma anoanoa'i mea lelei ua filifilia mo lo tatou valaauina. Ua filifilia i tatou ina ia tatou olioli. Peitai, o le faigata ia ona tatou ausia le olioli. Ae afai tatou te amio lelei, ma fai mea sa'o ma le tonu, ona tatou maua lea o le olioli.

O i tatou le fanau, ua faamagaloina a tatou agasala, i le maliu tigā o Keriso, pe afai tatou te talia o Ia ma faatuatua i lona alofa. O a puapuaga ma mea faigata tatou te fetai, e le mafai e ia mea ona aveesea le fiafia ma le olioli, auā ua tatou savavali faatasi ma Iesu i lona soifua ua uma ona Ia faailoa mai. Ua filifilia i tatou ina ia tatou alolofa. Ua auina mai i tatou e le Atua i le lalolagi, ina ia tatou alolofa i so o se tagata. E lei valaauina i tatou i lenei lalolagi, ina ia tatou tauva ma isi tagata, pe tatou te feaina'i ma femisaa'i. O lo tatou i ai i lenei lalolagi, o lo tatou ola e fetalai'i i mea lelei, e atili ai le lelei ma manuia faatasi ai mea uma. E pei o le finagalo o le Atua i lana foafoaga aoao. E faalagolago le lelei o le isi mea o le foafoaga i le lelei mai le isi mea e tumau ai pea le lelei.

Afai tatou te fesili, O le a le aiā ia te oe ma a'u, e faamalosia le alofa fetalai'i o le fanau a tagata? O le tali a Iesu i lenei fesili, o lo o faamauina i le fuaiupu 13, "E le sili lava le alofa o se tasi i lenei alofa, ia tuuina atu e se tasi lona ola mo ana uo." Ma na faatinoina e Keriso le alofa i luga o le satauro. Ia tatou ola ma tutupu a'e i le alofa o Iesu Keriso, ona maua lea o le olioli ma le filemu.

Ua valaau Iesu ia i tatou, ina ia fai o Ia ma tatou uo, o lona uiga ua fia fai uo Iesu ia i tatou. Ua le finagalo Iesu e taua i tatou o auauna, ua ia naunau ia fia fai uo mai ia i tatou. O aso anamua i

le Feagaiga Tuai, na ta'ua ai e le Atua e ua tofofi ma valaauina mo lona finagalo, o auauna. E pei o Mose, o le auauna a le Atua (Teuterenome 34: 5), o Iosua (Iosua 24: 29), faapena foi ia Tavita (Salamo 89: 20). Sa olioli ma fiafia ina ua ta'ua i latou e le Atua, o ana auauna. Peitai, i le afio mai o Iesu e faatino le faaolataga a le Atua mo le lalolagi uma, ua Ia fetalai atu ai i ona soo, ma i latou uma e faalogo i ana a'oa'oga ma ola ai, e na te le toe taua i latou o ni auauna. Ae ua Ia avatu ia te i latou se tulaga maua, o i latou o uo. O le uo, o le faaupuga lea na ta'ua ai e le Atua Aperamo ona o lona faatuatua (Isaia 41: 8) O Iesu Keriso ua na taua i tatou o ana uo, ma uo a le Atua. O le ofo ua matagofie. O lona uiga, ua le toe vavamamao i tatou ma le Atua, a ua tatou militino faatasi ma Ia.

Ua valaauina foi tatou o amapasa o le Malo o le Atua, e tatou te folafola ma talai lana Tala Lelei i nuu uma,. Ua Ia valaauina foi tatou, ina ia o tatou fua mai ni amio lelei ma ola ai ma tumau ai pea i aso uma. O lo tatou ola i le amio lelei, o lo tatou faailoa atu lava lea, ma folafola le Tala Lelei a Iesu i tagata uma.

Le fanau pele a le Atua, o le naunautai lea a lo tatou Alii Faaola o Iesu Keriso mo i tatou, ina ia mafai ona avea i tatou ma ana uo, ina ua tatou ola i le amio lelei i aso uma. E manumanu lava lo tatou Alii o Iesu i maumau lo tatou ola i tuinanauga o le agasala, a o lo o ia te Ia manuia, ua sauni e foai mai mo lo tatou lelei au i luma.

O le mea lea na afio mai ai i le lalolagi, ina ia le fano lava se tasi o i tatou, a ia faaolaina i tatou i le ola faavavau i lona lava soifua tuuina mai mo i tatou o ana uo.

GALUEGA FAATINO:

Faailoa mai ni amio se lima o lo o e ola ai e iloa o oe o le uo a Iesu.

1. Valaauina e faatino le mea sa'o.
2. Valaauina e faatino le alofa.
3. Valaauina i le loto maua.

4. Valaauina ia ola usitai ma faalogo.
5. Valaauina i le amio lelei i aso uma.

PESE: Pese ma Viiga 74

A’OA’OGA:

1. Ia fai i tatou ma uo a Iesu.
2. Ia foliga a tatou amio ia Iesu.
3. Ia fai le amiotonu a Iesu.

.....

**MANATU TAIALA O AOKUSO:
O FEA E SAILII AI LE LOTO MALIE?**

Ia tatou malamalama lelei, o le tele ia o mea o lenei lalolagi, e foliga mai latou te aumaia le loto faamalieina. Peitai, ua tatou molimauina ua na o se taimi puupuu lava. O le mea lea e taumafai atu ai pea le Tala Lelei ma Afioga a le Atua, ina ia outou iloa, o le Atua lava e malie ai o tatou manao i mea lelei uma.

ASO SA: *1 AOKUSO 2021*

MATAUPU: *O LE OLIOLI ONA O MANUIA MAI LE ATUA*

SINI: Ia malamalama le vasega, o le finagalo lava lea o le Atua, ia olioli tagata uma ina ua latou maua ona manuia, ma ola fiafia ai i le lalolagi ua ia foafoaina.

TUSI FAITAU: Isaia 35: 1 – 10

FESOASOANI MO FAIAOGA:

Fai mai le Faataoto 8: 31, Sa ou olioli i mea e mau ai tagata i lona lalolagi; o lo’u fiafia foi, sa i le fanau o tagata lea. O le finagalo tonu lava lea o le Atua, na i ai i le amataga o le foafoaga. Na Ia faasilisili ai mea uma mo lana tagata. A o le mea lava lea e taumulimuli mai ai lava le silafaga a le Atua ma lona agalelei, ina ia mafai lava ona toe foi atu le tagata ia te Ia, ina ia olioli ona o manuia ua maea saunia.

O le uiga moni ma le aano lenei o le solo po o le pese a le perofeta o Isaia, na lagiina e le Agaga o le Atua, ina ia iloa e Isaraelu, ma tagata uma e aofia ai ma tatou e faitau i ai, le tulaga ‘ese o le alofa tulituliloa o le Atua mo i tatou. Pe tatou te leaga faia lava ae tuuavanao mai lava, ma faatalitai ma taumulimuli mai pea, seia tatou lagonaina, se ola faamalieina ona tatou toe liliu atu lea ia te Ia, o lo o maualuga pea lona alofa tunoa; e maua ai le olioli moni.

A o i ai Isaraelu i le toafa i tausaga e 40 sefulu, na sapaapaia i aao o le Atua i latou, e pei ona sapaapaia e le tamā i lona atalii, i mea uma na feoi ai, seia taunuu i le nuu folafolaina. I le fasefulu o tausaga i le toafa, na leai se mea na mativa ai, na fafaga ma faafeinu e le Atua. I le toafa, na a’oa’oina ai e le Atua Isaraelu i le loto maualalo, ma fafaga i le manai mai le lagi, ina ia latou iloa, e le na o meaai e ola ai le tagata, a o afioga uma e tulei mai le fofoga o le Atua e ola ma manuia ai le tagata. O le toafa foi, na faafaileleina ai e le Atua le ola faaleagaga o le nuu o Isaraelu, ma faatonutonuina ai le amio e tatau mo aso uma. Ua tuuina mai ai ana tulafono ma ana afioga, ia malamalama i ai ma ola ai, ina ia latou maua le olioli o le Atua.

O le mea lea, ua taua ai le toafa ua fuga mai e pei o le aute. E fua tele mai lava ia, e fiafia foi ma le fiafia tele, ma le alaga e avatu i ai le lalelei o Lepanona, ma le matagofie o Karamelu ma Sarona, latou te vaavaai i le pupula o le Alii, o le matagofie o lo latou Atua.

O le lalelei o Lepanona, ma le matagofie o Karamelu ma Sarona o nofoaga e tolu, o lo o aave lona ta’uta’ua i lo latou matagofie.

E i le talafatai o le sami Metitirane, e tusa ma le 25 maila le mamao mai le sami i Kalilaia. O le laueleele mauga ma e ufitia e le Kiona, e tafe mai ai vai, ma ola lausiusi ai le laau o le arasi.

O laau o le arasi, na mo'omo'o i ai le tupu o Solomona, na ia talosagaina ai le tupu o Turo o Harima lona igoa, ina ia maua mai arasi mai Lapanona, e fausia ai le malumalu o le Atua i Ierusalem. Aua o le arasi o le laau e fausia ai maota o tupu, ma le malumalu o le Tupu o le lagi ma le lalolagi i Ierusalem. O le mauga o Karamelu e i talafatai foi o le Metitirane, e tusa ma le 17 maila mai Sisifo le sami Kalilaia, e tamaoiga i uaga mai le lagi, e ola lausiusi ai le vaomatua.

O le Sarona, o le laueleele laugatasi, e i le talafatai foi o le sami Metitirane i le itu Sauté o le mauga o Karamelu e tusa e 35 i le 40 maila lo la va, e tautaua i lona laueleele e taumaoiga i minerale, e ola ma fuga mai ai fugalaau matagofie, e tosina i ai mata ma loto i lo latou lalelei.

O nofoaga uma nei e tolu, o lo o i le talafatai o le sami Metitirane, e matua valavala i foliga vaaia o le toafa. E matua leai lava se mea lelei e tupu mai le toafa. A o lea ua fai mai le pese ma le solo a le Perofeta o Isaia, o le toafa o le a tutusa ma le matagofie o nei nofoaga. Ioe, o le olioli lena e maua e tagata mai le Atua, pe afai latou te fia maua le faamalieina i mea lelei.

Fai mai foi le Perofeta o Isaia, o Isaraelu ua fa'aunuua i le tele o tausaga, e faapena foi i tatou uma, ua fa'aunuua i tatou i lenei lalolagi ua tusa ma le toafa, ua mitiia ai lo tatou malosi faaleagaga ma leai se malosi i le tino. A ua fetalai mai le Atua ou te faafoisia lo outou malosi, ma faafouina o outou agaga. Ia outou faamalolosi, ma 'aua le fefefe, faauta o lo outou Atua, o le a oo mai ma le tau ma sui, e afio mai lava o Ia ma faaola ia te outou. O le fefe e tatavale ai le fatu, ma vaivai o outou tino. 'Aua le popole, o le Atua ua afio e i ai faatasi ma outou.

E na te faatulai mai Kuresa le sili, o Peresia e faatoilalo ia Papelonia, ma pulea i lona malosi le lalolagi, ma ia faasaoloto ia Isaraelu ma toe foi le tafeaga i Ierusalem. O le Atua foi, e afio mai faapupula mata o le tauaso, ma tatala le faalogo oe o logonoa, o pipili e oso e pei o tamai oti ma e gūgū, e tatala la latou tautala,

ma pepese mai i viiga o le Atua. O le Atua o Isaraelu, o le Atua foi lea o tagata uma, e aofia ai ma i tatou.

O mea o lo o tutupu ia Isaraelu i le Feagaiga Tuai, o mea foi ia o lo o tutupu ia te i tatou i le taimi nei i lo tatou lalolagi. O lo o tatou ola ai i le taimi nei. Ua a'oa'o mai le pese a le Perofeta o Isaia, ina ia tatou faamalolosi ma loto tetele, auā e oo mai lo tatou Atua e na te faamalolosi i o tatou tulivae ua vaivai. Ia tatou faamoemoe pea ma faalagolago ma faatuatua i le Atua, e afio mai lava o Ia ma faaola ia te i tatou.

O lo tatou popole ma atuatuvaile i ia mea faigata, o le Atua na te togiolaina i tatou, e na te aumaia le alaga ma le olioli faavavau i luga o tatou ulu, tatou te maua le olioli ma le fiafia ae sosola ese le faanoanoa ma le mapuitiga. O Iesu Keriso lava lea, o le Atua ua afio mai, ua na aumaia le olioli ma le filemu i lana fanau faatuatua e ala i lona maliu tiga i le satauro, ma lona toe tu manumalo mai le oti ma le tuugamau.

GALUEGA FAATINO:

Sei tau mai ni mea se fa o lo o taua e le tusi faitau, e faia e le Atua e faaolaina ai i latou o lo o mafatia i ma'i tumau.

1. Pupula mata o tauaso.
2. Faalogo taliga o ē tutuli.
3. Osooso le pipili.
4. Pese le laulaufaiva o le gūgū.

PESE: Pese ma Viiga 34

A'OA'OGA:

1. E maua le olioli i le faatuatua i le Atua.
2. O le Atua o le foma'i o tatou ma'i uma.
3. E liliuina e le Atua puapuaga, e tupu mai ai le olioli.

.....

ASO SA: **8 AOKUSO 2021**

MATAUPU: **O LE TAMĀ LELEI (ASO O TAMĀ)**

SINI: Ia malamalama le vasega, i uiga ma le amio a le tamā e mafai ai ona ta’ua o ia o le tamā lelei.

TUSI FAITAU: Luka 15: 17 – 24

FESOASOANI MO FAIAOGA:

O le tatou tusi faitau i lenei Aso Sa ua fai ma tatou mataupu; Luka 15: 17 – 24, o le tala masani ua outou faalogologo so’o foi i ai. O le atalii faamaumau oa. Peitai, o le tatou mataupu i lenei taeao, ua lē faamamafaina le atalii, a ua tatou faatauaina le tamā. O le tamā ma ona atalii e toalua.

O le tamā lelei, e iloa i lona magafagafa, e galue ai mo mea lelei e manuia ai lona aiga i le lumanai. E galue ma tapenapena ma faasao le tamaoiga e tua i ai lona aiga ma lana fanau i le lumanai. Aua a oo i le taimi, ua muta ai lona ola, a ua saunia lelei mea uma mo le manuia o le fanau i le lumanai. I le vaega o le faataoto lenei, o lo o faamatala mai ai le mana’oga faanatinati o le uii, o le atalii laitiiti o le tamā, ina ia tuuina atu loa lona vaega o lona tofi o le oa, o lo o teuina mo ana fuafuaga ua ia fia faatino.

Ua le fesiligia e le tamā lona atalii, pe aisea ua ia mana’omia ai le vaega o lona tofi o le oa? Ae ua tuuina atu loa e tusa ma le mana’o o lona atalii. E ui ina mafatia le tamā ona o le la mafutaga ma lona atalii o le a motusia, a ua fai lava le mana’o o le atalii.

Ua liliuina i tupe le tofi o le oa o le atalii, ma alu atu loa i le lalolagi tele, ma ua faamalieina ai lona mana’o i mea faafiafia eseese. Ua tele ana uo ua maua, ona o le tele o lona tamaoiga. Ua auai atu ma ana uo i lea faafiafiaga, ma mea faatosina matagofie i le vaaiga o mata e faamalieina ai le tuinanau o le loto

i mea o le lalolagi. Ua soona fa’aalu le oa, ua leai se fuafua tatau, ae galo i le uii, ua vave tele ona mitia e mea faafiafia ia, ma le faatosina o ana uo, le oa ma le tamaoiga o lo o ia te ia.

E lei leva lava ona faatamoe e tuinanauga o mea faafiafia ‘ese’ese o lo o mana’o i ai le loto o le uii, ma le taufaavalea o ana uo, ae uma le oa sa ia te ia.

Ua sosola ana uo, ua tuua na’o ia. Ua oge le nuu sa i ai o ia ona faatoa tofo ai lea o ia i le mativa, auā ua uma atu le tamaoiga sa ia te ia. Ua fia ai, ona ia saili ai lea o se galuega e maua ai se tupe e ‘ai ai.

Ua nofo i le tasi tagata o le nuu, ua fai o ia ma faga puua. Ua le lava lona tofogi e maona ai, ona tupu lea o lona manao i atigi mea e aina e puua ia maona ai o ia, ua leai lava se tagata ua avane sina mea ia te ia.

Ona ia manatua ai lea o lona tamā, ma lona aiga. O lona tamā sa ia galue ma faaputu mea mo lona lelei manuia. Ua ia faanatinati ona faatonu lona tamā, ina ia tuu mai ia lona tofi o le oa, sei alu malaga ai. Lenei ua uma atu i ona tuinanauga o le lalolagi, ma le taufaavalea o ana uo. Ua tuua na o ia ua mativa, ua aai faatasi ma puua. Ua tu mai ai lea i ona luma lona tamā. O lona tamā o lo o faulai lona tamaoiga, e toatele ana auauna, o lo o aai ma maona i mea lelei, o lo o totoe le tele o meaai, e sili ona maloloina lelei ai lona ola pe a ai ai, i lo lona aai faatasi ma puua i lana galuega o i ai nei.

Ona atamai ai lea o ia, ua tulai ma alu i lona tamā, ma faapea ifo i lona loto, ou te fai atu, “Lo’u tamā e, ua ou agasala i Le o i le lagi, atoa ma ou luma, ua ou lē toe aoga ona taua o lou atalii, ia avea a’u pei o se tasi o au auauna.

Peitai, na vaai mamao mai lava le tamā, ma ona iloa atu ai o lona atalii lea ua fo’i atu ia te ia. E lei faatali le tamā i le taunuu atu o lona atalii, ma fai atu se faatoesega. A ua mutimutivale lona alofa, ua momo’e atu ia te ia, ua fusi mai ma sogi atu ia te ia. “Lo’u tamā e, ua ou agasala i Le o i le lagi, atoa ma ou luma, ua ou lē toe aoga ona ta’ua o lou atalii.”

A ua valaau atu le tamā i ana auauna, “Aumai ia loa le ofu tatapuvae e aupito lelei, ma faaofu ia te ia, ma tuu se mama i lona

lima, ma faasee i ona vae; au mai ia foi se tamai povi peti, ma fasi, tatou te aai ma olioli, aua o lou atalii lenei, na oti ua toe ola mai, na le iloa foi o ia, a ua maua.”

O le uiga lea ma le a’oa’oga o le tatou mataupu i lenei Aso Sa. E faapea foi lo tatou va nonofo ai ma lo tatou Atua lo tatou Tamā. Ua uma ona saunia lelei e le tatou Atua lo tatou Tamā, mea lelei uma, mo lo tatou ola manuia i aso uma. Ua ia saunia foi lo tatou tofi o le oa o lona malo o le lagi, ae tatou te naunau pea i tuinanauga o le tino, ma mana’oga o le lalolagi, ma tatou tuu ai le mafutaga mafanafana ma lo tatou Atua lo tatou Tamā. E ui ina mafatia alofa lo tatou Tamā i lo tatou o ‘ese ma Ia, a ua tu’u lava i tatou e fai o tatou loto. Ua tatou o ‘ese ma lo tatou Tamā, ma faamaumau lo tatou malosi e faamalie ai tuinanau o tatou loto i le agasala ma mana’oga o le lalolagi. E oo mai loa puapuaga ma mea tiga o le ola, ua tatou matitiva i le oa mai le Atua, ona faato’a tatou iloa lea o le lagona o le salamō, ma ua tatou fia foi i lo tatou Atua le Tamā.

E ui i lo tatou o ‘ese mai le Atua lo tatou Tamā, e faatalitali pea i lo tatou toe foi atu ia te Ia. O le taimi lava e silasila mai ai o Ia ua tatou foi atu, e momo’e ma fusi atu i tatou ma sapaapaia i ona aao agalelei. E valaau foi i agelu o le lagi e tapena ma saunia le aiga tele o le olioli, ona o i tatou lana fanau na feoti, a ua toe ola, na le iloa, a ua toe maua. O le uiga lena o le tamā lelei.

E faapena foi o tatou tamā na tatou fananau mai ai i le lalolagi. Po o le a lo tatou leaga ma lo tatou fai ma sasa i o tatou tamā, o le taimi lava e sui ai i tatou, o fanau ua fai le amio lelei, o le taimi lava lea e vivii ai o tamā i le Atua le Tamā o tagata uma, ona o fanau ua faafouina o latou olaga.

O Iesu Keriso, na te le’i tuua lava lona Tamā, sa tumau pea ma faia le finagalo o le Atua lo tatou Tamā, ina ia faaolaina i tatou i lona maliu ma lona toetu mamalu, mai le oti ma le tuugamau, ua maua ai lo tatou tofi i le ola faavavau. Ia manuia le Aso Sa.

GALUEGA FAATINO:

Faatino le tala i le toe foi o le uii i lona aiga moni.

PESE: Pese ma Viiga 375

A’OA’OGA:

1. O le Atua lo tatou Tamā lelei.
2. Ia faalogo i le a’oa’o mai o tamā.
3. Ia ‘aia le fia o ‘ese mai tamā.

.....

ASO SA: ***15 AOKUSO 2021***

MATAUPU: ***E MAUA LE LOTO MALIE I LE ATUA***

SINI: Ia malamalama le vasega, e maua le loto malie i le Atua ina ua a’oa’oina lelei i le potu mai ia te Ia.

TUSI FAITAU: Faataoto 3: 1 – 12

FESOASOANI MO FAIAOGA:

O le tatou tusi faitau Faataoto 3: 1 – 12. Ua fai ma tatou mataupu i lenei Aso Sa, o lo o a’oa’o mai ai i tatou e le potu i mea nei:

1. E tataua ona tatou ola faalagolago i le Atua, e maua mai ai lona filemu.
2. Ia tumau le ola mata’u i le Atua, e maua ai le ola maloloina.
3. Ia tatou auauna i le Atua i le tamaoaiga ua tatou maua, o le auala lea e faateleina ai mea i o tatou lima.
4. Ia tumau i tulafono ma poloaiga a le Atua, ia tausi i le loto. Aua e faaopoopoina ai o aso e tele ma tausaga e ola ai ma le manuia.

5. Ia maua'a i lou loto le alofa, ma 'aua le te'a ma oe le faamaoni, ia asoa ai i lou ua, ia e tusi ai i le papa aano o lou loto, ona maua ai lea o le alofa ma le manuia lelei i luma o le Atua atoa ma tagata.
6. O le tagata ma le atalii lelei, e mua'i saili le Atua, ina ia finagalo malie mai, i mea uma na te faia, ona faasilisili ina ai lea e le Atua, i mea lelei uma ma lona manuia, e maua foi le alofa mai ia te ia i le olaga atoa.

O mea ia ua faamalosi mai ai, le poto o Solomona ina ia a'oa'oina e le fanau, ia faamasani i ai ma ia ola ai i aso uma, ona maua ai lea o manuia, ma maua ai le ola faamalieina.

O le naunautaiga o le tupu o Solomona, ia a'oa'oina fanau i mea uma nei ma faamasani i ai i lo latou ola tuputupu a'e, auā a oo ina matutua a'e, ua le toe te'a 'ese ai.

O le manatu maualuga o le tupu o Solomona, afai e a'oa'oina lelei fanau i le ola faalagolago i le poto lea mai le Atua, o le a avea o faamanuiaga mo matua, o le aiga, o le nuu, o le atunuu ma le Ekalesia. Fai mai le poto o Solomona, o a'u foi sa ou tamaitiiti, na matua a'oa'oina lelei a'u e lo'u tamā o Tavita le tupu o Isaraelu. E tele ona tiute i le ta'ita'iga o le nuu o le Atua, ae na tele pea taimi, na ia matuā a'oa'o ai a'u i le poto o le Atua, ina ia ou masani ai, ma ola ai, ina ia manuia lo'u ola i aso uma.

Ua faamanuiaina a'u, ua fai ma tupu o Isaraelu e sui tulaga i lo'u tamā o Tavita, na ia a'oa'oina lelei o a'u i le poto o le Atua ma ua ia finagalo malie mai ai ia te au. O le a'oa'oga mamafa lea a le poto o Solomona mo fanau uma, ia matuā faalogo ma usitai uma i ai, ina ia masani ai, ma ia ola ai i aso uma, ia popoto ai ma maua mai ai le alofa o le Atua.

E faapena foi le a'oa'o mai a lo tatou Alii Faaola o Iesu Keriso i lana lauga umi i luga o le mauga e pei ona faamauiina e Mataio 5 e oo i le mataupu e 7. Ua faaiu ai e Iesu lana lauga i lona fetalai mai, "Ai se faalogo i a'u upu nei, ma faia e ia, ou te faatusaina o ia i le tagata poto, ua na faia lona fale i luga o le papa, ona to mai lea o uaga ua oo mai tafega ua agi mai foi o matagi, ua pesi mai i

lea fale ae le'i pa'u lava ia, auā ua faavaeina i luga o le papa, o Iesu Keriso lea o le Atua ua liutino tagata.

O a'oa'oga ia a le poto o Solomona, ua ia naunau mai ia te outou le fanau, ina ia outou masani ai, ma ola ai i aso uma, ona outou manuia lea.

O le tele ia o mea matagā ua tutupu mai ia te outou fanau aoga. Ua le asa le aso ma fusuga i va o aoga i nofoaga faitele, ua fiafia i inuga ava malosi, ua fa'aaoga sese telefoni feavea'i, ma face book, i uiga matagā. O le fofo sili o nei mau uiga matagā ua tutupu mai, o lo outou faalogo ma usitai i a'oa'oga a le poto o Solomona ina ia outou atamamai ai, ma alofa ina ai outou e le Atua, ma Ia liligi ifo lona manuia ia te outou.

GALUEGA FAATINO:

Ia tusi mai ni mea se lima, o lo o faatonu mai e le poto o Solomona, ia tatou a'oa'oina ma ola ai i aso uma e maua ai le manuia.

1. Faalagolago i le Atua.
2. Mata'u i le Atua.
3. Auauna i le Atua.
4. Tausi poloaiga ma tulafono a le Atua.
5. Ia loto alofa.

PESE: Pese maViiga 147

A'OA'OGA:

1. Ia ola faalagolago i le Atua.
2. Ia naunau i le alofa, ma 'aua le te'a ma oe le faamaoni.
3. Ia mua'i saili le Atua, ona manuia ai lea o lou olaga.

.....

ASO SA: *22 AOKUSO 2021*

MATAUPU: *O LE MALAMALAMA O LE ATUA I LE LALOLAGI*

SINI: Ia malamalama le vasega, o Iesu o le Malamalama o le Atua ua Afio mai i le lalolagi, ina ia pupula mata ma loto o tagata, ua faapogisaina i le agasala, ma mafatia i puapuga o le ola.

TUSI FAITAU: Ioane 9: 24 – 41

FESOASOANI MO FAIAOGA:

O le mataupu e 9 atoa lava, o le tala i le faapupulaina e Iesu o mata o le tagata na fanau mai o ia o tauaso. O le vaega la o le mataupu e 9 lea ua fai ma tatou mataupu i lenei Aso Sa, o le fa'aaliga o le loto mataua ma le loto vale o le au Tusiupu ma Faresaio, ina ua faapupulaina e Iesu mata o le tagata na fanau mai o tauaso. Le gata ilea, o le tautinoga a le tagata sa tauaso, ma le mana o Iesu e faia ai faamalologa, ma le fesiligia e le au Faresaio o le tautinoga a matua e lagolagoina ma faamaonia ai, o le la tama moni lea na fanau mai o tauaso, a o lea ua pupula ona mata. O nei su'esu'ega ma sailiiliga a le au Faresaio ma le au Tusiupu, o le faailoga o le loto leaga ma le mataua, ina ua mafai e Iesu ona faapupula i mata o le tagata na fanau mai o tauaso. O se mea fou lenei, e le'i tupu muamua talu mai anamua. a ua le manatua lava e nei ta'ita'i o le lotu Iutaia, ua taunuu valoaga a le au Perofeta ma Afioa a le Atua, e uiga i le Mesia, o le malamalama o le Atua e Afio ifo, e na te faaolaina le lalolgi uma. Ua uma ona nini e Iesu mata o le tagata tauaso, ua faatonu e alu i le taelega i Selo a e mulumulu ai ona mata. Ua maea ona malamalama ai lea, ua pupula mata o le tagata tauaso. Peitai, ua sui i le vaai a le au loto vale o le au Faresaio ma le au Tusiupu foliga o le tagata tauaso ua faapupulaina ona mata. Ua latou le

manatua foliga o le tagata sa tauaso, ona o lo latou lē taliaina i o latou loto, lenei galuega alofa o le malamalama o le Atua ua faia e Iesu mo lenei tagata puapuagaina i le fia vaai ona mata.

Ua latou fesili pea ma saga fesili lava i le tauaso ua pupula, pe faapefea ona vaai ona mata? Ua toe faamatala i ai le galuega alofa a Iesu ia te ia. Ua oo lava i matua o le tagata ua vaai ona mata ua toe fesili i ai po o le la tama lea na tauaso ua pupula? Ua faamaonia mai e matua, e moni o le la tama lava lea na tauaso, a o lenei ua pupula. O le mafuaaga o le mafai ona pupula, ua la le iloa, ae ua matua o ia, e mafai lava e ia ona faamatala atu ia te outou.

Ua toe valaau atu le au Faresaio i le tagata sa tauaso, ma latou fai atu, “Avatu ia le viiga i le Atua, ua matou iloa o le tagata agasala lena ua faapupula i ou mata.

Ua latou fai atu lenei faaupuga, e le o le viiga o le Atua, a ua latou manaomia le tagata ua pupula ona mata e tautala i le amiotonu ma le mea moni. A ua tali atu le tagata sa tauaso, ou te lē iloa pe se tagata agasala o Ia, o le mea e tasi ua ou iloa, o a'u le tauaso, ua ou vaai nei. Ua toe fesili foi, “Pe se a se mea na ia faia ia te oe? Pe na faapefea ea ona faapupulaina e Ia ou mata? Ua manatu le tagata tauaso, o le fesili so'o mai o nei tagata i le faapupulaina o ona mata, ua latou naunau e fai ma so'o o Iesu. O lea na tali atu ai, “Ua uma ona ou ta'u atu ia te outou, ae tou te lei faalogo mai lava. Pe se a le mea tou te fia faalogo mai ai? Tou te manana'o ea ia fai outou mona so'o? Ona toatamai ai lea o le au Faresaio, ma latou fai mai ia te ia, ua faapea atu, O oe o lona so'o a o matou nei, o so'o o Mose i matou. Ua matou iloa, na fetalai mai le Atua ia Mose, a o lena tamaloa matou te le iloa pe maifea ia.

Ua tali atu le tagata ua faapupulaina ona mata, e fa'aaoga ai lona iloa o Afioa a le Atua. Ua faapea atu, O le mea e ofo ai lenei, ina ua lē iloa e outou pe maifea o ia, a ua faapupula mai e Ia ou mata. Ua tatou iloa e le faafofoga le Atua i e agasala ae peitai a mata'u se tasi i le Atua, ma fai lona finagalo, ona faafofoga mai lea o Ia ia te ia. E lei faalogo lava talu mai le vavau, ona

faapupulaina e se tasi o mata o le na fanau mai o tauaso. Ana le mai le Atua, na te lē mafaia se mea e tasi ona fai.

Ua toatamai le au faresaio i le tagata ua pupula ona mata, auā ua tautala atu o ia i upu moni mai i Afioga a le Atua. Ua avea le vaai o mata o le tagata tauaso talu ona fanau mai o ia, ma mea ua suluia ai i le malamalama o Iesu ma ua iloa ai, o Iesu lava o le Atalii o le tagata.

O le Alo o le Atua soifua. O le malamalama foi o Iesu ua pupula ai ona mata, faapea foi ma lona loto ma lona mafaufau, ua mauaa ai lona talitonu ma le faatuatua ia Iesu. E ui ina ua tulieseā o ia mai le sunako ma ua le toe maua ai se avanoa e ulufale ai e tapua’i i le Atua, a ua le popole i ai lenei tagata, auā ua sili ai ona lalata le la mafutaga ma Iesu. Na amata ona ia tau o Iesu o le tagata, sosoo ai ma lona taua o Iesu le Perofeta, ae faaii i lona tautala mai o Iesu o le Alo o le Atua.

Ioe tamaiti, o le feau lea ua aumai e le tatou mataupu, o Iesu o le malamalama mo tatou olaga, e na te faapupulaina mata o tatou loto i mea lelei uma, ma faamalamalamaina ala uma tatou te uia i lenei lalolagi, ma iu ai i ona manuia faavavau. Ia manuia outou le fanau.

GALUEGA FAATINO:

Tau mai ni igoa se tolu, na faaigoaina ai Iesu e le tagata ua faapupulaina e Iesu ona mata.

1. O Iesu o le tagata.
2. O Iesu o le Perofeta.
3. O Iesu o le Atalii o le tagata.

PESE: Pese ma Viiga 308

A’OA’OGA:

1. O Iesu o le malamalama o le lalolagi.
2. Ia faasililiina Iesu i lou olaga.

3. O le malamalama o Iesu, tatou te popoto ai.

.....

ASO SA: 29 AOKUSO 2021

MATAUPU: IA FAAFITI OE IA TE OE.

SINI: Ia malamalama le vasega, o le lafoai e le tagata o mea o naunau i ai lona loto o lenei ola, e le mafai ona faamalieina ai lona loto. Ua na o Iesu e malie ai i mea lelei uma.

TUSI FAITAU: Mareko 8: 34 – 9: 1

FESOASOANI MO FAIAOGA:

I le fuaiupu 31 – 33 o le mataupu lenei, o lo o fetalai ai Iesu e tusa ma puapuaga, e oo lava i lona maliu, a mavae aso e tolu ona toe tu mai lea o Ia.

O fuaiupu e 8: 34 - 9: 1, o lo o fa’auau ai ona a’oa’o atu Iesu i le au so’o ma le motu o tagata. Ua Ia fetalai atu ma a’oa’o atu i tagata uma, ua le na ona so’o, o e mulimuli mai ia te Ia, e sauni mo puapuaga e oo mai ia i latou. Ua sauni le motu o tagata, ia fai Iesu mo latou taitai e tete’e atu i le pulega a Roma, ma taitai o le lotu Iutaia, ma ia fai Iesu ma tupu i Ierusalema.

O lea ua fetalai atu ai Iesu i le a’oa’oga lenei, e le faigofie ona taliaina e tagata, a o le a’oa’oga e manaomia tele mo lo latou lelei, ma taofia ai lo latou manao e fai Iesu ma tupu. O le uiga la o a’oa’oga a Iesu, e pei ona faalogologo i ai le motu o tagata.

O i latou uma e fia mulimuli mai ia te Ia, ma fai o Ia ma taitai:

1. E tatau ona sauni e ulufale i le ola lamatia, ona o puapuaga o le avea o Iesu ma taitai i le ola.

2. O i latou ua filifili e mulimuli ia Iesu, ua faafitia e i latou lava, o latou manaoga o le lalolagi, ma faaleaogaina mea o naunau i ai le loto, ae tuu atu atoa le ola, e faalogo ma usitai ai i le finagalo o Iesu Keriso.
3. O i latou ua avea Keriso ma o latou taitai, o le a latou maua le ola e matuā lelei, ma le ola fiafia. E lamatia le ola ona o le mulimuli ia Iesu, ae sili ona lamatia le ola, pe afai e te lē lafoa'i ou tuinanauga, ma manaoga o le lalolagi.

O le faaloto tele lea a le fai-Evagelia o Mareko a o feagai le au Kerisiano ma sauaga mata'utia a le Emeperoa o Roma o Nero i le tausaga 65AD.

Fai mai le fuaiupu 34, Ai se fia mulimuli mai ia te A'u, ia faafiti o ia ia te ia, ma 'ave ia lona satauro, i le mulimuli mai ai ia te a'u. O lona uiga ia faaleaogaina ma faafitia e oe, oe lava i ou manaoga o le lalolagi. O ou manaoga ia ua faafitia o lou satauro lea ua e tauaveina. Auā e mata'utia tigā e te faalogoina i lua tauiviga ma ou manaoga o le lalolagi. Ua fetalai Iesu o lou satauro lena ua e tauaveina. A o faalagona na o tagata ua mulimuli ia Iesu, ona o le fia ta'u amiotonuina i latou ma ta'u aogaina lo latou ola mo Iesu. A o tua atu o ia mea o lo o faatalitali mai ai lo latou manuia faavavau.

O le ola ua faamaumauina, ona ua fanaufouina le agaga e le Agaga Paia o Iesu e mautinoa le ola ua sao atu i le malo o le Atua. A o le tagata e taofi mamau i mana'oga o le lalolagi ma ona tuinanauga, e mautinoa lava o le ola lena ua maumau.

Ia manatua e le faamalieina o tatou loto i ni mea o le lalolagi. Afai na manavaina mai e le Atua le Agaga o lana manava i totonu o loto, o lona uiga ia foliga i tatou uma ia te Ia i mea tatou te faia. O lona uiga e faamalieina o tatou loto, i meaai o le Agaga o le Atua, auā o tatou loto, e patino lea i le Atua. E le faaolaina i tatou i o tatou tino, aua e toe foi lava le tino i le efuefu o le eleele na faia ai tatou e le Atua. A o le loto ma le agaga e toe foi i le Atua, e fai i ai lana faamasinoga tonu. E faaolaina loto ma agaga

na mulimuli ia Iesu. O i latou na faafitia e i latou o latou manaoga o le lalolagi, ina ia maua ai le ola o lo o ia Iesu Keriso.

O i latou uma nei ua mulimuli ia Iesu Keriso, latou te vaavaai atu i le mamalu o le malo o le Atua, ae lei oo atu i latou i taimi latou te tuua ai le lalolagi e ala i le oti o le tino nei. O Iesu Keriso na ia tauave lona satauro, o lona faafitia o Ia lava, ua ia muai alofa mai ai ia i tatou ma faaolaina ai i tatou i le ola faavavau, e ala i lona maliu ma lona toetu mamalu, mai le oti ma le tuugamau.

Ua pule aoao i le lagi i luga ma le lalolagi i lalo nei, na ia aumai foi le ola i e ua mulimuli ia te Ia, ma maua atili lava le ola.

GALUEGA FAATINO:

1. Faamatala mai se tasi o lo o taua i le tala, na faamaumauina lona ola, e faaolaina ai isi tagata. Tau mai le igoa ma lana faatinoga na fai.
 - i) Iesu Keriso.
 - ii) Na ofoina mai lona ola ma faaolaina ai le lalolagi uma.

PESE: Pese ma Viiga 175

A'OA'OGA:

1. Ia e faafitia manaoga o le lalolagi.
2. Ia mulimuli ia Iesu.
3. Ia faaolaina tatou i le ola mai ia Keriso Iesu.

.....

**MANATU TAIALA O SETEMA: O LE OLA I LE ATUA
(Life in God)**

O le ola o le tagata o le mea e patino lava i le Atua. O le ola na faavae mai i le Agaga o le Alii. E leai la se isi mea e sili ona manao ai le Atua, ia ola lelei ma ola mama le tagata. O le mafuaaga lea e leoleoina ma puipui ai e le Atua le tagata, ia sao ma lelei ona ala, ia savali i le finagalo o le Atua. Afai foi o a faigata ma tiga e tutupu mai i mea o le olaga nei, ia talitonu ma mautinoa lelei e le tagata, e le mafai ona tuulafoa'iina o ia e le Agaga o le Atua.

ASO SA: 5 SETEMA 2021
(ASO SA O LE TALA LELEI)

MATAUPU: E MALOSI LE MEA MONI

SINI: Ia a'oa'o tamaiti ia malamalama, o le finagalo o le Atua e lē mafai ona suia e se tagata.

TUSI FAITAU: 2 Tupu 11: 1 - 16

FESOASOANI MO FAIAOGA:

O le faauuina ai o Ioasa le atalii o Aasaia e fai ma tupu o Iuta. O le finagalo moni lea o le Atua. Ae ese le matautia o le mea na tupu, ina ua manao le tinā o le tamā o Ioasa (grandmother) e avea o ia ma tupu. Ua taumafai Atalia e natia le mea moni.

O Atalia o le tinā lea o Aasaia lea sa avea ma tupu o Iuta. Ua faalogo Atalia ua oti Aasaia, ona ia manao ai lea e fasioti uma le fanau a le tupu. O le mea leaga na fai e Atalia ina ia 'aia nei sui tulaga se tasi o le fanau a le tupu, e avea ma tupu o Iuta. Ua fasioti le fanau a le tupu, ae na sao mai ai Ioasa ina ua natia e Iosapa le tuafafine o Aasaia, ma ave Ioasa i le fale o le Alii ua tausai ai.

O le fitu o tausaga o Ioasa na faailoa ai e Ieoiata le ositaulaga a le Alii le mea moni i tagata o e sa avea ma auauna i le fale o le Alii, o le taitoaselau, au keru ma au faafeao. Ua latou faia foi le feagaiga mo le puipui ma le leoleoina o le tamaitiiti.

Ia malupuipui le tupu i taimi uma, i le ao ma le po. E oo foi i le ulufale ma le ulufale o le tupu ia i ai i taimi uma le au faafeao. Ua tufa foi e Ieoiata le ositaulaga mea tau, o talita ma pelu i le taitoaselau mo le faamausaliina o le saogalemu o le 'tupu tamaitiiti.' E mafua lea tulaga, ona o lo o iloa lelei e le ositaulaga, o lo o naunau pea le loto o Atalia, ia 'aia nei faalavelave se isi i lana nofoaiga.

Ua maea faatonuga uma na faia e Ieoiata le ositaulaga, ona faaee ai lea o le palealii, ia Ioasa le atalii o Aasaia, ma avea ai ma tupu moni o Iuta. Ua fiafia ma patilima tagata o e sa i ai i le fale o le Alii, ua alalaga foi, 'Ia viia le Atua.' Ua faalogo Atalia le tupu tamaitai leaga i le vāvāō mai o tagata i le fale o le Alii. Ua ulufale o ia ma iloa ai le mea ua tupu. Ona ita tele ai lea o Atalia, ona sa lilo i ona manatu o lo o ola se tasi o le fanau a Aasaia. Ua iloa foi e tagata o le nuu le mea leaga sa ia faia.

Ua faatonu e le ositaulaga fitafita e ave i fafo ia le tupu tamaitai, ma fasioti ai. E lei manao Ieoiata e fasioti i totonu o le fale o le Alii.

E ese le leaga o le mea na faia e lenei tinā. A fua i le uiga o le upu tinā, o le 'ola.' E le tataua la ona manao se tinā e fasioti i sana fanau. O lima o le tinā e tausai, fafaga ma leoleo le fanau i le alofa. Aua nei taumafai e natia le finagalo le Atua mo fanau. O fanau o 'meaalofa taua' ma le 'sili' lea ua foaiina mai e le Alii.

Uiga o Upu:

- i) 'aisola' - Ua sola Iosapa ma ave Ioasa i le fale o le Alii
- ii) 'faafeao' - E puipui ma leoleo e fitafita le upu i so o se mea e alu i ai.

GALUEGA FAATINO:

Fesili ma Tali (Fa’aaoga le Tusi Paia)

1. O ai Aasaia?
Tali: O le tupu o Iuta.

2. O ai Atalia?
Tali: O le tinā o Aasaia.

3. O ai Ioasa?
Tali: O le atalii o Aasaia.

4. E fia tausaga o Ioasa na avea ai ma tupu?
Tali: E 7 tausaga.

5. O ai Ieoiata?
Tali: O le ositaulaga

6. O Iosapa o le tuafafine o ai?
Tali: O Aasaia.

PESE: 5 (Pese ma Viiga)

A’OA’OGA:

1. Aua nei o tatou natia le finagalo o le Alii.
2. E finagalo le Atua ina ia manuia le fanau.

.....

ASO SA: 12 SETEMA 2021

MATAUPU: **O LE TUSI O LE OLA**
(The Book of Life)

SINI: Ia a’oa’o tamaiti ia malamalama, o e e ola matatau i le Alii, e tusia o latou igoa i le tusi o le ola ua saunia e le Atua i le lagi.

TUSI FAITAU: Malaki 3: 13 – 18

FESOASOANI MO FAIAOGA:

E 2 vaega ua vaevaeina ai le tusi faitau o lenei Aso Sa.

1. **Ua fesiligia le ola auauna i le Atua.** (13 – 15)

O le tusi a Malaki na tusia i le taimi o lo o i ai Iuta i le tafeaga, a o lea ua valoia e le Perofeta le toe faafoi ai e le Atua o le nuu i ona laueleele ma le manuia o le a liligi mai e le Alii mo i latou.

“Se a sa matou upu ua fai atu ia te oe?”

O le fesili muamua lea na fesiligia ai e nisi o le nuu le Atua, o lo o i le mataupu lenei. A fua lava i le amataga i le taimi na taumafai ai le Atua e aumai lona nuu mai le ola pologa, tele ia o upu faifai a le nuu na fai i le Alii. Aemaise lava taimi e fetai ai ma faigata ma puapuaga. E le gata o upu e tautala ai o o latou gutu, ae o upu o lo o faatupu i o latou loto. O fea ea le Alii, e alofa ea le Alii? Fai mai foi o le Atua malosi. O upu foi ua latou faifai ai i Perofeta, o lo latou upu leaga lava lea i le Atua.

“Se a foi se mea ua maua ina ua tatou tausisi i ana poloaiga?”

Ua oo lava i tulafono, ua latou fesiligia le aoga. Ae o tulafono ua mafua ona faia e le Atua, ina ia taitaiina ai lo latou ola, i le ola lelei ma le manuia. Ua latou fesiligia tulafono, ae latou te lei tausia ma teu i o latou loto tulafono ma poloaiga a le Atua.

“Se a foi se mea, ua tatou maua ina ua tatou pologa mo ia?”

O le fesili lea o lo o aumai i le manatu, “feoai ma ofu eleelea i luma o le Alii.” O le mea ua sili ona le fiafia ai le Atua, e le o le mativa i le tino, ae o le mativa faaleagaga o o latou loto.

“Ua mamafa a outou upu ia te au, ua fetalai mai ai le Alii.”

E i ai le taimi e faamasinoina ai i latou e le Alii, ona ua latou manatu “E le aoga ona auauna i le Alii”

2. O e matatau i le Alii

“Ona fetautalatalaai lea e na matatau i le Alii.”

O i latou ia na tumau o latou loto i le Atua. O e ua vaai ma talitonu i vavega tetele na faia e le Atua mo lona nuu. E mafaufau foi i latou i tulafono ma poloaiga a le Alii i le ao ma le po, e le tea ese ai o latou loto. O i latou ia ua moni ma faamaoni lo latou ola talitonu i le alofa faamaoni o le Alii mo lona nuu.

“Ua liliu mai foi e le Alii ona fofoga, ona tusia lea o le tusi, e faamanatu ai i ona luma, mo e matatau i le Alii.”

O e ua tusia o latou igoa i le tusi o le ola, e fai foi i latou ma oloa taua a le Alii. E faamanuia ma alofagia i latou e le Atua. E le toe iai se pologa e le faamativaina foi i meaalofa faaletino ma le faaleagaga.

A oo mai foi le faamasinoga amiotonu a le Atua, ona iloa ai lea o le amiotonu ma le amioleaga, e ese le ua auauna i le Atua, ma le ua le auauna ia te ia.

O e e auauna ma matatau i le Atua, e tusia o latou igoa i le tusi o le ola.”

GALUEGA FAATINO:

Uiga o faaupuga – Faamatala mai le uiga o faaupuga nei:-

1. “Ua mamafa a outou upu ia te au.”

Tali: O e ua faifai ma upu leaga i le Atua.

2. “E le aoga ona auauna i le Atua.”

Tali: E fiu e galue mo le Alii e le maua se manuia.

3. (i) Faamata o sa’o pes ese le faaupuga o i le fesili 2?

(ii) Faamatala pe aisea?

4. “Ua liliu mai foi e le Alii ona fofoga.”

Tali: Ua alofaina e le Atua le tagata e matau ia te ia.

5. “E pei ona alofa o le tagata i lona atalii.”

Tali: O le alofa o le Atua, ua faatusaina i le alofa o le tamā i lona atalii.

PESE: 217 (Pese ma Viiga)

A’OA’OGA:

1. O tatou o oloa taua a le Atua.

2. Auauna i le Alii ma le faamaoni.

.....

ASO SA: 19 SETEMA 2021

MATAUPU: O LE FEAGAIGA FOU

SINI: Ia malamalama le vasega, na suia e le Atua le Feagaiga Tuai i le Feagaiga Fou mo tagata uma.

TUSI FAITAU: Eperu 8: 7 – 12

FESOASOANI MO FAIAOGA:

I le mataupu nei e 8, o lo o fa’aaoga ai e le tusitala o le tusi o Eperu mau mai le tusi a le Perofeta o Ieremia (31: 31 – 34) (E manaia pe a faitau e tamaiti le mataupu lea o le tusi a Ieremia)

O Isaraelu o le uluai feagaiga lea a le Atua mai le amataga. A o le feagaiga na faavae i tulafono e 10. E lei tumau Isaraelu i le feagaiga ma le Atua. E ui ina faapea ua latou tausia tulafono, ae lei fusifusia ma tausia i o latou loto. Ua na o ni tulafono e teuteu ai i le vaaiga faaletagata ae ua tumau pea le loto i le agasala. Aua pe ana sao ma lelei le loto ma le ola o le Isaraelu i le va ma le Atua, e le toe sailia se isi feagaiga.

O le toe saili ai o se feagaiga fou, na toe saili lava e le Atua ia te ia lava. O le feagaiga sili lea ona lelei, e pei ona valoia ai e le au Perofeta. O le feagaiga Fou ua liutino tagata ai le Atua e ala ia Iesu Keriso. O le feagaiga ua saunia ina ia malamalama ai le loto agasala o le tagata. Ua le mafaia e Isaraelu ona faia lea mea.

O le Feagaiga Fou e le toe tausaili e ala i tulafono a o le feagaiga e saili i le loto talitonu ia Iesu Keriso. O le Feagaiga Fou, ua tauleaogaina ai le Feagaiga Tuai.

O le feagaiga ua le na o mo Isaraelu, ae mo le lalolagi uma. E le toe tau faamanatu pe toe tauologologo i tagata e pei ona i ai tulafono ma le toe tau faamanatu pea i le nuu i aso uma. Ae o le feagaiga o le a savalia le lalolagi, o le feagaiga o le a avea ma taitaitama e feoai ma le tagata. Pau le mea e fai e le tagata, ia vaai, faalogo, usitai ma talia. O le Feagaiga Fou lea, na fa'aatoatoa i luga o le satauro i le maliu ma le toetu mai o Iesu Keriso.

Fanau o lau filifiliga tou te manuia ai, ao lau filifiliga fou tou te malaia ai.” O Iesu Keriso o le Feagaiga Fou lea o le manuia.

Uiga o Upu

- :
- i) puluvaga - faaleleiga
 - ii) feagaiga - maliliega
 - iii) faauta - talitonu/molimau
 - iv) tautuai - faaleagaina
 - v) faiva - galuega

GALUEGA FAATINO:

Tusi mai uiga o faaupuga nei:-

1. “Ua tautuai ai e ia o le ua muamua.”
Tali: Ua le faaleaogaina ai le Feagaiga Tuai.
2. “E pei ona faia o ia ma puluvaga o le feagaiga e sili ona lelei.”
Tali: O Iesu ua fai ma leleiga mo le tagata agasala.
3. “Ia e iloa le Alii.”
Tali: Talitonu ma faatuatua
4. “Ou te le toe manatua foi a latou agasala.”
Tali: Ua faamagaloina a latou agasala.
5. “Na le tumau i latou i lau feagaiga.”
Tali: Le faamaoni i le Atua.

PESE: 154 (Pese ma Viiga)

A’OA’OGA:

1. O i tatou o feagaiga a Iesu Keriso.
2. Ia avea fanau ma feagaiga e manuia ai aiga.

.....

ASO SA: **26 SETEMA 2021**

MATAUPU: **TUMAU I LE ATUA, TETE'E I LE TIAPOLO**

SINI: Ia malamalama tamaiti, o le ola tumau ia Keriso, o le malosi lea e mafai ai ona tetee atu i le tiapolo.

TUSI FAITAU: 1 Peteru 5: 5 – 11

FESOASOANI MO FAIAOGA:

O Peteru o se tasi o so’o sa sili ona latalata i le Alii a o i ai le Alii i le lalolagi ma faatino lana galuega. Sa fai o ia ma molimau ola i puapuaga o le Alii. Ae o lana molimau, na fai ma avega mamafa i lona loto, auā o ia lea na faafitiina le Alii. O lona vaivai lea, sa fai ma mafuaaga na malosi ai lona faatuatua, ina ua ia talia ma tumau lona loto ia Iesu Keriso.

O le mataupu leni e lima, o lo o apoapoi atu ai Peteru i le lafu mamoe a Keriso, ina ia mataala ma tetee atu i le tiapolo. O le tusi o lo o faamanatu atu ai i le autalavou, ina ia usiusitai i toeiina o le Ekalesia ma ava le tasi i le tasi. O le faailoga o le galulue faatasi ma le loto mauualalo. Ae ia sili ona faamaualalo le tagata i le Alii.

“O le mea lea ia faamaualalo ai outou i lalo o le Aao malosi o le Atua.”

E le faapea ua na o e ua talavou i tausaga, o lo o faatatau ai leni tusi. Ae aofia ai ma e e talavou le loto faatuatua. Ia iloa ona faautauta ma mataala. Aua le popole fua i e ua fai i latou ma o latou fili, e faapea foi i mea e tutupu mai i totonu o le Ekalesia. Ia latou iloa, o mea uma o lo o aofia ai lo latou ola ona o le Tala Lelei ia Iesu Keriso, o mea foi ia o lo o tutupu i le au Kerisiano uma i le lalolagi. E le mapu le tiapolo, e saili pea se tagata e faaleaga – “O le tiapolo lea, o lo o fealualua’i ia e pei o se leona tiga, ua saili se tasi e aina e ia.”

O e ua fai i latou ma o latou fili, o tiapolo ia, pau le mea e mananao ai, ia faaleagaina ma fano le tagata. O le mea e ao ona fai e le tagata, tumau, talia ma maua le loto mauualalo i le Alii, ona faaeaina lea i le mamalu o Keriso (exaltation of the Lord) . Aua le vevesi, ‘aua le feitagai, ‘aua le femisaai, ae ia tumau i le filemu o le Alii. Aua o Keriso na te fa’aatoatoaina, e faatumauina, e faamalosia foi i latou. Ia iloa ma malamalama le tagata Kerisiano, o lo o manatu mai pea le Alii mo ia, i aso uma e le aunoa. O le mea lea e ao ai ona faamaualalo o latou loto i le Alii.

GALUEGA FAATINO:

Tusi mai sau solo; e uiga ia Peteru le so’o o Iesu, sa tele ina oso vave, ma sa ia faafitia le Alii; O lona iloa lelei o lona faaletonu lea; na fai ma faavae o lona faatuatua mausali ia Iesu lona matai.

E 3 fuaiupu o le solo, ae 4 laina o le fuaiupu e tasi.

PESE: (Tulei ese)

A’OA’OGA

1. Ia ava le tagata talavou i e matutua.
2. Ia lotomau ma faatuatua i le Alii.
3. Ia mataala e le aunoa.

.....

MANATU TAIALA O OKETOPA:

O LE TALI ATU I LE ALII

O le fesili, o le a ea se tali atu o le tagata i le Alii, i mea uma e tutupu mai i le ola. O le upu moni, a oo ina tele le manuia o le Atua e maua ele tagata, e tupu le loto fiafia ma lē mapu le ola vivii ma faafetai i le Alii. O le natura lea o le olaga faaletagata. Ae a tutupu loa tiga ma faigata, faailoga fesili loa le ola vivii ma le ola talitonu i le Atua. Ia iloa ma malamalama le tagata, e le faailoga fesili le alofa mai o le Atua mo ia.

ASO SA: 24 OKETOPA 2021

MATAUPU: FAI LAU TATALO I LE TAEAO

SINI: Ia a’oa’o le fanau ia malamalama, i le taua o le tatalo i taeao uma. Aua tatou te feagai pea ma luitau i aso uma o le ola.

TUSI FAITAU: Salamo 5: 1 – 3

FESOASOANI MO FAIAOGA:

Ua maea ona faatulaga e le Atua mea o le natura na ia foafoaina. O le sami ma le laueleele, o le malamalama ma le pogisa, o le taeao ma le afiafi. A o le tagata foi, ua maea ona faatulaga e le Atua lona loto, e fua ai ana galuega faatino i taimi ma lona faagasologa ua maea ona vaevae e le Atua.

A tatafa mai ata o le taeao fou, e ao ona alafai mai le tagata e vivii i le Atua e ala i lana tatalo.

“O le taeao, e sauni atu ai lau tatalo ia te oe, ma ou vaavaai.”

Upu ia o le tatalo ale fai Salamo e iloa ai le saili muamua o lona loto i le Atua, pe a oo mai le aso fou, oo mai le faamoemoe fou. O le tatalo o lo o alaga ai le loto o Tavita i lona Atua, ina ia siosiomia o ia i le olioli, ia faamalasia lona talitonu ma lona faatuatua, ia leoleoina ma puipuia o ia i le faamaoni o le Alii.

Aua foi e le gata o le a alafai mai i le ola fou, o le malosi fou, ae o le a feagai foi ma le tele o faigata ma le ita mai o ona fili, o e ē mananao e faaleaga mai.

Le ata vaaia lena o le tagata e ala saili i lona Atua. Auā e tusa lava pe fou le aso, fou le malosi ae le ma iloa taualumaga ma mea e tutupu i le aso. A tutupu mea lelei, e fiafia le loto, ae a tutupu mai faigata ona vaivai lea ma faanoanoa le loto.

O le Atua na te leoleoina le tagata i lona ulufafo mai lona ulufale. Ia taimua a latou galuega i aso uma e ala i le tatalo. E faafogaina e le Atua lau tatalo i le taeao, ona ia te oe lea o lenei manuia. Ia tatalo ma le loto talitonu atoatoa.

GALUEGA FAATINO:

- 1. Tusi mai sau tatalo e faia i le taeao. E afa laupepa le umi o le tatalo.

PESE: (Whisper your prayer in the morning)

A’OA’OGA:

- 1. Toaga e tatalo i le taeao.
- 2. Tatalo ma le loto faamaoni.
- 3. Tatalo ma le loto mama.

.....

ASO SA: 31 OKETOPA 2021

MATAUPU: MAUGA O SINAI MA SIONA
(Mount Sinai and Zion)

SINI: Ia malamalama le fanau i le taua o le mauga o Sinai ma le mauga o Siona i le ola o le Kerisiano.

TUSI FAITAU: Eperu 12: 18 – 24

FESOASOANI MO FAIAOGA:

O le tusi lenei a Eperu, o lo o aumai ai le faamalosiāu mo le au Kerisiano o e ua amata ona vaivai lo latou faatuatua ona o sauaga ua feagai ma i latou. Ua mananao e toe liliu i le talitonuga tuai faa-Iutaia ua ola i le tulafono.

O le taumafai o le tusitala o Eperu e faamalosi i le au Kerisiano, ina ia aua nei liliu ese mai ia Keriso, na toe faamanatu ai e Paulo feagaiga e lua. Ae ua faatusa nei feagaiga i le mauga o Sinai ma le mauga o Siona.

O le Feagaiga Tuai ua faatusaina i le mauga o Sinai. O le mauga sa Afio ai le Atua, ma tuuina mai ai tulafono ia Mose. Ae o le mauga foi o Sinai na iloa ai e le nuu le malosi ma le matautia o le Atua. O le mauga o le feagaiga tuai na avea ia tulafono ma taitailima i le ola o Isaraelu. A o tulafono nei na toasa ai le Atua i lona nuu, ina ua latou le mafai ona usitai ai. A oo ina toasa le Atua, e lagonaina le taalili o faititili i luga o le mauga. E gatete uma ai le lalolagi ma fefefe ai tagata. O le mauga e iloa ai le afi maamaai, e le mafai ona pupula ai le tagata. O le mauga e ave ai le tagata leaga e fetogi ma fasiotia. A ui ane foi i ai se manu, e faaumatia i le u. O le feagaiga lea o le taimi tuanai. O le feagaiga sa i ai le fefe ma le matau o le tagata ona o le matautia o le mamalu o le Atua. O le feagaiga o le tulafono. Tulafono ia, ua manao le tagata Kerisiano e ola ai. Ae o le manatu tumau lava o Paulo, e le faaolaina le tagata i le tulafono.

O le mauga o Siona, o lo o aumai ai le ata o le Ierusalema Fou. O le mauga o Siona o le aai lea o le Atua. E lagonaina ai pesega a agelu mo le viiga o le Alii. O le nofoaga o le au paia. O le mauga o Keriso, o Ia o le Feagaiga Fou lea mo le lalolagi. E le toe i ai se fefe, e le toe vavamamao le tagata ma le Alii. O le mauga o le filemu. O le mauga o le Feagaiga Fou, o le Alofa.

GALUEGA FAATINO:

Tali ma Fesili:

1. 'Mauga Sinai' Ua faatusa i se a i le Feagaiga Tuai?
Tali: O le mauga sa tusia ai e le Atua tulafono.
2. 'O Siona o le mauga o le Feagaiga Fou.' O le a le uiga o lenei faaupuga?
Tali: O le Feagaiga Fou e ala ia Iesu Keriso.
3. O Iesu o le Puluvaaga.' O le a lona uiga?
Tali: 'O Iesu le Faaola.'
4. 'O le afi mumu' O le a lona uiga?
Tali: 'O le mamalu o le Atua.'
5. Aisea ua amata ona vaivai ai le faatuatua o le au Kerisiano Eperu?
Tali: Ona o sauaga ma le oti.

PESE: 2 (Pese ma Viiga)

A'OA'OGA:

1. Tumau i lou faatuatuaga.
2. Ua avea i tatou ma mauga o le Alii.

.....

MANATU TAIALA NOVEMA: O FEAGAIGA

O le tagata o le uluai Feagaiga lea a le Atua. O le feagaiga na fausia i le efuefu o le eleele, ae na fausia i aao o le Atua, ma manava ai le manava ola o le Agaga o le Atua. O le feagaiga lea na faavae mai ai le feagaiga a le Atua ma lona nuu. Le feagaiga sa iloga ona pologa ai le Alii. O tusitusiga uma i le Feagaiga Tuai, e auga lava mea uma i le feagaiga a le Atua ma lona nuu. Le feagiaga lea na oo ina sasaa atoa mai ai le ola o le Atua e ala ia Iesu Keriso.

ASO SA: 7 NOVEMA 2021

MATAUPU: INA SOIA, IA ILOA LE ATUA

SINI: Ia a’oa’o tamaiti ina ia malamalama, e iloa le Atua i ana galuega na fai, e ala i mea o lo o siosiomia ai tatou, ma mea e tutupu mai i le ola.

TUSI FAITAU: Salamo 46: 1 – 11

FESOASOANI MO FAIAOGA:

O le Salamo lenei a le fanauga a Koru, ma o le pese i alemota. O le autu o le Salamo lenei, ia iloa le Atua ma ia faatuatua tagata ia te Ia.

O le pese lenei o lo o avea ai le fanauga a Koru ma vaega taua o le pese. O le fanauga a Koru, o le isi vaega lea o le ituaiga o sa Levi, mai ituaiga e 12 o Isaraelu. Latou te feagai ma le vaaiga o le pa o le malumalu (Gatekeepers)

I le vaevaeina o vaega o le pese, e pepese Koru i le alemota. Le alemota o le leo lea e maua mai i ofe po o paipa e iliina (flute). O le leo e maualuga, e tagitagi ma malie i le faalogo, leo o le

“soprano” po o le usu tamaitai, e taua e le faisalamo. O le leo taupou (virgin voices)

O le leo e pepese ai le fanauga a Koru pe a tuufaatasi ma le nuu o Isaraelu mo le viiga i le Atua. Ia pese i alemota, ina ia logo malie i le faafofoga a le Alii. O le pese e faatatau lava i le Atua. “Ia outou iloa o au lava o le Atua.”

E 3 fuaiupu o le pese lenei:

Fuaiupu muamua: 1 – 3
Fuaiupu lua: 4 – 7
Fuaiupu tolu: 8 – 11

E iloa gofie lava i le upu ‘Sela’ lea e faaiu ai fuaiupu taitaisi. O le uiga o le upu ‘Sela’; o le taimi lea e malolo ai le pese. E fifilemu le nuu, ae sei lagona ina e le loto o le tagata le taua o upu o le pese, ma le taua o lē o lo o faatatau ai le pese.

O le upu ‘soia,’ o lo o faauigaina, ‘ia fifilemu’. Ia toamalie le loto. Aua le vevesi pe popole ma atuatuvaale, ua ia te i tatou le Atua. O le upu ‘iloa,’ o lo o faauigaina e le fai salamo. O le iloa ina ua vaavaai i le matautia ma le malosi o le Atua ina ua faatoilaloina ona fili.

O le Atua na te gagau le aufana na te vavae le tao, e susunuina foi e ia kariota i le afi. O lona uiga e tafia ese e le Alii auupega a le tiapolo, lea e tutupu ai fevaevaeaiga i le va o atunuu ma malo, tutupu ai vevesi ma le femisaa’i i totonu o nuu ma aiga. E tafia ese e le Atua faigata ma tiga ma mea o lo o taufaafefe i le loto o le tagata. O le Atua o le Tupu o atunuu ma malo, o le Alii o nuu ma aiga. E ao la ona viia o ia e le lalolagi uma.

GALUEGA FAATINO: Taliga Fesili

Fesili ma Tali

1. Mai ituaiga e 12 o Isaraelu, o fea e i ai le fanauga a Koru?
Tali: Au sa Levi

2. O le a le uiga o le upu 'Alemota'?

Tali: Leo malie ma le mamalu.

3. E gagau e le Atua le aufana vavaeina le tao, susunuina kariota i le afi. O le a lona uiga?

Tali: E tafia ese e le Alii aupega a le tiapolo.

4. 'Soia' O le a lona faauigaina i le Salamo lenei?

Tali: Fifiilemu, toamalie le lotu.

5. E faapefea ona 'iloa' e Isaraelu le Atua?

Tali: E iloa i ana galuega.

PESE: 231 (Pese ma Viiga)

A'OA'OGA:

1. Ia pese ma le leo malie ma le leo mama i le Atua.

2. E viia le Atua i le lalolagi uma.

3. E to'amalie le lotu mafatia i le Alii.

.....

ASO SA: 14 NOVEMA 2021

MATAUPU: **O LE FEAGAIGA O LE SAOLOTOGA
MA LE POLOGA**

SINI: A'oa'o ma malamalama tamaiti, i le eseesega o le feagaiga o le pologa ma le feagaiga o le saolotoga.

TUSI FAITAU: Kalatia 4: 21 – 27

FESOASOANI MO FAIAOGA:

O le tusi lenei a Paulo i le Ekalesia i Kalatia, e 3 vaega o lo o faamamafaina e le Aposetolo i lana tusi.

(i) O le moni o lana talaiga e ala ia Iesu Keriso ma le Tala Lelei.

(ii) O talaiga sese ua lualuagia ai le Tala Lelei ia Iesu Keriso e mafua mai lava i tagata Iutaia.

(iii) O le saolotoga moni e maua lea ia Iesu Keriso ma le malosi o le Agaga Paia. Ia ola ia Keriso.

O manatu taijala o le tusi lenei a Kalatia o lo o faavae mai i le valaauina o le Aposetolo o Paulo ma lona maelega i le Tala Lelei ina ua avea ma Kerisiano ma so'o o le Alii. E fa manatu autu o le tusi lenei a Kalatia.

1) O Paulo (Paul)

O le talai atu ai e Paulo o le Tala Lelei i Kalatia na faamatalaina ai e le Aposetolo lona valaauina e le Alii i le ala i Tamaseko, o le faamaoniaina o ia e avea ma Aposetolo e le au uso o Ierusalem ma lona finau i le faamamaina e ala i le faatuatua.

2) O Tulafono (The Law)

O le finauga a Paulo e uiga i le tulafono, o lo o faamalamalama ai e le Aposetolo, e le faaolaina le tagata i le tulafono. E mafua lea manatu i le Aposetolo, ona e le mafai e le tagata ona tausia i aso uma o lona ola tulafono. E le atoatoa foi ona tausia e le tagata.

3) Faatuatua (Faith)

E ui ina le fou mataupu e uiga i le faatuatua i le tapuaiga faa-Iutaia, o e o lo o faamanatu pea e Paulo i Kalatia. O Aperaamo na tau amiotonuina e le Atua, ona o lona faatuatua. E le o tulafono, e pei ona faamalosi e taitai o le lotu Iutaia.

4) **Tino ma le Agaga (Flesh and spirit)**

O galuega faaletino e faia e le tagata e lē mafai ona atoatoa ma lelei, e tupu pea le leaga ma oo ai ina agasala i le silafaga a le Atua. A o le tagata ua i ai le agaga o le Atua, e fua mai lona ola i fua lelei.

O le vaega o le tusi a Kalatia sa fai ma tusi faitau mo lenei Aso Sa, o lo o faamanino mai ai i ituaiga feagaiga e lua. O le feagaiga i le tino e afua mai i tulafono, ua faaigoaina o le feagaiga o le pologa. O le feagaiga i le Agaga, lea e afua mai i le Atua, o le feagaiga lea o le saolotoga (The covenant of bondage and the covenant of freedom)

O le feagaiga o le pologa na mafua ona ua manatu Aperaamo ma Sarai ua le tumau le Atua i ana upu – “Ou te faatoateleina lau fanau e pei o fetu o le lagi ma oneone o le sami. Ua matutua i laua, ae ua le maua lava se la tama. Ona fai ai lea o le togafiti ua ave e Sarai lana auaua fafine o Akara e momoe ma Aperaamo. Ua fanau Isamaeli. O le tupuga lea o tagata Arapi lea e aofia ai ma Palesetina. O Akara o le fafine pologa. O le fanau ai o Isamaeli mai le fafine pologa, o le feagaiga na faia lava e le tagata. E le o se finagalo o le Atua.

O le manatu ai o Aperaamo ma Sarai e le mafai ona toe maua se la tama ona ua matutua o le finagalo lea o le Atua. E fa’aalia ai lona silisili ese ma lana pule aoao. Ua fanau e Sarai Isaako. O le tama a le fafine saoloto, o le faailoga lea o le faatuatua e ala ia Aperaamo. O Isaako o le feagaiga a le Atua. O le feagaiga o le saolotoga.

O le manatu o Iutaia o i latou e tupuga mai ia Isaako ma tumau ai i le tulafono o le feagaiga tuai, ua le mafai ai ona ave i latou ma feagaiga o le saolotoga e ala ia Iesu Keriso o le na fanau mai i le Agaga.

O tulafono o le feagaiga lea o le pologa ona o le agasala. A o Iesu Keriso, o ia o le feagaiga o le saolotoga. O lona maliu ma lona toetu, ua saoloto mai ai le tagata mai le agasala.

GALUEGA FAATINO:

1. Ia faamallosia tamaiti e ao faatauloto tulafono e sefulu – Esoto 20: 3 – 17.
2. Ia faamallosia foi le fanau e ao faatauloto le tulafono fa’aauo a le Alii – Mareko 12: 29 – 31.

Fesili ma Tali:

1. O le a le mea o lo o faataua i tulafono e 10?
Tali: O le ola e ao ona ola ai le tagata – Ia ola lelei.
2. O le a le mea o lo o faamamafa e le tulafono fa’aauo a le Alii?
Tali: O le alofa.

PESE: 168 (Pese ma Viiga)

A’OA’OGA:

1. O Keriso o le feagaiga o le Alofa.
2. E finagalo le Alii ina ia ola saoloto le tagata.

.....

ASO SA: 21 NOVEMA 2021

MATAUPU: O LE FEAGAIGA A LE ATUA MA APERAAMO

SINI: Ia malamalama tamaiti i le uiga o le feagaiga na osia e le Atua ma Aperaamo ma lona faatinoga.

TUSI FAITAU: Kenese 15: 8 - 18

FESOASOANI MO FAIAOGA:

I le Feagaiga Tuai, e taua tele le maua o se atalii, auā o le sulī lea o le tamā e fa'aauauina galuega fai ma vaaiā mea totino a le aiga i le lumanai. Ia e tai tali tutusa lava ma aiga Samoa.

O le mea lea na manao tele ai Aperaaamo i le maua o sona atalii e fai mona sulī. Ua oo ina toeaina Aperaaamo ua lē maua lava sona sulī. Ua faanoanoa lona loto, auā o le a le mafai e lona aiga ona tauave le tofi, auā ua leai sona atalii. Peitai, o manatu o Aperaaamo, e le o le finagalo lea o le Atua. Ua fa'aali le Atua ia Aperaaamo ma faailoa i ai lona finagalo. E ui ina matua Aperaaamo ae o le a fanaua e ia lona lava atalii e fai mona sulī moni. O le fanau foi a Aperaaamo e faatoateleina e pei o fetu o le lagi. E faatatau le fetalaiga lea a le Alii, i le nuu o Isaraelu, lea na tupuga mai ia Isaako le atalii o Aperaaamo.

O le mafuaaga lea na osi ai le feagaiga. O le feagaiga o le faatuatua. Ia tumau le faatuatua o Aperaaamo i le Atua ona faataunuaina ai lea o mea uma ua folafola e le Alii mo Aperaaamo.

O le faatinoina o le feagaiga na faatonu ai e le Atua Aperaaamo e aumai manu nei, manu vaefa e i ai le povi fafine, oti fafine ma se mamoe fafine, o manu uma nei e tai tolu o latou tausaga. O manulele, o le manutagi ma le lupe. O manu uma nei, e fa'aaoga i le Feagaiga Tuai e osi ai ituaiga taulaga i le Atua. E i ai le taulaga o le faamagaloga, o le faamamaina ma le taulaga o le faaolataga. O lona uiga, o le feagaiga ua osia e le Atua ma Aperaaamo, ua atoatoa uma ai taulaga e ao ona faia mo le Alii.

O se tasi o vaega taua o le feagaiga nei, o le isiluaaina o manu vaefa uma. Ua fa'aalalua i le tasi itu ma le isi itu. Ae o le manutagi ma le lupe ua faalele e Aperaaamo. Ua o mai manu feai ma manu felele ua aina tino o manu ua isiluaaina. O le uiga o lenei mea, pe afai e soli e Aperaaamo le feagaiga o lona iuga lea o le taapeape ma aina e manu feai. E ui e le o faamatala atoatoa

mai e le tasi le faatinoina o le feagaiga, ae ua manatu e faamatala nisi nei o vaega.

Ua isiluaaina manu, ona fa'aalalua lea ae faasisina le toto i totonu. Ua savavali Aperaaamo ma le Atua i totonu ma soli ai e Aperaaamo toto o manu nei. O lona uiga, o le feagaiga e oo lava i le oti. E oti Aperaaamo, ae fa'aauau pea e le Atua le feagaiga ma le nuu o Isaraelu, o le tofi lea o Aperaaamo e ala i lona atalii o Isaako.

A tatou fua i le feagaiga a le Atua ma Aperaaamo, e mafai ona tatou faapea o le feagaiga lava lea a le Atua ma le tagata. O le feagaiga na alualu oo ina agasala le tagata, ae tumau pea le Atua i lona faamaoni, lea na mafua ai ona afio mai Iesu i le lalolagi.

GALUEGA FAATINO: Fesili ma Tali:

1. Aisea na iloa ai e Aperaaamo e faamaoni le Atua i ana folafolaga?

Tali: Ua osi le feagaiga

2. Aisea e tai 3 ai tausaga o manu vaefa ia ua osi ai le feagaiga?

Tali: O manu e mama ma lelei.

3. “O lau fanau e pei o fetu o le lagi.” O ai le nuu lea e faatatau ai le fetalaiga a le Atua?

Tali: O Isaraelu

4. Afai e soli e Aperaaamo le feagaiga ma le Atua, o le a lona iuga?

Tali: E taapeape ma aina e manu feai.

5. O le a le uiga o le upu – “Feagaiga”

Tali: O se maliliega ua tuu atoatoa ai le loto.

PESE: (Aperaaamo tamā)

A'OA'OGA:

1. E faamaoni le Atua.
2. E tausi feagaiga le Atua.
3. O i tatou o feagaiga a le Atua.

.....

ASO SA: 28 NOVEMA 2021

MATAUPU: MATUA MA FANAU

SINI: A’oa’o tamaiti ia malamalama, o lo latou aia tatau ua uma ona faasino mai e le Alii. Ia ava le teine ma le tama i matua. Ia tausi foi ma le faamaoni matua i fanau.

TUSI FAITAU: Efeso 6: 1 – 4

FESOASOANI MO FAIAOGA:

A tatou maitau i mea ua tutupu mai i totonu o aiga ua tele lava ina masofa le va tapuia o matua ma fanau. Ua le usitai fanau i matua. O matua foi ua leai se alofa e tausi ai fanau. Ua tele foi fesili ua fesili ai tagata i le mafuaaga. Aisea? Ua manatu nisi o fanau le mafuaaga, a o nisi o matua. O le vaega o le tusi a Efeso lea sa tatou faitauina, o lo o aumai ai le tali mo nei faafitauli.

Ua toe aumai e le Aposetolo o Paulo le tulafono e lima (Esoto 20: 12) e aoai ai le fanau ina ia iloa le taua o le ola usiusitai i matua. O le ustai e faavae i le ava i matua. O le upu ‘ava’ o lo o faaperetaniaina o le ‘honour.’ O se faaeaea maualuga. Ia iloa e le fanau ona ave le faaeaea i matua. Ia fa’aaloalo, faalogo ma usitai, aua lava nei vaai maualalo se tamaitiiti i ona matua. A fua foi i le ola usiusitai o le tamaitititi, ma ava i matua, ua i ai lava lona taui lelei.

O le folafolaga ua uma ona faia e le Atua mo fanau o e e ava i matua. E tului ai aso ma tausaga o le fanau. O upu a le potu o

Solomona. “Lou atalii e, ia e tausi i poloaiga a lou tamā, aua foi e te tulafoaiina le upu e a’oa’o atu ai lou tinā.” O le aoaiga a matua, ia sili ona teu fatu e le fanau.

“Ia e faalogo i lou tamā, o le na fanaua oe, aua foi e te inoino i lou tinā pe a loomatua o ia.”

Afai e ava le fanau i matua, e le mafai ona ma pe musu e tausi pe a matutua. O le ‘ava’ e toe tausi ai matua i le alofa, e pei ona tausia mai ai le fnaau ao itiiti.

O lea foi ua apoapoai Paulo i matua. Aua nei vaivai le tausi a matua i fanau. Ia tausi atu i aoaiga ma apoapoaiga. Ia fafaga i upu lelei. Ia malamalama matua o le ola tului o le fanau, e maua mai i matua, lea na ta’u mai i le tulafono e 5 a le Atua. E leai lava se isi mea e manuia ai fanau i le olaga nei, e afua mai iua na o matua. Ia ave ai le avanoa e fa’aali mai ai mea o lo o i o latou loto. Ia amanaia e matua tiga ma faigata a le fanau. A malamalama matua i lagona o le fanau, ona iloa lea ona avatu le apoapoaiga ma le aoaiga fetau mo o latou faafitauli.

O le manatu o le Aposetolo, o le ava o le fanau i matua ma le tausiga a matua mo le fanau e faavae lava i le alofa atoa ai ma le faatuatua ia Iesu Keriso, e maua ai le leleiga i le va o matua ma fanau.

GALUEGA FAATINO: Tusigatala

Faatonuga: Tusi mai se tala 3 parakalafa ae tasi le laupepa.

Ulutala: “O le alofa o matua mo a’u”
(The love of parents for me)

E mafai foi ona faapalagi le tala (togi – 10)

PESE: (Faalogo ma usitai)

A’OA’OGA:

1. Ia mauaa le alofa i le va o matua ma fanau.

2. O le tausī matua, o le manuia sili lea o le fanau.

MANATU TAIALA O TESEMA: O LE KERISIMASI

O le masina lenei o le fiafia ma le olioli, aua ua sauni le lalolagi uma mo le fanau mai o le Pepe o le Kirisimasi. Ae o le fesili, o le a ea le uiga moni o le Kerisimasi i le tagata. O le upu moni e fanau mai lava le Pepe o le Kerisimasi, o lo o tumau pea le lotu o le tagata i le ola tuai. Ae tataua ona avea le Kirisimasi ma vaiata o le alofa ma le ola fealofani.

ASO SA: 5 TESEMA 2021

MATAUPU: O LE GAFA O LE KERISIMASI

SINI: Ia malamalama le fanau i auga tupulaga sa faavae mai ai le Kirisimasi ma mea na tutupu ai.

TUSI FAITAU: Mataio 1: 1 – 17

FESOASOANI MO FAIAOGA:

O le gafa o Iesu Keriso o le gafa lava lea o le Kerisimasi. Aua o le fanau mai ai o le Keriso, na mafua ai ona faaigoaina lea aso ma avea ai ma Kerisimasi, lea ua tatou faailogaina i le aso 25 o Tesema i tausaga taitasi. Ae o le gafa na amata mai i le Feagaiga Tuai i le taimi o Aperaaamo. E 42 auga tupulaga mai ia Aperaaamo seia oo ia Keriso.

E 14 auga tupulaga mai ia Aperaaamo e oo ia Tavita le tupu o Isaraelu. A o mea na tutupu i totonu o augatupulaga ia sa tutupu ai faigata. E lei faigofie ia Aperaaamo le mea na finagalo ai le Atua e ave lona atalii o Isaako e osi ai le taulaga. O Isaako o le tama o le feagaiga, a o le atalii e toatasi o Aperaaamo i lana avā o Sarai. E ui ina faigata ia Aperaaamo le mea ua finagalo ai le Atua, ae na usitai pea Aperaaamo. O le mea lea na faamanuia ai Aperaaamo e le Atua. A o lei avea Tavita ma tupu o Isaraelu, tele

ia o faigata sa feagai foi ma Tavita a o avea ai ma leoleo mamoe. E galue toatasi i le ao ma le po, e feagai ma manu feai. Ae le gata i lea, ae o le lamatia o lona ola mai ona fili. Aemaise lava i le taimi na faauuina ai e avea ma tupu. A o le lotu o Tavita na tumau pea i le Atua. O le mea lea na alofaina ai o ia e le Alii.

Mai ia Tavita seia paia le tafeaga a le nuu o Isaraelu i Papelonia, e 14 foi auga tupulaga. Ina ua avea Tavita ma tupu o Isaraelu, tele foi faigata sa feagai ma ia. O lana fanau ua tupu ai le agasala, ua oo foi ina latou fouvale i le faigamalo a le tupu. E oo lava ia Tavita, na tupu le agasala i lona lotu ina ua manao i le ava a Uria. O le mafuaaga lea na oo ai le oti i le fanau a Tavita. Na tupu le salamō i le lotu o le tupu, ma tatalo ai ma le aioi i le faamagaloga a lona Atua. Na tali le Alii i le tatalo a lana auuina, ma aumai ai le filemu i lona lotu ina ua fanau Solomona. O le uiga o le igoa Solomona o le filemu ‘Shalom’ – may peace be with you.” Ae ina ua matua Solomona ma avea ma tupu e sui tulaga i lona tamā o Tavita, na le tumau lona lotu i le Atua. O le alu ese lea o le lotu o Solomona mai le Alii, na vaeluaina ai le malo o Isaraelu. Ua tupu le agasala tele i le nuu, ma oo ai ina faatafea i le nuu o Papelonia.

Mai le tafeaga i Papelonia seia oo mai i le taimi o Iesu Keriso, e 14 foi auga tupulaga. O le i ai o Isaraelu i le tafeaga na iloga ona faigata le tulaga na oo ai le nuu. Ua latou fesiligia le alofa o le Atua ma oo ina tafea ese o latou lotu mai le Alii. O nisi ua galo le Atua. Ua pologa o latou lotu ona o le agasala. Ua galo le feagaiga ae ua osi feagaiga ma le agasala.

E ui ina faagalo e le nuu le Atua ma tupu le agasala i o latou lotu, ae e lei faagaloina i latou e le Atua. O le Atua e faamaoni i lana feagaiga, e atoatoa lona alofa. E le gata na toe faafoi le tafeaga ae ua finagalo foi le Atua, e faamama le lotu agasala o le tagata.

“Aua ua faapea lava ona alofa mai o le Atua i le lalolagi, ua ia aumai ai lona Alo pele e toatasi, ina ia le fano se tasi e faatuatua ia te ia, ae ia maua le ola e faavavau.”

O le faaolataga lea mo le lalolagi uma, ina ua fanau mai le pepe o le Kerisimasi, e ala ia Iesu Keriso.

GALUEGA FAATINO:

1. Faailiu mai le parakalafa i le Gagana Samoa (Translation)

“So all the generations from Abraham to Dvid are fourteen generations, and from David to the exile to Babylon, fourteen generation, and from the exile to Babylon to the Messiah, fourteen generations,”
2. Vaevae le vasega i vaega e 3.
 - i) Vaega Muamua – Auga Tupulaga Aperaamo ia Tavita
 - ii) Vaega Lua – Auga tupulaga Tavita i Papelonia (Tafeaga)
 - iii) Vaega Tolu – Auga Tupulaga Papelonia (Tafaga) ia Iesu Keriso.

Faamatala mai mea na tutupu i totonu o auga tupulaga nei e 3. E mafai ona fa’aaoga le Tusi Paia (A lē maea, e mafai ona ave e faauma mai i le fale (Home Work)

PESE: (Joy to the world)

A’OA’OGA:

1. O Iesu o le atoatoaga lea o mea lelei.
2. E i ai le Atua i taimi o faigata.
3. E i ai foi le faigata o le Kerisimasi.

.....

ASO SA: 12 TESEMA 2021

MATAUPU: O MEAALOFA O LE KIRISIMASI

SINI: A’oa’o tamaiti ia malamalama i le taua ma uiga o meaalofa na ofoina e makoi mo Iesu.

TUSI FAITAU: Mataio 2: 9 – 12

FESOASOANI MO FAIAOGA:

O le vaitau leni o le feofofoai o meaalofa mo le Kerisimasi. E fa’aali ai le fiafia ma molimoli ai alofaaga i aiga ma uo. Ae o le auga lava o nei meaalofa, o le faailoa lea o le olioli o le loto, ina ua fanau mai Iesu Keriso o Ia o le Mesia na valoia.

O valoaga a le au Perofeta, lea ua faataunuaina ma o valoaga nei na faalogo i ai le au makoi, ua mafua ai ona malaga mai e saili le pepe e fai ma tupu ia Isaraelu.

Ua tatou masani i le tala leni i le au Makoi o e na taitaiina e le fetu i le latou faigamalaga e saili Iesu. Ua manatu nisi e toatolu makoi na malaga mai e saili Iesu. Ae mafua lea manatu ona o meaalofa e tolu o lo o taua i le tusi a Mataio. O le mea taua i le tala leni o meaalofa sa ofoina e makoi mo le P epe o Iesu, na faailoa ai o latou loto, ua talitonu ma mautinoa o Iesu Keriso o ia o le Faaola mo le lalolagi.

- 1) O le meaalofa o le ‘**Auro**’, o se meaalofa e talafeagai mo se tupu. E ilaila ma matagofie, e mama (pure), e taua (valuable) ma e anagata pe a avea ma uamea (royal metal). O Iesu o Ia o le tupu, e mama ma malosi aua o Ia lava o le Atua.
- 2) ‘**Pulu lipano**’. O le meaalofa ua na o ositaulaga e tatau ai. O le suauu manogi lelei e faauuina ai se ua avea ma

ositaulaga. O le lipano sa ofoina ai taulaga o le faafetai i le Atua i taimi o tapuaiga i le malumalu. O Iesu na faauuina e le Atua e aveva ma ositaulaga sili, ma o lona soifua lava na ofoina e fai ma taulaga o le togiola mo le tagata.

- 3) **'Pulu Muro'** O le suauu lelei ma e fa'aaogaina e uu ai tino o tagata maliliu. E malosi lona manogi e le lagonaina ai se manogi o le tino pe a pala. O le mea alofa lea, na faailoa ai puapuaga o le Alii ma ona tiga i luga o le satauro ina ia taunuu le galuega na afio mai ai i le lalolagi, o ia o le Faaola.

O le taua ma le uiga lea o mea alofa nei – 'Auro,' 'Pulu Lipano,' ma le 'Pulu Muro.'

E mafai foi e nei meaalofa, ona aumai le lagona sili ona taua i le Kirisimasi. E le o le aso po o le tausaga le mea taua, ae sili ona taua le galuega na faia e Iesu i lea aso. O le aso na Afio mai ai Iesu e aumai le filemu, o le loto faamagalalo ma le alofa i le lalolagi.

GALUEGA FAATINO: Faatino le tala i le au makoi

PESE: 'E toatolu tupu na o'

A'OA'OGA:

1. O le meaalofa sili mo le Kirisimasi, o le faatupu le filemu, loto faamagalalo ma ia tumau i le alofa.

.....